

MARCI TVLLII CICERONIS,
 O TICIORVM LIBRI TRES:
 CATO MAIOR, VEL DE SENECTVTE:
 LAELIVS, VEL DE AMICITIA:
 PARADOXA OTICIORVM SEX:
 SOMNIVM SCIPIONIS, EX
 LIBRO SEXTO DE REPVBICA.

68
 7 B
 2

Quæ qui leget, facile, quantum in ijs
 emendandis studium sit adhi-
 bitum, intelliget.

Additæ sunt in extremo opere
 lectiones à libris manuscrip-
 ptis, & ex ingenio.



Asc. ny

Sanctus


PAVLVS MANVTIVS ALDI F.

VENETIIS, . M. D. XLVIII.

PAVLVS MANVTIVS AL I F.
B E N E D I C T O R H A M =
B E R T O S . D .

*N*on ignoras Benedicte Rhäberte, sensuum esse quandam in hominibus similitudinem; quæ cum in consuetudine cognita est, efficitur, ut, inter quos id accidit, amor exoriat. ab hoc quasi fonte multorum amicitia manarunt. multos etiam beneficium cum obligasset, cumq; id, quod acceperant, memoria conseruatam grato animo redderent, idq; uterque fieri ob ingenij bonitatem, & uoluntatis erga se propensionem existimaret: statim est illam opinionem beneuolentia consecuta. itaque duæ causæ sunt, quæ obrem homines ament inter se: sed hæc posterior, quæ à rebus externis originem ducit, cum illa superiore, quæ à natura proficiscitur, nullo pacto uidetur esse comparanda. illa enim primum habet eam suauitatem, qua, ut opinor, & certe nulla maior est, cum eos, quibus utimur, & iisdem rebus, quibus nos, & æque atque nos affici sentimus: deinde etiam qui in dando & accipiendo beneficio fructus est, eo non eget. nam si hæc actio bene merendi interdum & est, & esse potest in ijs, qui uoluntate non admodum coniuncti sunt: quanto facilius existet apud eos, quorum animi ita consentiunt, ut quasi natura hortante easdem res appetere, ab iisdem fugere uideantur? at uero qui officiorum commoditatibus adducti in amicitiam coierunt; etiam si alter al-

rerum incho summe diligit; tamen, si quando accidet,
id quod accidere sæpe solet, ut ea, qua diligere cœpe-
runt, causa tollatur, certe eorum animi pedetentim in
amore languescunt. quo in genere animaduertis Rhama-
berte quàm multi quotidie labantur. de quibus facile
est intelligere, quid sentias, cum ab eorum instituto tua
ratio tam uehementer abhorreat: probe enim te, quæ
nostra debeat esse in iungendis amicitijs cautio, quæ in
iisdem colendis religio, quod item in omni uita præstan-
dum officium sit, horum librorum, quos nunc tibi in-
scriptos ad te mittimus, lectio erudit in me ipso;
quem ab opibus non magnopere firmum, aut ne fir-
mum quidem, tamen octauum abhinc annum tanto
studio es complexus, quantum, qui ab omni re para-
tissimus sit, remunerando compensare uix possit. cumq;
rerum mearum status, ut sunt humana, interdum
mutaretur: memoria teneo, te nunquam immutatum,
eandem semper cum mihi, tum fratribus meis uolun-
tatem ac beneuolentiam præstitisse. cum uero maior
aliquanto inter nos consuetudo esse cœpisset; quod qui-
dem est factum, postea quàm te in nostram uicinita-
tem contulisti: facile sentio, ad meam uitam recte con-
formandam quanto mihi observatio tuorum morum
fuerit adiumento. colloquutiones uero de literis nostræ
quid non dicam delectationis, sed utilitatis habuerunt?
equidem, si liceret, totos dies uellem tecum ponere.
quarum enim ego rerum cognitione delector, earum
in omni genere quæ tui sit iudicij subtilitas, intelligo. sed
hanc latine scribendi rationem, in qua multi nunc uo-



lunt excellere, paucissimi possunt, eam uero si tenes, ut
tuis scriptis mihi quidē nihil esse purius uideatur. quod
eo mirandum est magis, quia tu non, ut alij, diurno,
atque assiduo librorum usu, sed temporum studio subsi-
ciuorum, hoc ut posses, consecutus es. nam ut omittam,
quodd tibi, cuius fidei atque prudentiae Veneti senatus ar-
cana creduntur, otium non sepe contingit: ecqui dies
est, quo non ex amicis tuis aut consilio tibi aliquis, aut
opera, aut etiam re sit adiuvandus? qua in consuetu-
dine retinenda nimium diligens esse dum uis, accidit
saepē, ut tuum potius ipse commodum, quam officij colen-
di facultatem pratermittas. quo ego me aptius facere
sum arbitratus, si hac opuscula, in quibus maxime de of-
ficio praecepta traduntur, ad te, quem cognoui esse omniū
officiosissimum, mitterem. genus hoc Rhamberte quod-
dam est, quo ego eos, qui de me bene meriti sunt, remu-
nerari soleo. perpende rem, nulla uidebitur: animum re-
spice, grauissimum dices. Valē.

M. TVLLII CICERONIS
OFFICIORVM AD MARCVM FILIVM
LIBER I.

Vanquam te Marce fili annum iam au-
dientem Cratippum, idq; Athenis, abūda-
re oportet præceptis, institutiq; philoso-
phia, propter summam & doctoris aucto-
ritatem, & urbis, quorum alter te scientia augere potest,
altera exemplis: tamen, ut ipse ad meam utilitatem
semper cum græcis latina coniunxi, neque id in philoso-
phia solum, sed etiam in dicendi exercitatione feci, idem
tibi censeo faciendum, ut par sis in utriusque orationis fa-
cultate. quam quidem ad rem nos, ut uidemur, ma-
gnam attulimus adiumentum hominibus nostris, ut non
modo græcarum literarum rudes, sed etiam docti ali-
quantum se arbitrentur adeptos & ad dicendum, et ad
iudicandum. quam rem disceres tu quidem à principe
huius ætatis philosophorum, & discas, quàm diu uoles:
(tam diu autem uelle debebis, quoad te, quantùm profi-
cias, non poenitebit) sed tamen nostra legens non mul-
tum à Peripateticis dissidentia (quoniam utrique & So-
cratici, & Platonici esse uolumus) de rebus ipsis utere
tuo iudicio: nihil enim impedio: orationem autem lati-
nam profecto legendis nostris efficies plenior. m. nec ue-
ro hoc arroganter dictum existimari uelim: nam phi-
losophandi scientiam concedens multis; quod est orato-
ris proprium, apte, distincte, ornateq; dicere, quoniam
in eo studio ætatem consumpsi, si id mihi assumo, ui-

deor id meo iure quodam modo uendicare. quamobrem magnopere te hortor mi Cicero, ut non solum orationes meas, sed hos etiam de philosophia libros, qui iam se illis ferè æquarunt, studiose legas: uis enim dicendi maior est in illis; sed hoc quoque colendum est æquabile, et temperatum orationis genus. Et id quidem nemini uideo Græcorum adhuc contigisse, ut idem utroque in genere laboraret, sequereturq; Et illud forense dicendi, Et hoc quietum disputandi genus: nisi forte Demetrius Phalereus in hoc numero haberi potest, disputator subtilis, orator parum uehemens, dulcis tamen, ut Theophrasti discipulum possis agnoscere. nos autem quantum in utroq; profecerimus, aliorum sit iudicium, utrunque certe secuti sumus. e quidem Et Platonem existimo, si genus id forense dicendi tractare uoluisset, grauissime, et copiosissime potuisse dicere: Et Demosthenem, si illa, quæ à Platone didicerat, tenuisset, Et pronunciare uoluisset, ornate, splendideq; facere potuisse. eodemq; modo de Aristotele, Et Isocrate iudico: quorum uterque suo studio delectatus contempsit alterum. sed, cum statuissem aliquid hoc tempore ad te scribere, Et multa posthac, ab eo exordiri uolui maxime, quodd Et ætati tuæ esset aptissimum, Et auctoritati meæ grauissimum. nam, cum multa sint in philosophia et graui, Et utilia, accurate, copioseq; à philosophis disputata, latissime patere uidentur ea, quæ de officijs tradita ab illis, Et præcepta sunt: nulla enim uitæ pars neque publicis, neque priuatis, neque forensibus, neque domesticis in rebus, neque si tecum agas quid, neque

quæ si cum altero contrahas, uacare officio potest: in eoq;
colendo sita uita est honestas omnis, & in negligendo
turpitude. atque hæc quidem quæstio communis est
omnium philosophorum: quis est enim, qui nullis offi-
cij præceptis tradendis philosophum se audeat dicere? sed
unt non nullæ disciplinæ, quæ, propositis malorum et bo-
norum finibus, officium omne peruertunt: nam, qui sum-
mum bonum sic instituit, ut nihil habeat cum uirtute
coniunctum; idq; suis comodis, non honestate metitur;
hic si sibi ipse consentiat, & non interdum naturæ bo-
nitate uincatur, fit, ut neque amicitiam colere possit, nec
iustitiã, nec liberalitatem: fortis uero, dolorem summum
malum iudicans; aut temperans, uoluptatem summum
bonum statuens esse certe nullo modo potest. quæ quan-
quam ita sunt in promptu, ut res disputatione nõ egeat;
tamen sunt à nobis alio loco disputata. hæc disciplina igitur,
si sibi consentaneæ esse uelint, de officio nihil queant
dicere. neque ulla officij præcepta firma, stabilia, cõiun-
cta naturæ tradi possunt, nisi aut ab ijs, qui solam, aut
ab ijs, qui maxime honestatem propter se dicant expe-
tendam. itaque propria est ea præceptio Stoicorum, &
Academicorum, & Peripateticorum: quoniam Aristo-
nis, Pyrrhonis, & Herilli iam pridem explosa sententia
est: qui tamen haberent ius suum disputandi de officio,
si rerum aliquem delectum reliquissent, ut ad officij in-
uentionem aditus esset. sequemur igitur hoc quidẽ tem-
pore, & in hac quæstione potissimum Stoicos, nõ ut inter-
pretes; sed, ut solemus, è fontibus eorum, iudicio, arbi-
trioq; nostro, quantum, quoq; modo uidebitur, hauriemus.

Placet igitur, quoniam omnis disputatio de officio futura est, ante definire, quid sit officium : quod à Panætio prætermissum esse miror : omnis enim, quæ à ratione suscipitur de aliqua re, institutio debet à definitione proficisci; ut intelligatur, quid sit id, de quo disputetur.

Omnis de officio duplex est quaestio. unum genus est, quod pertinet ad finem bonorum; alterum, quod positum est in præceptis, quibus in omnes partes usus uitæ confirmari possit. superioris generis huiusmodi exempla sunt; omnia ne officia perfecta sint; *nunquid* officium aliud alio maius sit; & quæ sunt generis eisdem. quorum autem officiorum præcepta traduntur, ea, quamquam pertinent ad finem bonorum, tamen id minus apparet, quia magis ad institutionem uitæ cōmunis spectare uidentur. de quibus est nobis his libris explicandum.

Atque etiam alia diuisio est officij. nam et mediū quoddam officium dicitur, & perfectum. perfectū autem officij, rectū (opinor) uocemus, quod Græci κατ'ὁρίσματα; hoc autē, cōmune, quod ὑπαρκτόν uocant. atque ea sic definiunt, ut, rectum quod sit, id perfectum officij esse definiant; medium autem officium id esse dicāt, quod cur factum sit, ratio probabilis reddi possit. Triplex igitur est, ut Panætio uidetur, consilij capiendi deliberatio. nam, honestum ne factu sit, an turpe, dubitant, id, quod in deliberationem cadit. in quo considerando, sæpe animi in contrarias sententias distrahuntur. tum autem inquirunt, aut consultant ad uitæ commoditatem, incunditatemq; ad facultates rerum, atque copias, ad opes, ad potentiam, quibus et se possint iuuare, et suos,

nunquod

*officium,
δικον μετον*

conducat id, nec ne, de quo deliberant : quæ deliberatio omnis in rationem utilitatis cadit . tertium dubitandi genus est, cum pugnare uidetur cum honesto id , quod uidetur esse utile : cum enim utilitas ad se rapere , honestas contra renocare ad se uidetur, fit , ut distrahatur in deliberando animus, afferatq; ancipitem curam cogitandi . hac in diuisione , cum præterire aliquid maximum uitium in diuidendo sit , duo prætermissa sunt : nec enim solum, utrum honestum , an turpe sit , deliberari solet ; sed etiam, duobus propositis honestis , utrum honestius ; itemq; duobus propositis utilibus, utrum utilius . ita, quam ille triplicem putauit esse rationem , in quinque partes distribui debere reperitur . primum igitur est de honesto , sed dupliciter ; tum pari ratione de utili ; post de comparatione eorum differendum .

Principio generi animantium omni est à natura tributum, ut se, uitam, corpusq; tueatur, declinetq; ea , quæ nocitura uideantur ; omniaq; , quæ sint ad uiuendum necessaria, inquirat, & paret, ut pastum , ut latibula, ut alia eiusdem generis . commune item animantium omnium est coniunctionis appetitus procreandi causa, et cura quædam eorum, quæ procreata sunt . sed inter hominem, & belluam hoc maxime interest, quodd hæc tantum, quantum sensu mouetur, ad id solum , quod adest, quodq; præsens est, se accommodat, paululum admodum sentiens præteritum, aut futurum : homo autem, qui rationis est particeps, per quam consequentia cernit, principia, & causas rerum uidet, earumq; progressus, et quasi antecessiones non ignorat , similitudines comparat,

rebusq; præsentibus adiungit, atque anneſcit futuras; facile totius uitæ curſum uidet, ad eamq; degendā præparat res neceſſarias: eademq; natura ui rationis hominem conciliat homini & ad orationis, & ad uitæ ſocietatem; ingeneratq; in primis præcipuum quendā amorem in eos, qui procreati ſunt; impellitq; , ut hominum coetus et celebrari inter ſe, & ſibi obedire uelit; ob eaſq; cauſas ſtudeat parare ea, quæ ſuppeditent ad cultum, & ad uictum, nec ſibi ſoli, ſed coniugi, liberis, cæteriſq; , quos charos habeat, tueriq; debeat. quæ cura exſuſcit etiam animos, & maiores ad rem gerendam facit. in primisq; hominis eſt propria, ueri inqueſtitio, atque inueſtigatio. itaque, cum ſumus neceſſarijs negocijs, curiſq; uacui, tum auemus aliquid uidere, audire, ac diſcere; cognitionemq; rerum aut occultarum, aut admirabilium, ad bene, beateq; uiuendum neceſſariam du-
 cimus. ex quo intelligitur, quod uerum, ſimplex, ſincerumq; ſit, id eſſe naturæ hominis aptiſſimum. huic ueri uidendi cupiditati adiuncta eſt appetitio quædā principatus, ut nemini parere animus bene informatus à natura uelit, niſi præcipienti, & docenti, aut utilitatis cauſa iuſte, et legitime imperanti: ex quo animi magnitudo exiſtit, humanarumq; rerum contemptio. nec uero illa parua uis naturæ eſt, rationiſq; , quod unū hoc animal ſentit, quid ſit ordo, quid ſit quod deceat in factis dictiſq; , qui modus. itaque eorum ipſorū, quæ aſpectu ſentiuntur, nullum aliud animal pulchritudinē, uenuſtatem, conuenientiam partium ſentit. quam ſimilitudinē natura, ratioq; ab oculis ad animum transferens, multo

etiam magis pulchritudinem, constantiam, ordinem in consilijs, factisq; conseruandum putat; cauereq; ne quid indecore, effœminate uel faciat; tum, in omnibus et opinionibus, & factis ne quid libidinosè aut faciat, aut cogitet. quibus ex rebus conflatur, & efficitur id, quod quærimus, honestum; quod etiã si nobilitatũ non sit, tamen honestum sit; quodq; uere dicimus, etiã si à nullo laudetur, laudabile esse natura. Formam quidẽ ipsam Marce fili, & tanquam faciem honesti uides. quæ si oculis cerneretur, mirabiles amores (ut ait Plato) excitaret sapientiæ. Sed omne, quod honestum est, id quatuor partium oritur ex aliqua: aut enim in perspicientia ueri solertiaq; uersatur; aut in hominum societate tuenda, tribuendoq; suum cuiq; , & rerum contractarum fide; aut in animi excelsi, atque inuicti magnitudine, ac robore; aut in omnium, quæ fiunt, quæq; dicuntur, ordine, & modo, in quo inest modestia, & temperantia. quæ quatuor quanquam inter se colligata, atque implicata sunt: tamen ex singulis certa officiorũ genera nascuntur: uelut ex ea parte, quæ prima descripta est, in qua sapientiam, & prudentiam ponimus, inest indagatio, atque inuẽtio ueri: eiusq; uirtutis hoc munus est propriũ: ut enim quisque maxime perspicit, quid in re quæque uerissimum sit, quiq; & acutissime, et celerrime potest & uidere, & explicare rationem, is prudentissimus, & sapientissimus rite haberi solet. quocirca huic quasi materia, quam tractet, & in qua uersetur, subiecta est ueritas. reliquis autẽ tribus uirtutibus necessitates proposuere sunt ad eas res parandas, tuendasq; quibus actio uita

continetur ; ut societas hominum , coniunctioq; seruetur ; & animi excellentia , magnitudoq; cum in augendis opibus , utilitatibusq; & sibi , & suis comparandis , tum multo magis in his ipsis desficiendis eluceat . ordo autem , & constantia , & moderatio , & ea , quæ sunt his similia , versantur in eo genere , ad quod adhibenda est actio quædam , non solum mentis agitatio : his enim rebus , quæ tractantur in uita , modum quendam adhibentes , & ordinem , honestatem , & decus conseruamus . Ex quatuor autem locis , in quos honesti naturam , uimq; diuisimus , primus ille , qui in ueri cognitione consistit , maxime naturam attingit humanam : omnes enim trahimur , & ducimur ad cognitionis , & scientiæ cupiditatem , in qua excellere pulchrum putamus : labi autem , errare , nescire , & decipi , et malū , & turpe ducimus . in hoc genere & naturali , & honesto duo uitia uitanda sunt : unum , ne incognita pro cognitis habeamus , hisq; temere assentiamus : quod uitium effugere qui uolet , (omnes autem uelle debebunt) adhibebit ad cōsiderandas res & tempus , & diligentiam . alterum est uitium , quoddam nimis magnum studium , multamq; operam in res obscuras , atque difficiles conferunt , easdemq; non necessarias . quibus uitijs declinatis , quod in rebus honestis , & cognitione dignis operæ , curæq; ponetur , id iure laudabitur : ut in astrologia C . Sulpitium audiuius , in geometria Sex . Pōpeium ipsi cognouimus , multos in dialectica , plures in iure ciuili . quæ omnes artes in ueri inuestigatione versantur : cuius studio à rebus agendis abduci , contra officium est : uirtutis

enim laus omnis in actione consistit; à qua tamen sepe fit intermissio, multiq; dantur ad studia reditus: tum agitatio mentis, quæ nunquam acquiescit, potest nos in studijs cogitationis & sine opera nostra continere. omnis autem cogitatio, motusq; animi aut in consilijs capiendis de rebus honestis, & pertinentibus ad bene, beatæq; uiuendum, aut in studijs scientiæ, cognitionisq; uersabitur. ac de primo quidem officij fonte diximus. De tribus autem reliquis, latissime patet ea ratio, quæ societas hominum inter ipsos, & uitæ quasi communitas continetur. cuius partes duæ sunt; iustitia, in qua uirtutis splendor est maximus, ex qua boni uiri nominantur; & huic coniuncta beneficentia, quam eandem uel benignitatem, uel liberalitatem appellare licet. Sed iustitiæ primum munus est, ut ne cui quis noceat, nisi lacessitus iniuriâ; deinde, ut communibus pro communibus utatur, priuatis autem ut suis. sunt autem priuata nulla natura; sed aut ueteri occupatione, ut qui quondam in uacua uenerunt; aut uictoria, ut qui bello positi sunt; aut lege, aut pactione, conditione, sorte. ex quo fit, ut ager Arpinas Arpinatum dicatur, Tusculanus Tusculanorum. similisq; est priuatarum possessio num descriptio. ex quo, quia suum cuiusque sit eorum, quæ natura fuerant communia; quod cuique obigit, id quisque teneat. eo si quis sibi plus appetet, uiolabit ius humanæ societatis. sed quoniam (ut præclare scriptum est à Platone) non nobis solum nati sumus, sed ortus nostri partem patria, partem parentes uendicant, partem amici; atque (ut placet Stoicis) quæ in terris

gignuntur, ad usum hominum omnia creati, homines autem hominum causa esse generatos, ut ipsi inter se alij alius prodesse possent: in hoc naturam debemus ducem sequi, & communes utilitates in medium asferre, mutatione officiorum, dando, accipiendo, tum artibus, tum opera, tum facultatibus deuincire hominum inter homines societatem. Fundamentum autem iustitiæ est fides, id est dictorum, conuentorumq; constantia, & ueritas. ex quo, quanquam hoc uidebitur fortasse cuiusdam durius, tamen audeamus imitari Stoicos, qui studiose exquirunt, unde uerba sint ducta, credamusq; quia fiat, quod dictum est, appellatam fidem. Sed iniustitiæ duo genera sunt; unum eorum, qui inferunt; alterum eorum, qui ab ijs, quibus infertur, si possint, non propulsant iniuriam: nam qui iniuste impetu in quempiam facit, aut ira, aut aliqua perturbatione incitatus, is quasi manus uiolenter uidetur asferre socio: qui autem non defendit, nec obsistit, si potest, iniuriæ, tam est in uitio, quam si parentes, aut amicos, aut patriam deserat. Atque illæ quidem iniuriæ, quæ nocendi causa de industria inferuntur, sæpe à metu proficiuntur, cum is, qui alteri nocere cogitat, timet, ne, nisi id alteri fecerit, ipse aliquo afficiatur incommodo. maximam autem partem ad iniuriam faciendam aggrediuntur non nulli, ut adipiscantur ea, quæ concupierunt: in quo uitio latissime patet auaritia, expetuntur autem diuitiæ tum ad usus uitæ necessarios, tum ad perfruendas uoluptates. in quibus autem maior est animus, in his pecuniæ cupiditas spectat ad opes, & ad grauificandi facultatem: ut

nuper M. Crassus negabat ullam satis magnam pecuniam esse ei, qui in repub. princeps uellet esse, qui suis fructibus exercitum alere non posset. delectant etiam magnifici apparatus, uitaq; cultus cum elegantia, & copia. quibus rebus effectum est, ut infinita pecunia cupiditas esset. nec uero rei familiaris amplificatio nemini nocens uituperanda est: sed fugienda semper iniuria. Maxime autem adducuntur plerique, ut eos iniustitia capiat obliuio, cum in imperiorum, honorum, gloriae uel cupiditatem inciderint: quod enim est apud Ennium, Nulla sancta societas, nec fides regni est, id latius patet: nam quidquid eiusmodi est, in quo non possint plures excellere, in eo plerumque sit tanta contentio, ut difficillimum sit sanctam seruare societatem. declarauit id modo tempestas C. Caesaris, qui omnia iura diuina, & humana peruertit propter eum, quem sicbi ipse opinionis errore sinxerat, principatum. est autem in hoc genere molestum, quod in maximis animis, splendidissimisque ingenijs plerumque existunt honoris, imperij, potentiae, gloriae cupiditates: quo magis cauendum est, ne quid in eo genere peccetur. sed in omni iniustitia permultum interest, utrum perturbatione aliqua animi, quae plerumque breuis est, & ad tempus, an consulto, & cogitata fiat iniuria: leuiora enim sunt ea, quae repentino aliquo motu accidunt; quam ea, quae meditata, & preparata inferuntur. ac de inferenda quidem iniuria satis dictum est. Prætermittenda autem defensionis, deferendiq; officij plures solent esse causae: nam aut inimicitias, aut laborem, aut sumptus suscipere no-

ueritatem, & ad fidem, ea negare interdum, et non ser-
uare, sit iustum : referri enim decet ad ea, quæ propo-
sui in principio, fundamenta iustitiæ; primū, ut ne cui
noceatur; deinde, ut communi utilitati seruiatur. ea
cum tempore commutantur, commutatur officium, ut
non semper sit idem : potest enim accidere promissum
aliquod, & cōuentum, ut id effici sit inuile uel ei, cui
promissum sit; uel ei, qui promiserit : nam si (ut in fa-
bulis est) Neptunus, quod Theseo promiserat, non fecis-
set, Theseus filio Hippolito non esset orbatus : ex tribus
enim optatis (ut scribitur) hoc erat tertium, quod de
Hippolyti interitu iratus optauit : quo impetrato, in
maximos luctus incidit . nec promissa igitur seruanda
sunt ea, quæ sint ijs, quibus promiseris, inutilia : nec, si
plus tibi noceant, quàm illi prosint, cui quidē promise-
ris, contra officiū est, maius damnum anteponi minori :
ut, si constitueris te cuiusdam aduocatum in rem præsen-
tem esse uenturum, atque interim grauiter ægrotare
filius cœperit, non sit contra officium, non facere, quod
dixeris; magisq; ille, cui promissum sit, ab officio disce-
dat, si se destitutum queratur. Iā, illis promissis non stā-
dum esse, quis non uidet, quæ coactus quis metu, aut de-
ceptus dolo promiserit? quæ quidē pleraque iure præ-
torio liberantur, non nulla legibus . Existunt etiam in-
iuriæ sæpe calumnia quadam, & nimis callida, et ma-
litiosa iuris interpretatione . ex quo illud, summum
ius summa iniuria, factum est iam tritū sermone pro-
uerbiū. quo in genere etiam in Rep. multa peccantur .
ut ille, qui, cum triginta dierum essent cum hoste pa-
ctæ induciæ, noctu populabatur agros, quod dierum es-

sent pacta, non noëtium induciæ. nec noster quidem probandus est, si uerum est, Q. Fabium Labeonem, seu quem alium (nihil enim præter auditum habeo) arbitrum Nolanis, & Neapolitanis de finibus agri à senatu datum, cum ad locum uenisset, cum utrisq; separatim locutum, ne cupide quid agerent, nec appeterent, atque ut regredi, quàm progredi mallerent: id cum utrique fecissent, aliquantum agri in medio relictum est: itaque illorum fines, sicut ipsi dixerant, terminauit: in medio relictum quod erat, populo R. adiudicauit. decipere hoc quidem, non iudicare est. quocirca in omni re fugienda est talis solertia. Sunt autem quædam officia etiam aduersus eos seruanda, à quibus iniuriam acciperis: est enim ulciscendi, & puniendi modus: atq; haud scio, an satis sit eum, qui lacefferit, iniuriæ suæ poenitere, ut ipse ne quid tale posthac committat, et cæteri sint ad iniuriam tardiores. Atque in Rep. maxime conseruanda sunt iura belli: nam cum sint duo genera decertandi, unum per disceptationem, alterum per uim, cumq; illud proprium sit hominis, hoc belluarum; confuglendum est ad posterius, si uti non licet superiore. quare suscipienda quidem bella sunt ob eam causam, ut sine iniuria in pace uiuatur: parta autem uictoria conseruandi sunt ij, qui non crudeles in bello, nec immanes fuerut: ut maiores nostri Tusculanos, Aequos, Volscos, Sabinos, Hernicos in ciuitatem etiã acceperunt: at Carthaginem, & Numantiam funditus sustulerunt: nollem Corinthum: sed credo illos secutos opportunitatem loci maxime, ne posset aliquando ad bellum faciendum locus ipse adhortari. mea quidem sententia, paci, quæ

nihil habitura sit insidiarum, semper est consulendū. in quo si mihi obtemperatum esset, si non optimā, at aliquam Remp. quæ nunc nulla est, haberemus. & cū ijs, quos uideuicis; consulendum est: cum ij, qui armis positis ad imperatorum fidem confugiunt, quauis murum aries percusserit, recipiendi sunt. in quo tantopere apud nostros iustitia culta est, ut ij, qui ciuitates aut nationes deuictas bello in fidem recepissent, earū patroni essent more maiorum. ac belli quidem æquitas sanctissime fœciali populi R. iure perscripta est: ex quo intelligi potest, nullum bellum esse iustū, nisi quod aut rebus repetitis geratur, aut denunciatum ante sit, & indictum. Pompilius Imperator tenebat prouinciā, in cuius exercitu Catonis filius tyro militabat. cū autem Pompilio uideretur unam dimittere legionem, Catonis quoq; filium: qui in eadem legione militabat, dimisit. sed, cum amore pugnandi in exercitu remansisset, Cato ad Pompiliū scripsit, ut, si eum pateretur in exercitu remanere, secundo eū obligaret militiæ sacramento, quia, priore amisso, iure pugnare cum hostibus non poterat. adeo summa erat obseruatio in bello mouendo. Marci quidem Catonis senis est epistola ad Marcum filium, in qua scripsit se audisse eum missum factum esse à Consule, cū in Macedonia bello Persico miles esset. monet igitur, ut caueat, ne prælium ineat: negat enim ius esse, qui miles non sit, pugnare cū hoste. equidem illud etiam animaduerto, quod, qui proprio nomine perduellis esset, is hostis uocaretur, lenitate uerbi tristitiā rei mitigante: hostis enim apud maiores nostros is dicebatur, quē nunc peregrinū dicimus:

nico bello Regulus captus à Poenis, cum de captiuis commutandis Romam missus esset, iurassetq; se rediturum, primum, ut uenit, captiuos reddendos in senatu nõ censuit: deinde, cum retineretur à propinquis, & ab amicis, ad supplicium redire maluit, quã fidem hosti datã fallere. ac de bellicis quidem officijs satis dictum est. Meminerimus autem, & aduersus infimos iustitiã esse seruandam. est autem infima conditio & fortuna seruorum: quibus, non male præcipiunt, qui ita iubet uti, ut mercenarijs ad operam exigendam, & iusta præbenda. Cum autem duobus modis, id est aut ui, aut fraude, fiat iniuria: fraus quasi uulpeculæ, uis leonis uidetur: utrunq; alienissimum ab homine est, sed fraus odio digna maiore. totius autẽ iniustitiæ nulla capitalior est, quàm eorum, qui tum, cum maxime fallunt, id tamen agunt, ut uiri boni esse uideantur. de iustitia satis dictum est. Deinceps (ut erat propositum) de beneficentia, ac liberalitate dicatur. qua quidem nihil est naturæ hominis accommodatius: sed habet multas cautiones: uidendum est enim primum, ne obsit benignitas & ijs ipsis, quibus benigne uidebitur fieri, & cæteris: deinde, ne maior benignitas sit, quàm facultas: tum, ut pro dignitate cuique tribuatur: id enim est iustitiæ fundamentum; ad quam hæc referenda sunt omnia: nam & qui gratificatur cuiquam, quod obsit illi, cui prodesse uelle uideantur, non benefici, neque liberales, sed perniciosi assentatores iudicandi sunt; & qui alijs nocent, ut in alios liberales sint, in eadem sunt iniustitia, ut si in suã rem aliena conuertant. sunt autem multi, & quidem cupidi splendoris, & gloriæ, qui eripiunt ab alijs, quod

alij largiantur: hiq; arbitrantur se beneficos in suos amicos uisum iri, si locupletent eos quacunque ratione. id autem tantum abest ab officio, ut nihil magis officio possit esse contrarium. uidendum est igitur, ut ea liberalitate utamur, quæ prosit amicis, noceat nemini. quare L. Syllæ, & C. Cæsaris pecuniarum translatio à iustis dominis ad alienos non debet liberalis uideri: nihil enim est liberale, quod nō sit idem iustum. Alter locus erat cautionis, ne benignitas maior est, quàm facultates; quòd, qui benigniores uolūt esse, quàm res patitur, primum in eo peccāt, quòd iniuriosi sunt in proximos: quas enim copias his & suppeditari æquus est, & relinquere, eas transferunt ad alienos. inest autem in tali liberalitate cupiditas rapiendi plerunque, & auferendi per iniuriam, ut ad largiendum suppetant copię. uidere etiā licet plerosq; nō tā natura liberales, quàm quādam gloria ductos, ut benefici uideantur, facere multa, quæ ab ostentatione proficisci magis, quàm à uolūta te uideantur. talis autem simulatio uanitati est conuietior, quàm aut liberalitati, aut honestati. Tertium est propositum, ut in beneficentia delectus esset dignitatis. in quo & mores eius erunt spectandi, in quem beneficium conferetur, et animus erga nos, & cōmunitas, ac societas uitæ, & ad nostras utilitates officia ante collata. quæ ut concurrant omnia, optabile est: sin minus, plures causæ, maioresq; ponderis plus habebunt. quoniam autem uiuitur non cū perfectis hominibus, pleneq; sapientibus, sed cum ijs in quibus, præclare agitur, si sint simulacra uirtutis: etiam hoc intelligendum puto, neminem omnino esse negligendū, in quo aliqua signi-

ficatio uirtutis appareat; colendum autē esse ita quen-
que maxime, ut quisque maxime uirtutibus his leniori-
bus erit ornatus, modestia, temperantia, ac ipsa, de qua
iam multa dicta sunt, iustitia: nam fortis animus, &
magnus in homine nō perfectō, nec sapiente feruentior
plerumque est: illæ uero uirtutes bonum uirum uiden-
tur potius attingere: atque hæc in moribus consideren-
tur. De beneuolentia autem, quam quisque habeat er-
ga nos, primum illud est in officio, ut ei plurimum tri-
buamus, à quo plurimum diligimur, sed beneuolentiā
non adolescentulorum more, ardore quodam amoris,
sed stabilitate potius, & constantia iudicemus. sin erūt
merita, ut non ineunda, sed referenda sit gratia; maior
quædam cura adhibenda est: nullum enim officium re-
ferenda gratia magis necessarium est. quod si ea, quæ
acceperis utenda, maiore mensura, si modo possis, iubet
reddere Hesiodus: quidnam beneficio prouocati facere
debemus? an non imitari agros fertiles, qui multo plus
afferunt, quàm acceperunt? etenim si in eos, quos spera-
mus nobis profuturos, non dubitamus officia conferre:
quales in eos esse debemus, qui iam profuerunt? nam
cum duo genera liberalitatis sint, unum dādi beneficij,
alterum reddēdi: demus, nec ne, in nostra potestate est;
non reddere uiro bono non licet, si modo id facere pos-
sit sine iniuria. Acceptorum autem beneficiorum sunt
delectus habēdi: nec dubium, quin maximo cuiq; plu-
rimum debeat. in quo tamen in primis, quo quisq;
animo, studio, beneuolentia fecerit, ponderandum est:
multi enim multa faciunt temeritate quadam, sine iu-
dicio, uel modo, in omnes, uel repentino quodam, quæse

Ut homo, qui erranti comiter monstrat uiam,
Quasi lumen de suo lumine accendat, facit,
Ut nihilo minus ipsi luceat, cum illi accenderit.
una enim ex re satis præcipitur, ut, quidquid sine detrimento possit commodari, id tribuatur cuique, uel ignoto. ex quo sunt illa communia, non prohibere aquam profluentem; pati ab igne ignem capere; si quis uelit consilium, fidele deliberanti dare. quæ sunt ijs uilia, qui accipiunt; danti non molesta. quare & his utendum est, & semper aliquid ad communem utilitatem afferendum. sed quoniam copię paruæ singulorum sunt; eorum autem, qui his egeant, infinita est multitudo: uulgaris liberalitas referenda est ad illum Ennij finem: Nihilo minus ut ipsi luceat: ut facultas sit, qua in nostros simus liberales. Gradus autem plures sunt societatis hominum: ut enim ab illa discedatur infinitate, propior est eiusdem gentis, nationis, linguæ; qua maxime homines coniunguntur: interius etiam est, eiusdem esse ciuitatis: multa sunt enim ciuibus inter se communia, forum, fana, porticus, uia, leges, iura, iudicia, suffragia, consuetudines præterea, & familiaritates, multæq; cum multis res, rationesq; contractæ. arctior uero colligatio est, societas propinquorum: ab illa enim immensa societate humani generis, in exiguum, angustumq; concluditur. nam cum sit hoc natura commune omnium animantium, ut habeant libidinem procreandi; prima societas in ipso est coniugio, proxima in liberis, deinde una domus communia omnia. id autem est principium urbis, et quasi seminariū Reip. sequuntur fratrum coniunctiones. post consobrinorum, sobria

norumq; : qui cum una domo iam capi non possint, in
 alias domos, tanquam in colonias, exeunt. sequuntur
 connubia, & affinitates : ex quibus etiam plures pro-
 pinqui. quæ propagatio, & soboles, origo est Rerump.
 sanguinis autem coniunctio, & benevolentia deuincit
 charitate homines : magnum est enim eadem habere
 monimenta maiorum, eisdem uti sacris, sepulchra habe-
 re communia. sed omniū societatum nulla præstantior
 est, nulla firmior, quàm cum uiri boni, moribus similes,
 sunt familiaritate coniuncti. illud enim honestū, quod
 sæpe diximus, etiam si in alio cernimus, tamen nos mo-
 uet, atq; illi, in quo id inesse uidetur, amicos facit. &
 quanquam omnis uirtus nos ad se allicit, facitq; , ut di-
 ligamus, in quibus ipsa inesse uideatur ; tamē iustitia,
 & liberalitas id maxime efficit. nihil autem est ama-
 bilius, nec copulantiū, quàm morum similitudo bono-
 rum : in quibus enim eadem studia sunt, eademq; uo-
 luntates, in his fit, ut æque quisq; altero delectetur, ac
 se ipso: efficiturq; id, quod Pythagoras uult in amicitia,
 ut unus fiat ex pluribus. magna etiam illa comuni-
 tas est, quæ conficitur ex beneficijs ultro, citroq; datis, ac-
 ceptisq; : quæ mutua, & grata dum sunt, inter quos ea
 sunt, firma deuinciuntur societate. sed, cum omnia ra-
 tione, animoq; lustraueris, omnium societatum nulla est
 gratior, nulla carior, quàm ea, quæ cum Rep. est unicui-
 que nostrum. chari sunt parentes, chari liberi, propin-
 qui, familiares : sed omnes omnium charitates patria
 una complexa est. pro qua quis bonus dubitet mortē
 oppetere, si ei sit profuturus ? quo est detestabilior isto-
 rum immanitas, qui lacerarunt omni scelere patriam,

Et in ea funditus delenda occupati et sunt, et fuerunt. sed si contentio quædam, et cõparatio fiat, quibus plurimum tribuendum sit officij; principes sunt patria, et parentes, quorum beneficijs maxime obligati sumus; proximi liberi, totaq; domus, quæ spectat in nos solos, neque aliud ullum potest habere perfugium; deinceps bene conuenientes propinqui, quibus communis etiã plerunq; fortuna est. quamobrem necessaria uita præsidia debentur ijs maxime quos ante dixi: uita autem, uietũsq; communis, consilia, sermones, cohortationes, consolationes, interdũ etiam obiurgationes in amicis uigent maxime; estq; ea iucundissima amicitia, quam similitudo morum coniugauit. Sed in his omnibus officijs tribuendis, uidendum erit, quid cuiq; maxime necesse sit, et quid quisq; nobiscum, uel sine nobis aut possit consequi, aut non possit. ita non iudẽ erunt necessitudinum gradus, qui et temporum. suntq; officia, quæ alijs magis, quàm alijs, debeantur: ut, uicinum citius adiuueris in frugibus percipiendis, quàm aut fratrem, aut familiarem: at si lis in iudicio sit, propinquum potius, et amicum, quàm uicinum defenderis. hæc igitur, et talia circumspectiendi sunt in omni officio: et consuetudo, exercitatioq; capiendi, ut boni rationatores officiorum esse possimus, et addendo, deducendoq; uidere, quæ reliqui summa fiat, ex quo, quantum cuiq; debeat, intelligas. sed, ut nec medici, nec imperatores, nec oratores, quamuis artis præcepta perceperint, quidquã magna laude dignum sine usu, et exercitatione consequi possunt: sic officij conseruandi præcepta traduntur illa quidem, ut faciamus ipsi; sed rei

lum, inquit, scientia, quæ est remota à iustitia, calliditas potius, quàm sapientia est appellanda; uerum etiam animus paratus ad periculum, si sua cupiditate, non utilitate communi impellitur, audaciæ potius nomen habeat, quàm fortitudinis. itaque uiros fortes, & magnanimos, eosdem bonos, & simplices, ueritatis amicos, minimeq; fallaces esse uolumus: quæ sunt ex media laude iustitiæ. sed illud odiosum est, quòd in hac elatione, & magnitudine animi facillime pertinacia, & nimia cupiditas principatus innascitur: ut enim apud Platonem est, omnem morem Lacedæmoniorum inflammatum esse cupiditate uincendi; sic ut quisque animi magnitudine maxime excellit, ita maxime uult princeps omnium esse uel potius solus esse. difficile autem est, cū præstare omnibus cōcupieris, seruare æquitatē, quæ est iustitiæ maxime propria. ex quo fit, ut neq; disceptatione uinci se, nec ullo publico, ac legitimo iure patiantur: existuntq; in Rep. plerunque largitores, et factiosi, ut opes quammaximas consequantur, & sint ui potius superiores, quàm iustitia pares. sed quo difficilior, hoc præclarior: nullum enim est tempus, quod iustitia uacare debeat. fortes igitur, & magnanimi sunt habendi, non qui faciunt, sed qui propulsant iniuriam. uera autē, & sapiens animi magnitudo honestum illud, quod maxime natura sequitur, in factis positum, non in gloria iudicat, principemq; esse mauult, quàm uideri: etenim qui ex errore imperitiæ multitudinis pendet, hic in magnis uiris non est habendus. facillime autem ad res iniustas impellitur, ut quisque est altissimo animo & gloriæ cupido. qui locus est sanè lubricus, & uix inue-

nitur, qui laboribus susceptis, periculisq; aditis, nō qua
 si mercedem rerū gestarum desideret gloriam. Om-
 nino fortis animus, & magnus duabus rebus maxime
 cernitur: quarum una, in rerum externarum despiciē-
 tia ponitur, cum persuasum sit nihil hominē, nisi quod
 honestum, decorūq; sit, aut admirari, aut optare, aut
 expetere oportere, nulliq; neq; homini, neq; perturba-
 tioni animi, nec fortunæ succūbere. altera est res, ut,
 cum ita sis affectus animo, ut supra dixi; res geras ma-
 gnas illas quidem, et maxime utiles, sed ut uehementē
 arduas, plenasq; laborum, & periculorum, tū causa ui-
 tæ, tum multarum rerū, quæ ad uitam pertinent. ha-
 rum rerum duarum splendor omnis, et amplitudo est,
 addo etiam utilitatem, in posteriore: causa autē, et ra-
 tio efficiens magnos uiros est in priore: in ea enim est il-
 lud, quod excellentes animos, et humana contēnentes
 facit. id autem ipsum cernitur in duobus, si & solum
 id, quod honestū sit, bonum iudices, et ab omni animi
 perturbatione liber sis: nam & ea, quæ eximia ple-
 risque, et præclara uidentur, parua ducere, eaq; ratio-
 ne stabili, firmāq; cōtemnere, fortis animi, magniq; di-
 cendum est; et ea, quæ uidentur acerba, quæ multa, et
 uaria in hominū uita, fortunaq; uersantur, ita ferre,
 ut nihil à statu naturæ discedas, nihil à dignitate sapiē-
 tis, robusti animi est, magnæq; constantie. non est cu-
 tem consentaneum, qui metu non frangatur, cū fran-
 gi cupiditate; nec, qui inuictum se à labore præstiterit,
 uinci à uoluptate. quamobrem & hæc uitanda sunt,
 & pecunie fugienda cupiditas: nihil enim est tam an-
 gusti animi, tamq; parui, quàm amare diuitias: nihil

honestius, magnificentius, quàm pecuniam contemnere, si non habeas; si habeas, ad beneficentiam, liberalitatemq; conferre. cauenda est etiam gloriæ cupiditas, ut supra dixi: eripit enim libertatem, pro qua magnanimis uiris omnis debet esse contentio. nec uero imperia expetenda, ac potius non accipiēda interdum, aut depōnenda non nunquam. uacandum autem est omni animi perturbatione, tum cupiditate, & metu, tum etiā egritudine, & uoluptate animi, & iracundia, ut tranquillitas animi adsit, & securitas, quæ afferat tum constantiam, tum etiam dignitatem. multi autem & sunt, & fuerunt, qui eam, quam dico, tranquillitatem expetentes à negocijs publicis se remouerunt, ad ociumq; perfugerunt. in his & nobilissimi philosophi, longeq; principes, & quidam homines seueri, & graues nec populi, nec principum mores ferre potuerunt: uixeruntq; non nulli in agris, delectati re sua familiari. his idem propositum fuit, quod & regibus, ut ne qua re egerent, ne cui parerent, libertate uterentur, cuius proprium est sic uiuere, ut uelis. quare, cum hoc commune sit potentiæ cupidorum cum ijs, quos dixi, ociosis; alteri se adipisci id posse arbitrantur, si opes magnas habeant; alteri, si contenti sint & suo, & paruo. in quo quidem neutrorum omnino contemnēda est sententia: sed & facilior, & tutior, & minus alijs grauis, aut molesta uita est ociosorum, fructuosior autem hominum generi, & ad claritatem, amplitudinemq; aptior eorum, qui se ad Remp. & ad magnas res gerendas accommodauerunt. quapropter & his forsitan concedendum sit Remp. non capeffentibus, qui excellēti ingenio, doctrinæ sese dedi-

derunt; & ijs qui aut uoletudinis imbecillitate, aut ali qua grauiore causa impediti, à Rep. recesserunt, cū eius administrandæ potestatem alijs, laudemq; concede rent. quibus autem talis nulla est causa, si despiciere se dicant ea, quæ pleriq; admirentur, imperia, et magistra tus, his non modo non laudi, uerum etiam uitio dan dum puto. quorum iudicium in eo, quod gloriam con temnant, & pro nihilo putant, difficile factu est non probare: sed uidentur labores, & molestias tum offen sionum, tum repulsarum, quasi quandam ignominiam, timere, & infamiam: sunt enim, qui in rebus contra rijs parum sibi constant; uoluptatem seuerissime con temnant, in dolore sint molliores; gloriam negligant, frangantur infamia; atque ea quidem non satis con stant. sed ijs, qui habent à natura adiumenta rerum gerendarum, abiecta omni cunctatione adipiscendi ma gistratus sunt, & gerenda Resp. est: nec enim aliter aut regi ciuitas, aut declarari animi magnitudo potest. Capeissentibus autem Remp. nihil minus quàm philoso phis, haud scio an magis etiam, & magnificentia, et de spicientia adhibenda est rerum humanarum, quam sæ pe dico, et tranquillitas animi, atque securitas: si qui dem nec anxij futuri sunt, & cum grauitate, constan tiaq; uicturi. quæ eo faciliora sunt phillosophis, quo mi nus patent multa in eorum uita, quæ fortuna feriat; et quo minus multis rebus egent; et quia, si quid aduer si eueniat, tã grauitate cadere non possunt. quocirca nō sine causa maiores motus animorum concitantur: ma ioraq; efficienda Remp. gerentibus, quàm quietis, quo magis his & magnitudo animi est adhibenda, & ua cuitas

cuitas ab angoribus . ad rem gerendam autem qui accedit , caueat , ne id modo consideret , quàm illa res honesta sit ; sed etiam , ut habeat efficiendi facultatem . in quo ipso considerandum est , ne aut temere desperet propter ignauiam , aut nimis confidat propter cupiditatem . in omnibus autem negotijs prius , quàm aggrediare , adhibenda est preparatio diligens . sed cum plerique arbitrentur res bellicas maiores esse , quàm urbanas ; minuenda est hæc opinio : multi enim bella sæpe quæsiuerunt propter gloriæ cupiditatem : atque in magnis animis , ingenijsq; id plerunque contingit , eoq; magis si sunt ad rem militarem apti , & cupidi bellorum : gerendorum . uere autem si uolumus iudicare , multæ res extiterunt urbanae maiores , clarioresq; , quàm bellicæ . quamuis enim Themistocles iure laudetur , & sit eius nomen , quàm Solonis , illustrius ; citeturq; Salamis clarissimæ testis uictoriæ , quæ anteponatur consilio Solonis , ei , quo primum constituit Arcopagitas : non minus præclarum hoc , quàm illud , iudicandum est : illud enim semel profuit , hoc semper proderit ciuitati : hoc consilio leges Atheniensium , hoc maiorum instituta seruantur . & Themistocles quidem nihil dixerit , in quo ipse Arcopagum adiuuert : at ille adiuuit Themistoclem : est enim bellum gestum consilio senatus eius , qui à Solone erat constitutus . licet eadem de Pausania , Lysandroq; dicere . quorum rebus gestis quanquam imperium Lacedæmoniorum dilatatum putatur , tamen ne minima quidem ex parte Lycurgi legibus , & disciplinæ conferendi sunt : quin etiam ob has ipsas causas & paratiores habuerunt exercitus , & fortiores . mihi quidem neque , pueris nobis ,

M. Scaurus C. Mario, neque, cum uersaremur in Rep. Q. Catulus Cn. Pompeio cedere uidebatur: parua enim sunt foris arma, nisi est consilium domi. nec plus Africanus: singularis & uir, & imperator, in excidenda Numantia Reip. profuit, quam eodem tempore P. Nasica priuatus, cum Ti. Gracchum interemit. quanquam hæc quidem res non solum ex domestica est ratione: attingit enim & bellicam, quoniam uir, manuq; confecta est. sed tamen id ipsum gestum est consilio urbano sine exercitu. illud autem optimum est, in quo me inuadi solere ab inuidis, & improbis audio:

Cedant arma togæ: concedat laurea lingue.

ut enim alios omittam, nobis Remp. gubernantibus nonne togæ arma cessere? neque enim in Rep. periculum fuit grauius unquam, nec maius otium. ita consilijs, diligentiaq; nostra celeriter de manibus audacissimorum ciuium delapsa arma ipsa ceciderunt. quæ res igitur gesta est unquam in bello tanta? quis triumphus conferendus? licet enim Marce fili apud te gloriari, ad quem & hæreditas huius gloriæ, & factorum imitatio pertinet. mihi quidem certe uir abundans bellicis laudibus Cn. Pompeius multis audientibus hoc tribuit, ut diceret frustra se tertium triumphum deportaturum fuisse, nisi meo in Rep. beneficio, ubi triumpharet, esset habiturus. sunt ergo domesticæ fortitudines non inferiores militaribus: in quibus plus etiam, quam in his, operæ, studijq; ponendum est: omnino enim illud honestum, quod ex animo excelso, magnificoq; querimus, animi efficitur, non corporis uiribus. exercendum tamen est corpus, & ita afficiendum, ut obedire consilio, rationiq; possit in

exequendis negotijs, & in labore tolerando. honestum autem id, quod exquirimus, totum est positum in animi cura, & cogitatione: in quo non minorem utilitatem afferunt, qui rogati Reip. præsunt, quàm qui bella gerunt. itaque eorum consilio sæpe aut non suscepta, aut confecta bella sunt, non nunquam etiam illata, ut M. Catonis consilio bellum tertium Punicum: in quo etiam mortui ualuit auctoritas. quare expetenda quidem magis est decernendi ratio, quàm decertandi fortitudo: sed cauendum, ne id bellandi magis fuga, quàm utilitatis ratione faciamus. bellum autem ita suscipiatur, ut nihil aliud, nisi pax quæ sita uideatur. fortis uero animi, & constantis est non perturbari in rebus asperis, nec tumultuantem de gradu deijci, ut dicitur; sed præsens animi uti consilio, nec à ratione discedere. quanquam hoc animi, illud etiam ingenij magni est, præcipere cogitatione futura, & aliquanto ante constituere, quid accidere possit in utranque partem; & quid agendum sit, cum quid euenit; nec committere aliquid, ut aliquando dicendum sit, non putaram. hæc sunt opera magni animi, & excelsi, & prudentia, consilioq; fidentis. temere autem in acie uersari, & manu cum hoste configere, immane quiddam, & belluarum simile est. sed, cum tempus est, necessitasq; postulat, decertandum manu est, & mors seruituti, turpitudiniq; anteponenda. De euertendis autem, diripiendisq; urbibus ualde illud considerandum est, ne quid temere, ne quid crudeliter fiat. idq; est uiri magnanimi, rebus agitatæ punire fontes, multitudinem conseruare, in omni fortunæ recta, atque honesta retinere: ut enim sunt (quemadmodum supra dixi) qui urbanis rebus bel-

licas anteponunt; sic reperias multos, quibus periculosa, & callida consilia quietis cogitationibus splendidiora, & maiora uideantur. nunquam omnino periculi fuga committendum est, ut imbelles, timidiq; uideamur: sed fugiendum etiam illud, ne offeramus nos periculis sine causa: quo nihil potest esse stultius. quapropter in aduersis periculis consuetudo imitanda medicorum est, qui leuiter egrotantes leuiter curant, grauioribus autem morbis periculosas curationes, & ancipites adhibere coguntur. quare in tranquillo tempestatem aduersam optare, dementis est: subuenire autem tempestati quauis ratione, sapientis, eoq; magis, si plus adipiscere re explicata boni, quam addubitata mali. periculosa autem rerum actiones partim ijs sunt, qui eas suscipiunt; partim Reip. itemq; alij de uita, alij de gloria, & beneuolentia ciuium in discrimen uocantur. promptiores igitur debemus esse ad nostra pericula, quam ad communia, dimicareque paratius de honore, & gloria, quam de ceteris commodis. inuenti autem multi sunt, qui non modo pecuniam, sed uitam etiam profundere pro patria parati essent; ijsdem gloriae iacturam ne minimam quidem facere uellent, ne Rep. quidem postulante: ut Callicratidas, qui, cum Lacedaemoniorum dux esset Peloponnesiaco bello, multaue fecisset egregie, uertit ad extremum omnia, cum consilio non paruit eorum, qui classem ab Arginnusis remouendam, nec cum Atheniensibus dimicandum putabant. quibus ille respondit; Lacedaemonios, classe illa amissa, aliam parare posse; se fugere sine suo dedecore non posse. atque haec quidem Lacedaemonijs plaga mediocris fuit, illa pestifera, qua, cum Cleom

bro tus inuidiam timens , temere cum Epaminunda con-
flixisset , Lacedæmoniorum opes corruerunt . quanto

Q. Maximus melius? de quo Ennius :

Vnus homo nobis cunctando restituit rem :

Non ponebat enim rumores ante salutem .

Ergo postq; , magisq; ulri nunc gloria claret .

quod genus peccandi vitandum est etiam in rebus urba-
nis : sunt enim , qui , quod sentiunt , etiam si optimum sit ,
tamen inuidiæ metu non audent dicere . Omnino , qui
Reip. præfuturi sunt , duo Platonis præcepta teneant :
unum , ut utilitatem ciuium sic tueantur , ut , quidquid
agunt , ad eam referant , obliti commodorum suorum :
alterum , ut totum corpus Reip. curent ; ne , dum par-
tem aliquam tueantur , reliquias deserant : ut enim tute-
la , sic procuratio Reip. ad utilitatem eorum , qui com-
missi sunt , non ad eorum , quibus commissi , gerenda est .
qui autem parti ciuium consulunt , partem negligunt ,
rem perniciosissimam in ciuitatem inducunt , seditionem ,
atque discordiam : ex quo euenit , ut alij populares , alij
studiosi optimi cuiusque uideantur , pauci uniuersorum .
hinc apud Athenienses magnæ discordiæ ortæ , in nostra
Rep. non solum seditionis , sed pestifera etiam bella ciui-
lia . quæ grauis & fortis ciuis , in Rep. dignus principa-
tu fugiat , atque oderit , tradetq; se totum Reip. neque opes ,
aut potentiam consecrabitur , totamq; eam sic tuebitur ,
ut omnibus consulat . nec uero criminibus falsis in odium
aut inuidiam quenquam uocabit : omninoq; ita iustitiæ ,
honestatiq; adhærescet , ut , dum eam conseruet , quamuis
grauiter offendant , mortem appetat potius , quã deserat illa ,
quæ dixi . miserrima est omnino ambitio , honorumq;

contentio. de qua præclare apud eundem est Platonem : similiter facere eos, qui inter se contenderent, uter potius Remp. administraret ; ut, si nautæ certarent, quis eorum potissimum gubernaret. idemq; præcepit, ut eos aduersarios existimemus, qui arma contra ferant ; non eos, qui suo iudicio tueri Remp. uelint : qualis fuit inter P. Africanum, & Q. Metellum sine acerbitate dissensio. Nec uero audiendi, qui grauius irascendum inimicis putant, idq; magnanimi, & fortis uiri esse censent. nihil enim laudabilius, nihil magno, & præclaro uiro dignius placabilitate, atq; clementia. In liberis uero populis, & iuris æquabilitate, exercenda etiam est facilitas, & altitudo animi quæ dicitur ; ne, si irascamur aut intempestiue accedentibus, aut impudenter rogantibus, in morositatem inuilem, & odiosam incidamus. & tamen ita probanda est mansuetudo, atque clementia, ut adhibeatur Reipub. causa seueritas, sine qua administrari ciuitas non potest. omnis autem & animaduersio, & castigatio contumelia uacare debet, neque ad eum, qui punit aliquem, aut uerbis castigat, sed ad Reipub. utilitatem referri. Cauendum est etiam, ne maior poena, quam culpa sit ; &, ne iisdem de causis alij plectantur, alij ne appellentur quidem. Prohibenda autem maxime est ira in puniendo : nunquam enim, iratus qui accedet ad poenam, mediocritatem illam tenebit ; quæ est inter nimium, & parum : quæ placet peripateticis, & recte placet, modo ne laudarent iracundiam, & dicerent utiliter à natura datam. illa uero omnibus in rebus repudianda est : optandumq; , ut ij, qui præsumunt Reipub. legum similes sint : quæ ad puniendum non iracundia,

sed æquitate ducuntur . Atque etiam in rebus prosperis , & ad uoluntatem nostram fluentibus , superbiam magnopere , fastidium , arrogantiamq; fugiamus : nam ut aduersas res , sic secundas immoderate ferre , leuitas est : præclaraque est æquabilitas in omni uita , & idem semper uultus , eademq; frons : ut de Socrate , item de Caio quoque Lælio accepimus . Philippum quidem Macedonum Regem , rebus gestis , & gloria superatum à filio , facilitate uero , & humanitate uideo superiorem fuisse : itaque alter semper magnus , alter sæpe turpissimus fuit : ut recte præcipere uideantur , qui monent , ut , quanto superiores simus , tanto nos summissius geramus . Panætius quidem auditorem Africanum , & familiarem suum solitum ait dicere ; ut equos propter crebras contentiones præliorum ferocitate exultantes domitoribus tradere soleant , ut his facillioribus possint uti , sic homines secundis rebus effrenatos , sibiq; præfidentes tanquam in gyrum rationis , & doctrinæ duci oportere , ut perspicerent rerum humanarum imbecillitatem , uarietatemq; fortunæ . Atque etiam in secundissimis rebus maxime est utendum consilio amicorum : hisq; etiam maior , quàm ante , tribuenda est auctoritas : iisdemq; temporibus cauendum est , ne assentatoribus patefaciamus aures , nec adulari nos sinamus . in quo falli facile est : tales enim nos esse putamus ; ut iure laudemur : ex quo nascuntur innumerabilia peccata , cum homines inflati opinionibus , turpiter irridentur , & in maximis uersantur erroribus . sed hæc quidem hæc teneamus . illud autem sic est iudicandum , maximas geri res , & maximi animi ab ijs , qui Remp. regant , quod eorum

administratio latissime pateat, ad plurimosq; pertineat. esse autem magni animi, & fuisse multos, etiam in ulta ociosa, qui aut inuestigarent, aut conarentur magna quadam seseq; suarum rerum finibus continerent; aut interiecti inter philosophos, & eos, qui Remp. administrarent, delectarentur re sua familiari, non eam quidem omni ratione exaggerantes, neque excludetes ab eius usu suos, potiusq; & amicis impartientes, & Reip. si quando usus esset. quæ primum bene parata sit, nulloq; turpi quæstu, neque odioso: tum quamplurimis, modo dignis, se utilem præbeat: deinde augeatur ratione, diligentia, parsimonia: nec libidini potius, luxuriæq;, quàm liberalitati, & beneficentiæ pateat. hæc præscripta seruantes licet magnifice, grauiter, animoseque uiuere, atque etiam simpliciter, fideliter, uitæq; hominum amice sequitur, ut de illa reliqua parte honestatis dicendum sit, in qua uerecundia, & quasi quidam ornatus uitæ, temperantia & modestia, omnisq; sedatio perturbationum animi, & rerum modus cernitur, hoc loco continetur id, quod dici latine decorum potest: græce enim πρεπον dicitur. huius uis est ea, ut ab honesto non queat separari: nam &, quod decet, honestum est; &, quod honestum est, decet. qualis autem differentia sit honesti, & decori, facilius intelligi, quàm explanari potest: quidquid enim est, quod deceat, id tum apparet, cum antegressa est honestas: itaque non solum in hac parte honestatis, de qua hoc loco differendum est, sed etiam in tribus superioribus, quid deceat, apparet: nam & ratione uti, atque oratione prudenter; & agere, quod agas, considerate; omniq; in re, quid sit ueri, uidere, & tueri decet: con-

traq; falli, errare, labi, decipi tam dedecet, quam delirare,
 & mente captum esse. & iusta omnia decora sunt; in-
 iusta omnia contra, ut turpia sic indecora. similis est ra-
 tio fortitudinis: quod enim uiriliter, animoq; magno
 fit, id dignum uiro, & decorum uidetur; quod contra,
 id ut turpe, sic indecorum: quare pertinet quidem ad
 omnem honestatem hoc, quod dico, decorum, & ita per-
 tinet, ut non recondita quadam ratione cernatur, sed sit
 in promptu: est enim quiddam, idq; intelligitur in omni
 uirtute, quod deceat; quod cogitatione magis à uirtute
 re potest, quam re separari. ut enim uenustus, & pul-
 chritudo corporis secerni non potest à ualitudine; sic
 hoc, de quo loquimur, decorum, totum quidem illud est
 cum uirtute confusum, sed mente, & cogitatione distin-
 guitur. est autem eius descriptio duplex: nam & gene-
 rale quoddam decorum intelligimus, quod in omni ho-
 nestate uersatur; & aliud huic subiectum, quod perti-
 net ad singulas partes honestatis: atque illud superius sic
 ferè definiti solet: decorum id esse, quod consentaneum
 sit hominis excellentiæ in eo, in quo natura eius à reliquis
 animantibus differat. quæ autem pars subiecta generi
 est, eam sic definiunt, ut id decorum esse uelint, quod ita
 naturæ consentaneum sit, ut in eo moderatio, & tempe-
 rantia appareat cum specie quadam liberali. hæc ita in-
 telligi a philosophis, possumus existimare ex eo decoro,
 quod poetæ sequuntur, de quo alio loco plura dici solent.
 sed tum seruare illud poetæ dicimus, quod deceat, cum
 id, quod quaque persona dignum est, & fit, & dicitur:
 ut, si aut Aeacus, aut Minos diceret, ODERINT;
 dum metuant; aut,

NATIS sepulcrum ipse est parens; indecorum uideretur, quod eos fuisse iustos accepimus. at Atreo dicente, plausus excitantur: est enim digna persona oratio. sed poeta, quid quenque deceat, ex persona iudicabunt: nobis autem personam imposuit ipsa natura, magna cum excellentia, præstantiaq; animantium reliquorum. quocirca poeta in magna uarietate personarum, etiam uictosis quid conueniat, et quid deceat, uidebunt: nobis autem cum à natura constantia, moderatio- nis, temperantia, uerecundia partes data sint, cumq; eadem natura doceat non negligere, quemadmodum nos aduersus homines geramus; efficitur, ut et illud, quod ad omnem honestatem pertinet, decorum, quàm late fuis- sum sit, appareat, et hoc, quod spectatur in uno quoque genere uirtutis: ut enim pulchritudo corporis apta com- positione membrorum mouet oculos, et delectat hoc ip- so, quod inter se omnes partes cum quodam lepore consen- tiunt; sic hoc decorum, quod elucet in uita, mouet appro- bationem eorum, quibuscum uiuitur, ordine, et constan- tia, moderatione dicti- rum omnium, atque factorum. ad- hibenda est igitur quædam reuerentia aduersus homi- nes, et optimi cuiusq;, et reliquorum: nam negligere, quid de se quisque sentiat, non solum arrogantis est: sed etiam omnino dissoluti. est autem, quod differat in om- ni ratione habenda, inter iustitiam, et uerecundiam. iustitiæ partes sunt, non uiolare homines: uerecundia, non offendere: in quo maxime perspicitur uis decori. his igitur expositis, quale sit id quod decere dicimus, in- tellectum puto. Officium autem, quod ab eo ducitur, hanc primum habet uiam, quæ deducit ad cōuenientiam

conseruationemq; naturæ : quam si sequemur ducem ,
 nunquam aberrabimus; sequemurq; & id, quod acutum,
 & perspicax natura est , & id quod ad hominum socie-
 tatem accommodatum ; & id, quod uehemens, atq; for-
 te. sed maxima uis decori in hac inest parte , de qua dis-
 sputamus , neque enim solum corporis , qui ad naturam
 apti sunt, sed multo etiam magis animi motus probandt,
 qui item ad naturam accommodati sunt. Duplex est enim
 uis animorum ; atq; naturæ. una pars in appetitu posita
 est ; quæ est opem græce ; quæ hominem huc, & illuc ra-
 pit : altera in ratione ; quæ docet, & explanat, quid fa-
 ciendum, fugiendumq; sit. ita fit, ut ratio præsit, appeti-
 tus uero obtemperet. omni autem actio uacare debet tem-
 peritate, & negligentia; nec uero agere quidquam, cuius
 non possis causam probabilem reddere : hæc est enim fe-
 re descriptio officij. Efficiendum autem est, ut appetitus ra-
 tioni obdiant, eamq; neq; præcurrant, nec propter pigri-
 tiam, aut ignauiam deserant ; finiq; tranquilli, atq; omni
 perturbatione animi careant. ex quo elucebit omnis con-
 stantia, omnisq; moderatio. nam qui appetitus longius eu-
 gantur, et tanquã exultantes siue cupiendo, siue fugiendo
 non satis à ratione retinentur, hi sine dubio finem, et mo-
 dum transeunt : relinquunt enim, & abiectunt obedi-
 tiam, nec rationi parent, cui sunt subiecti lege naturæ.
 à quibus non modo animi perturbantur, sed etiam corpo-
 ra. licet ora ipsa cernere iratorum, aut eorum, qui aut li-
 bidine aliqua, aut metu commoti sunt, aut uoluptate ni-
 mila gestiunt : quorum omnium uultus, uoces, motus, sta-
 tusq; mutantur. ex quibus illud intelligitur (ut ad offi-
 cij formam reuertamur) appetitus omnes contrahendo, se-

danāoq; excitandāq; esse animaduersionem, & diligē-
tiam, ut ne quid temere, ac fortuito, inconsiderate, ne-
gligenterq; agamus: neque enim ita generati à natura
sumus, ut ad ludum, & iocum facti esse uideamur, sed ad
seueritatem potius, & ad quēdam studia grauiora, atque
maiora. ludo autem, & ioco uti illis quidem licet, sed, si-
cut somno & quietibus ceteris, tum, cū grauib; serijsq;
rebus satisfecerimus. ipsumq; genus iocandi non profu-
sum, nec immodestum, sed ingenuum, & facetum esse de-
bet: ut enim pueris non omnem licentiam ludēdi damus,
sed tam, quæ ab honestatis actionibus non sit aliena; sic
in ipso ioco aliquod probi ingenij lumen eluceat. duplex
omnino est iocandi genus: unum illiberale, petulans, flagi-
tiosum, obscœnum: alterum elegans, urbanum, ingenio-
sum, facetum. quo genere non modo Plautus noster, &
Atticorum antiqua comœdia, sed etiam philosophorum
Socraticorum libri referti sunt: multaque multorum fa-
cete dicta; ut ea, quæ à sene Catone sunt collecta, quæ uo-
cantur ἀποφθέγματα. facilis igitur est distinctio ingenui,
& illiberalis ioci. alter est, si tempore fit, ac remisso ani-
mo, libero dignus: alter ne homine, quidem, si rerum tur-
pitudini adhibetur uerborum obscœnitas. ludendi etiam
est quidam modus retinendus, ut ne nimis omnia pro-
fundamus, elatiq; uoluptate in aliquam turpitudinem
delabamur. suppeditant autem & campus noster, & stu-
dia uenandi honesta exempla ludendi. sed pertinet ad
omnem officij quæstionem semper in promptu habere,
quantum natura hominis pecudibus, reliquisq; bestijs an-
tecedat: illæ enim sentiunt, nisi uoluptatem, ad eamq; fe-
runtur omni impetu: hominis autem mens discendo ali-

tur, & cogitando semper aliquid aut inquirere, aut agere, uidendiq; , & audiendi delectatione ducitur. quin etiam, si quis est paulo ad uoluptates propensior, modo ne sit ex pecudum genere (sunt enim quidam homines non re, sed nomine) sed si quis est paulo erectior, quamuis uoluptate capiatur, occultat, & dissimulat appetitum uoluptatis, propter uerecundiam. ex quo intelligitur corporis uoluptatem non satis esse dignam hominis præstantia, eamq; contemni, & reijci oportere: sin sit quispiam, qui aliquid tribuat uoluptati, diligenter ei tenendum esse modum eius fruendæ. itaque uictus, cultusq; corporis ad ualitudinem referantur, & ad uires, non ad uoluptatem. atque etiam, si considerare uolumus, quæ sit in natura excellentia, & dignitas, intelligemus, quàm sit turpe diffuere luxuria, & delicate, ac molliter uiuere; quamq; honestum, parce, continenter, seuerè, sobrieq;. intelligendum est etiam, duabus quasi nos à natura indutos esse personis: quarum una est communis, ex eo, quòd omnes participes sumus rationis, præstantiæq; eius, quæ antecellit nobis bestiis, à quâ omne honestum, decorumq; trahitur, & ex qua ratio inueniendi officij exquiritur: altera autem, quæ proprie singulis est tributa: ut enim in corporibus magnæ dissimilitudines sunt (alios enim uidemus uelocitate ad cursum, alios uiribus ad luctandum ualere; itemq; in formis. alijs dignitatem inesse, alijs uenustatem) sic & in animis existunt etiam maiores uarietates. erat in L. Crasso, & L. Philippo multus lepos, maior etiam, magisq; de industria in C. Casare L. filio. at iisdem temporibus in M. Scauro, & in M. Druso adolescente singularis seueritas, in C. Lælio multa hilaritas, in eius



familiari Scipione ambitio maior, uita tristior. de Græcis autem dulcem & facetum, festiuiq; sermonis, atque in omni ratione simulatorem, quem εἰκων Græci nominauerunt, Socratem accepimus; contra Pythagoram, & Periclem summam auctoritatem consecutos sine ulla hilaritate. callidum Annibalem ex Pœnorum, ex nostris ducebatur. Q. Maximum accepimus, facile celare, tacere, dissimulare, insidiari, præripere hostium consilia. in quo genere Græci Themistoclem Atheniensem, & Pheræum Iasonem ceteris anteponunt. in primisq; uersutum, & callidum factum Solonis: qui, quo & tutior uita eius esset, & plus aliquanto Reip. prodesset, furere se simulauit. sunt his alij multum dispares, simplices, & aperti, qui nihil ex occulto, nihil ex insidijs agendum putant, ueritatis cultores, fraudis inimici: itemq; alij, qui quiduis perpetiantur, cuius deseruiant, dum, quod uelint, consequantur: ut Syllam, & M. Crassum uidebamus. quo in genere uersutissimum, & patientissimum Lacedæmonium Lysandrum accepimus; contraq; Callicratidam, qui præfectus classis proximus post Lysandrum fuit. itemq; in sermonibus, alium quidem uidemus, quanuis præpotens sit, efficere, ut unus de multis esse uideatur, quod in Catulo & in patre, & in filio, idemq; & in Q. Mutio Mancino uidimus, audiui & ex maioribus natu hoc idem fuisse in P. Scipione Nasica; contraq; patrem eius, illum, qui Tiberij Gracchi conatus perditos uindicauit, nullam comitatem habuisse sermonis; nec non Xenocratem quidem seuerissimum philosophorum, ob eamq; rem ipsam magnum, clarumq; fuisse. innumera uero alie dissimilitudines sunt naturæ, morumq; mi-

nime tamen uituperandorum . admodum autem tuenda
sunt sua cuique non uitiosa, sed tamen propria, quo facis-
lius decorum illud, quod quærimus, retineatur : sic enim
est faciendum, ut contra naturam uniuersam nihil contē-
damus ; ea tamen conseruata, propriam naturam sequa-
mur ; ut, etiam si sint alia grauiora, atque meliora, tamē
nos studia nostra naturæ regula metiamur : neque enim
naturæ attinet repugnare, nec quidquam sequi, quod as-
sequi nequeas . ex quo magis emergit, quale sit decorum
illud : ideo quia nihil decet inuita (ut aiunt) Minerua,
id est aduersante, & repugnante natura . omnino, si quid-
quam est decorum, nihil est profecto magis, quàm equabi-
litas uniuersæ uitæ, tum singularum actionum : quam
conseruare non possis, si aliorum naturam imiteris, omit-
tas tuam : ut enim sermone eo debemus uti, qui notus est
nobis, ne, ut quidam, græca uerba inculcantes, iure opti-
mo rideamur ; sic in actiones, omnemq; uitam nullam di-
screpantiam conferre debemus . atque hæc differentia na-
turarum tantam habet uim, ut non nunquam mortem si-
bi ipsi alius consciscere debeat, alius in eadem causa non
debeat : non enim alia in causa M. Cato fuit, alia cæteri,
qui se in Africa Cæsari tradiderunt : atqui cæteris forsi-
tan uitio datum esset, si se interemissent, propterea quod
eorum uita lenior, & mores fuerant faciliores : Catoni
autem, cum incredibilem tribuisset natura grauitatem,
eamq; ipse perpetua constantia roborasset, semperq; in pro-
posito, susceptoq; consilio permansisset, moriendum po-
tius, quàm tyranni uultus aspiciendus, fuit . quàm mul-
ta passus est Vlysses in illo errore diuturno, cum & mu-
lieribus (si Circe, & Calypso mulieres appellandæ sunt)

similitu-
do

*folam
nis aiax*

Inseruiret, & in omni sermone omnibus affabilem se esse
 uellet; domi uero & contumelias seruorum, ancilla-
 rumq; pertulit, ut ad id aliquando, quod cupiebat, perue-
 niret: at Ajax, quo animo traditur, millies oppetere mor-
 tem, quàm illa perpeti ab alio maluisset. quæ contem-
 plantes expendere oportebit, quid quisq; habeat sui; eaq;
 moderari, nec uelle experiri, quàm se aliena deceant: id
 enim quenque decet, quod est cuiusque suum maxime.
 suum igitur quisq; noscat ingenium, acremq; se & ui-
 tiorum, & bonorum suorum iudicem præbeat; ne sce-
 nici plus, quàm nos, uideantur habere prudentiæ: illi
 enim non optimas, sed sibi accommodatissimas fabulas
 eligunt: qui enim uoce freti sunt, Epigonos, Medeamq;
 qui gestu, Menalippam, Clytemnæstram: semper Rupi-
 lius, quem ego memini, Antiopam, non sæpe Aesopus Aia-
 cem. ergo histrio hoc uidebit in scena, quod non uidebit
 sapiens in uita? ad quas igitur res aptissimi erimus, in
 ijs potissimum elaborabimus. sin aliquando necessitas nos
 ad ea detruserit, quæ nostri ingenij non erunt: omnis ad-
 hibenda erit cûra, meditatio, diligentia, ut ea si non deco-
 re, at quâminimū indecore facere possimus: nec tam
 est entendum, ut bona, quæ nobis data non sunt, sequa-
 mur, quàm ut uitia fugiamus. Ac duabus his personis,
 quas supra dixi, tertia adiungitur; quam casus aliquis,
 uel tempus imponit: quarta etiam, quam nobismet ipsis
 iudicio nostro accommodabimus: nam regna, imperia, no-
 bilitates, honores, diuitiæ, opes, eaq; quæ sunt his contra-
 ria, in casu sita, temporibus gubernantur; ipsi autem quâ
 personam gerere uelimus, à nostra uoluntate profiscisc-
 tur: itaque se alij ad philosophiam, alij ad ius ciuile, alij
 ad eloquentiam

ad eloquentiam applicant, ipsarumq; uirtutum in alia alius mauult excellere: quorum uero patres, aut maiores in aliqua gloria praestiterunt, eorum pleriq; in hoc genere laudis student excellere; ut Q. Murius P. filius in iure ciuili, Pauli filius Africanus in re militari. qui dam autem ad eas laudes, quas à patribus acceperunt, addunt aliquam suam; ut hic idem Africanus eloquentia cumulauit bellicam gloriam: quod idem fecit Timotheus Cononis filius; qui, cum belli laude non inferior fuisset quàm pater, ad eam laudem, doctrinae, et ingenij gloriam adiecit. fit autem interdum, ut non nulli ommissa imitatione maiorum, suum quoddam institutum consequantur: maximeq; in eo plerunq; elaborant ij, qui magna sibi proponunt, obscuris orti parētibus. haec igitur omnia, cum quaerimus quid deceat, cōplecti animo, et cogitatione debemus. In primis autem constituendum est, quos uos, et quales esse uelimus, et in quo genere uitae. quae deliberatio est omnium difficillima: ineunte enim adolescentia, cū inest maxima imbecillitas consilij, tunc id sibi quisq; genus etatis degenda constituit, quod maxime adamauit: itaq; ante implicatur aliquo certo genere, cursuq; uiuendi quàm potuit, quod optimum esset, iudicare. nam quod Hercules Prodicus dicit (ut est apud Xenophontem) cum primum pubesceret, quod tempus à natura ad deligendū quam quisque uiam uiuendi sit ingressurus, datū est, exisse in solitudinem atq; ibi sedētem diu secum, multumq; dubitasse, cū duas cerneret uias, unam uoluptatibus, alteram uirtutis, ueram ingredi melius esset: hoc Herculi Iouis sattu edito potuit fortasse cōtingere; no-

bis non item, qui imitamur, quos cuique uisum est, atque ad eorum studia, institutaque impellimur. plerumque autem parentum præceptis imbuti, ad eorum consuetudinem, moremque deducimur. alij multitudinis iudicio feruntur; quæque maiori parti pulcherrima uidentur, ea maxime exoptant. non nulli tamen siue felicitate quadam, siue bonitate naturæ, siue parentum disciplina, re etiam uitæ secuti sunt uiam. illud autem maxime uerum genus eorum, qui aut eccellente ingenij magnitudine, aut præclara eruditione, atque doctrina, aut utraque re ornati, spatium deliberandi habuerunt, quem potissimum uitæ cursum sequi uellent. in qua deliberatione ad suam cuiusque naturam cōsiliū est omne reuocandum: nam cum in omnibus, quæ aguntur, ex eo modo, quo quisque natus est, ut supra dictum est, quid deceat, exquirimus; tum in tota uitæ constituenda multo est eius rei cura maior adhibenda, ut cōstare in uitæ perpetuitate possimus nobismet ipsis, nec in ullo officio claudicare. ad hanc autem rationem quoniam maximā uim natura habet, fortuna proximam, utriusque omnino ratio habenda est in deligendo genere uitæ, sed naturæ magis: multo enim et firmitior est, et constantior: ut fortuna non nunquam ipsa mortalis cum immortali natura pugnare uideatur. qui igitur ad naturæ suæ non uictosæ genus, consiliū uitæ omne contulerit, is cōstantiam teneat: id enim maxime decet. nisi forte se errasse intellexerit in deligendo genere uitæ. quod si acciderit (potest autem accidere) faciendæ morū, institutorumque mutatio est. eam igitur mutationem, si tempora adiuuabunt, facilius, cōmodiusque faciemus, sin minus sensim

erit, pedetentimq; facienda: ut amicitias, quæ minus delectent, & minus probentur, magis decere censerent sapientes sensim diffuere, quàm repente præcidere: commutato autem genere uitæ, omni ratione curandum est, ut id bono cõsilio fecisse uideamur. Sed quoniam paulo ante dictum est, imitandos esse maiores: primum illud exceptum sit, ne uitia sint imitanda: deinde, si natura non ferret, ut quædam imitari possint; ut superioris Africanus filius, qui hunc paulo natum adoptauit, propter infirmitatem uoletudinis non tam potuit patris similis esse, quàm ille fuerat: sui: si igitur non poterit siue causas defensitare siue populum concionibus tenere, siue bella gerere; illa tamen præstare debet, quæ erunt in ipsius potestate, iustitiã, fidem, liberalitatem, modestiam, temperantiam; quo minus ab eo id, quod desit, requiratur. optima autem hæreditas à patribus traditur liberis, omniq; patrimonio præstantior, gloria uirtutis, rerumq; gestarum: cui dedecori esse, nefas, & uitium iudicandum est. Et quoniam officia non eadem disparibus ætatibus tribuuntur, aliaq; sunt iuuenum, alia seniorum: aliquid etiam de hac distinctione dicendum est. Est igitur adolescentis, maiores natu uereri, ex hisq; eligere optimos, & probatissimos, quorũ cõsilio, atq; auctoritate nitatur: ineuntis enim ætatis inscitia, senum constituenta, & regenda prudentia est. maxime autem hæc ætas à libidinibus arcenda est, exercendaq; in labore, patientiaq; & animi, & corporis, ut eorum & in bellicis, & ciuilibus officijs uigeat industria. atque etiam cum relaxare animos, & dare se iucunditati uolent, caueant intemperatiam, meminerint uerecundiæ: quod erit fa-

cilius, si eiusmodi quoque rebus maiores natu interesse
 uelint. Senibus autem labores corporis sunt minuendi,
 exercitationes animi etiam augendae uidentur: danda
 uero opera, ut amicos, et iuuentutem, et maxime Rēp.
 consilio, et prudentia quamplurimum adiuuent. nihil
 autem magis cauendum est senectuti, quam ne lāguo
 ri, desidiaque se dedat. luxuria uero cū omni aetate tur
 pis, tum senectuti foedissima est. sin autem et libidinū
 intemperantia accesserit, duplex malum est, quod et ipsa
 senectus cōcipit dedecus, et facit adolescentium impu
 dentio rem intemperantiam. Ac ne illud quidem alie
 num est, de magistratum, de priuatorū; de ciuium, de
 peregrinorum officiis dicere. Est igitur proprium mu
 nus magistratus, intelligere, se gerere personam ciuita
 tis, debereque eius dignitatatem, et decus sustinere, serua
 re leges, iura describere, ea fidei suae cōmissa meminisse.
 Priuatū autem oportet aequo, et paricum ciuibus iu
 re uiuere, neque summissum, et abiectum, neque se effe
 rentem; tum in Rep. ea uelle, quae tranquilla, et hone
 sta sint: talem enim et sentire, et bonum ciuē dicere
 solemus. Peregrini autem et incolae officium est, nihil
 praeter suum negotiū agere, nihil de alio inquirere, mi
 nimeque in aliena esse Rep. curiosum. ita fere officia re
 perientur, cum quaeretur, quid deceat, et quid aptū sit
 personis, temporibus, aetatibus. nihil est autē, quod tam
 deceat, quam in omni re gerenda, consilioque capiēdo ser
 uare constantiam. Sed quoniam decorum illud in om
 nibus factis, et dictis, in corporis denique motu, et sta
 tu cernitur, idque positum est in tribus rebus, formosita
 te, ordine, ornatu ad actionem apto (difficilius ad elo-

quendum, sed satis erit intelligi) in his autē tribus continetur cura etiam illa, ut probemur ab ijs, cum quibus, & apud quos uiuamus: his quoq; de rebus pauca dicantur. Principio, corporis nostri magnam natura ipsa uidetur habuisse rationem: quæ formam nostrā, reliquamq; figuram, in qua esset species honesta, eā posuit in promptu; quæ autem partes corporis ad naturæ necessitatem datæ aspectum esset deformem habituræ, atq; turpem, eas contextit, atque abdidit. hanc naturæ tam diligentem fabricam imitata est hominū uerecundia: quæ enim natura occultauit, eadē omnes, qui sana mente sunt, remouent ab oculis; ipsiq; necessitati, dant operam, ut quam occultissime pareant; quarumq; partium corporis usus sunt necessarij, eas neq; partes, neque earum usus suis nominibus appellant; quodq; facere non turpe est, modo occulte, id dicere obscœnum est: itaque nec actio rerum illarum aperta, petulantia uacat, nec oratio obscœnitate. nec uero audiendi sunt Cynici, aut si qui fuerūt Stoici penē Cynici, qui reprehendunt, et irrident, q̄ ea, quæ turpia re non sunt, uerbis flagitiosa dicamus; illa autem, quæ turpia sint, nominibus appellemus suis. latrocinari, fraudare, adulterari re turpe est, sed dicitur non obscœne: liberis dare operam, re honestum est; nomine obscœnū: pluraque in eam sententiam ab eisdem cōtra uerecundiam disputantur. nos autem naturam sequamur, et ab omni, quod abhorret ab ipsa oculorū, auriumq; cōprobatione, fugiamus. status, incessus, sessio, accubatio, uultus, oculi, manuum motus teneant illud decorum. quibus in rebus duo sunt maxime fugiēda, ne quid ef



foemina tū, aut molle; aut ne quid durū, aut rusticum
 sit. nec uero histrionibus, oratoribusq; cōcedendum est,
 ut ijs hæc apta sint, nobis dissoluta. scenīcorū quidem
 mos tantam habet à uetere disciplina uerecundiam, ut
 in scena sine subligaculo prodeat nemo: uerētur enim,
 ne, si quo casu euenerit, ut corporis partes quadam ape-
 riantur, aspiciantur non decore. nostro quidem more
 cum parentibus puberes filij, cum soceris quidem gene-
 ri non lauantur. retinenda est igitur huius generis ue-
 recundia, præsertim natura ipsa magistra, & duce.
 Cū autem pulchritudinis duo genera sint, quorum in
 altero uenustas sit, in altero dignitas: uenustatem mu-
 liebrem ducere debemus, dignitatem uirilem. Ergo &
 à forma remoueatur omnis uiro non dignus ornatu,
 & huic simile uitium in gestu, motuq; caueatur: nam
 & palæstrici motus sæpe sunt odiosiores, et histrionum
 nonnulli gestus ineptijs non uacant, et in utroque ge-
 nere, quæ sunt recta, & simplicia, laudantur. Formæ
 autem dignitas coloris bonitate tuenda est, color exerci-
 tationibus corporis. adhibenda est præterea munditia
 non odiosa, neque exquisita nimis, tantum quæ fugiat
 agrestem, & inhumanam negligentiam. eadem ratio
 est habenda uestitus: in quo, sicut in plerisq; rebus, me-
 diocritas optima est. cauendum est autem, ne aut tar-
 ditatibus utamur in gressu mollioribus, ut similes pō-
 parum ferculis esse uideamur: aut in festinatōibus su-
 scipiamus nimias celeritates: quæ cum fiunt, anhelitus
 mouētur, uultus mutantur, ora torquentur: ex quibus
 magna significatio fit, non adesse constantiā. sed mul-
 to etiam magis elaborandū est, ne animi motus à natu-

ra recedat: quod assequemur, si cauebimus, ne in perturbationes, atq; exanimationes incidamus, & si attētos animos ad decori conseruationē tenebimus. motus autē animorū duplices sunt, alteri cogitationis, alteri appetitus. cogitatio in uero exquirēdo maxime uersatur: appetitus impellit ad agendum. curādum est igitur, ut cogitatione ad res quam optimas utamur, appetitū rationi obediētem præbeamus. Et quoniā magna uis orationis est, eademq; duplex, altera cōtentionis, altera sermonis: cōtentio disceptationibus tribuatur iudiciorū, concionum, senatus; sermo in circulis, disputationibus, congressionibus familiariū uersetur, persequatur etiā conuiuia. contentionis præcepta rhetorum sunt, nulla sermonis. quanquam haud scio, an possint hæc quoque esse. sed discipulorum studijs inueniuntur magistri. huic autem qui studeant, sunt nulli. rhetorum turba refera omnia. quanquam quæ uerborum sententiarumq; præcepta sunt, eadem ad sermonē pertinebunt. sed cū orationis iudicem uocem habeamus, in uoce autē duo sequamur, ut clara sit, ut suauis: utrumque omnino a natura petendum est; uerum alterū exercitatio augebit, alterum imitatio presse loquentiū, et leniter. quid fuit in Catulis, ut eos exquisito iudicio putares uti literarum? quanquam erant literati: sed & alij: hi autē optime uti lingua latina putabātur. sonus erat dulcis: literæ neq; expressæ, neq; oppressæ; ne aut obscurum esset, aut nimis putidum. sine contentione uox nec la-guēs, nec canora. uberior oratio L. Crassi, nec minus faceta: sed bene loquendi de Catulis opinio nō minor. sale uero conditus, & facilijs Cæsar, Catuli patris frater,

rentione maiore, et uerborum grauitate acriore. id
 agendum etiam, ut ea facere non uideamus irati, sed,
 ut ad urendum, et secandum medici, sic nos ad hoc ge-
 nus castigandi raro, inuitiq; ueniamus, nec unquā, nisi
 necessario, si nulla reperietur alia medicina: sed tamen
 ira procul absit, cū qua nihil recte fieri, nihil conside-
 rare potest. magna autem ex parte clementi castigatio
 ne licet uti, grauitate tamē adiuncta, ut seueritas adhi-
 beatur, et contumelia repellatur. atque etiam illud ip-
 sum, quod acerbitatis habet obiurgatio, significandum
 est, ipsius causa, qui obiurgetur, susceptum esse. Rectū
 est autem, etiam in illis contentionibus, quæ cum inimi-
 cissimis fiunt, etiam si nobis indigna audiamus, tamen
 grauitatem retinere, iracundiam repellere: quæ enim
 cum aliqua perturbatione fiunt, ea neq; constanter fie-
 ri possunt, nec ab ijs, qui adsunt, approbari. deforme
 etiam est de se ipso prædicare, falsa præsertim, et cum
 irrisione audiētium imitari militem gloriosum. et quo-
 niam omnia persequimur, uolumus quidem certe; di-
 cendum est etiam, qualem hominis honorati, et prin-
 cipis domum placeat esse. cuius finis est usus: ad quem
 accomodanda est ædificandi descriptio: et tamen adhi-
 benda dignitatis, commoditatisq; diligentia. Cn. Octa-
 uio, qui primus ex illa familia Consul factus est, hono-
 ri fuisse accepimus, quod præclaram ædificasset in Pa-
 latio; & plenam dignitatis domum: quæ cum uulgo
 uiseretur, suffragata domino, nouo homini ad consula-
 tum putabatur. hanc Scaurus demolitus, accessionem
 adiunxit ædibus. itaque ille in suam domum Consula-
 tum primus intulit: hic summi, et clarissimi uiri filius

In domum multiplicatam non repulsam solū retulit,
 sed ignominiam, & calamitatem: ornanda est enim di-
 gnitas domo, non ex domo dignitas tota querēda; nec
 domo dominus, sed domino domus honestanda est. &
 ut in ceteris habēda ratio non sui solū, sed etiam alio-
 rum, sic in domo clari hominis, in quam et hospites
 multi recipiendi, & admittenda hominū culusq; gene-
 ris multitudo, adhibenda est cura laxitatis: aliter am-
 pla domus dedecori domino sepe fit, si est in ea solitu-
 do, et maxime, si aliquādo alio domino solita est frequē-
 tari: odiosum est enim, cū à prætereuntibus dicitur;
 O domus antiqua, heu quā dispari dominaris domi-
 no: quod quidem his temporibus in multis licet dicere.
 Cauēdum est etiam, præsertim si ipse ædifices, ne extra
 modum sumptu, & magnificentia prodeas. quo in ge-
 nere multum mali etiā in exemplo est: studiose enim
 plerique, præsertim in hac parte, facta principū imi-
 tantur: ut L. Luculli summi viri uirtutem quis? quā
 multi uillarum magnificentiam imitati sunt? quarum
 quidem certe est adhibendus modus, ad mediocritatē
 reuocādus: eademq; mediocritas ad communē usum,
 cultumq; uitæ referenda est. sed hæc hætenus. In om-
 ni autem actione suscipienda, tria sunt tenenda: pri-
 mum, ut appetitus rationi pareat; quo nihil est ad offi-
 cia seruāda accommodatius; deinde, ut animaduer-
 tatur, quanta illa res sit, quam efficere uelimus; neu-
 minor, ne ue maior cura, & opera suscipiatur, quā
 causa postulet: tertium est, ut caueamus, ut ea, quæ
 pertinent ad liberalem speciem, & dignitatem, mode-
 rata sint. modus autem est optimus, decus ipsum tene-

re, de quo ante diximus, nec progredi longius. horum autem trium præstantissimū est, appetitum obtemperare rationi. Deinceps de ordine rerum, & temporum opportunitate dicendum est. hæc autem scientia continet eā, quam Græci *ὁρτάσις* nominant, non hæc, quā interpretamur modestiam: quo in uerbo modus inest. sed illa est *ὁρτάσις*, in qua intelligitur ordinis conseruatio. itaque, ut eandem nos modestiam appellemus, sic definitur à Stoicis, ut modestia sit scientia earū rerum, quæ agentur, aut dicentur, loco suo collocadārū. itaque uidetur eadē uis ordinis, et collocationis fore: nam & ordinem sic definiunt, compositionem rerum aptis, & accommodatis locis: locum autē actionis, oportunitatē temporis esse dicunt. tempus autem actionis opportunum, græce *ὁκαιρία*, latine appellatur occasio. sic fit, ut modestia hæc, quam interpretamur ita, ut dixi, scientia sit opportunitatis idoneorum ad agendum temporū. sed potest eadem esse prudentiæ diffinitio: de qua principio diximus. hoc autē loco de moderatione, & temperantia, & alijs similibus uirtutibus querimus. itaque, quæ erant prudentiæ propria, suo loco dicta sunt: quæ autem harum uirtutum, de quibus iam dudum loquimur, quæ pertinet ad uerecundiā, & ad eorum approbationem, quibuscū uiuimus, nūc dicenda sunt. Talis est igitur ordo actionum adhibendus, ut, quemadmodum in oratione cōstanti, sic in uita omnia sint apta, et inter se cōueniētia: turpe est enim, ualdeq; uitiosum, in re seuera conuiuio dignum, aut delicatum aliquem inferre sermonem. bene Pericles, cum haberet collegam in Prætura Sophoclem, hiq; de

communi officio conuenissent, & casu formosus puer
 præteriret, dixissetq; Sophocles, o puerum pulchrum Peri-
 cle: at enim, Pericles, Prætores Sophocle decet non
 solum manus, sed etiam oculos abstinentes habere. at-
 que hoc idem Sophocles si in athletarum approbatione
 dixisset, iusta reprehensione caruisset. tanta uis est &
 loci, & temporis, ut si quis, cum causam sit acturus, in
 itinere, aut in ambulatione secum ipse meditetur, aut
 si quid aliud attentius cogitet, non reprehendatur: at hoc
 idem si in cōuiuio faciat, inhumanus uideatur in scitia
 temporis. sed ea, quæ multum ab humanitate discre-
 pant, ut si quis in foro cātet, aut si qua est alia magna
 peruersitas, facile apparent, nec magnopere admonitio-
 nem, & præcepta desiderant: quæ autem parua uiden-
 tur esse delicta, neque à multis intelligi possunt, ab his
 est diligentius declinandum. ut in fidibus, aut in tibijs,
 quāuis paulum discrepent, tamē id à sciēte animad-
 uerti solet: sic uiuendum est in uita, ne forte quid dis-
 crepet; uel multo etiam magis, quo maior, & melior
 actionum, quàm sonorum concentus est: itaque, ut in
 fidibus musicorum aures uel minima sentiunt, sic nos,
 si acres, ac diligentes iudices esse uolumus, animaduer-
 soresq; uitiorum, magna intelligimus sæpe ex par-
 uis. ex oculorum obtutu, superciliorum aut remissio-
 ne, aut cōtractione, ex mœstitia, ex hilaritate, ex risu,
 ex locutione, ex reticentia, ex cōtentione uocis, ex sum-
 missione, ex cæteris similibus facile indicabimus, quid
 apte eorū fiat, quid ab officio, naturaq; discrepet. quo
 in genere non est incommodum, quale quodq; eorum
 sit, ex alijs iudicare; ut, si quid dedeceat in illis, uitemus

Et ipsi: sit enim nescio quo modo, ut magis in alijs cer-
namus, quàm in nobismet ipsis, si quid delinquitur. ita
que facillime corriguntur illi in discendo, quorũ vitia
imitantur emendandi causa magistrũ. nec uero alie-
num est ad eligenda, quæ dubitationem afferunt,
adhibere doctos homines, uel etiã usu peritos, et, quid
his de uno quoq; genere offiij placeat, exquirere: ma-
ior enim pars eò serè deferri solet, quò à natura ipsa
deducitur. in quibus uidendũ est non modo, quid quis
que loquatur; sed etiam, quid quisq; sentiat; atque
etiam, de qua causa quisque sentiat. ut enim pictores,
et ij, qui signa fabricant, et uero etiam poetæ suum
quisque opus à uulgo cõsiderari uult, ut, si quid repre-
hendendũ sit à pluribus, id corrigatur, hiq; et secũ, et
cum alijs, quid in eo peccatum sit, exquirunt: sic alios-
rum iudicio permulta nobis et facienda, et non facien-
da; et mutanda, et corrigenda sunt: quæ uero more
aguntur, et institutis ciuilibus, de his nihil est præcipiẽ-
dum: illa enim ipsa præcepta sunt: nec quenquam hoc
errore duci oportet; ut, si quid Socrates, aut Aristippus
contra morem, consuetudinemq; ciuilem fecerint, locu-
ti uel sint, idem sibi arbitretur licere. magnis illi, et di-
uinitis bonis hanc licentiam assequebantur. Cynicorum
uero ratio tota est eiicienda: est enim inimica uerecun-
diæ, sine qua nihil rectum esse potest, nihil honestum.
eos autem quorum uita perspecta in rebus honestis, at
que magnis est, de Rep. sentientes, ac bene meritos, aut
merentes, aliquo honore, aut imperto affectos observa-
re, et colere debemus; tribuere etiam multũ senectuti,
cedere ijs, qui magistratũ habebunt; habere delectum

ciuis, & peregrini; in ipso quoque peregrino, priuatim
 ne, an publice uenerit. ad summam (ne agam de singu-
 lis) communem totius generis hominum conciliationē,
 & consociatiōem colere, tueri, seruare debemus. iam de
 artificijs, & quæstibus, qui liberales habēdi, qui sordidi
 sint, hæc ferè accepimus. primum improbantur ij quæ-
 stus, qui in odia hominum incurrunt; ut portitorū, &
 foeneratorū. illiberales autem, & sordidi quæstus merce-
 nariorum omnium, quorū opera, nō quorū artes emun-
 tur: est enim in illis ipsa merces auctoramētum serui-
 turis. sordidi etiam putādi, qui mercantur à mercatori-
 bus, quod statim uēdant: nihil enim proficiunt, nisi ad-
 modum mentiantur, nec uero quidquam est turpius
 uanitate. opificesq; omnes in sordida arte uersantur.
 nec uero quidquā ingenuum potest habere officina; mi-
 nimeq; artes probandæ, quæ ministræ sunt uoluptatū;
 Cetarij, lanij, coqui, factores, piscatores, ut ait Tere-
 ntius. adde his, si placet, unguentarios, saltatores, to-
 tumq; ludum talarium. quibus autem artibus aut pru-
 dentia maior inest, aut nō mediocris utilitas queritur,
 ut medicina, architectura, ut doctrina rerum honesta-
 rum; hæ sunt ijs, quorum ordini conueniunt, honestæ.
 mercatura autem, si tenuis est, sordida putanda est:
 si magna, & copiosa, multa undique apportans, mul-
 tisq; sine uanitate impartiens, non est admodum uitupe-
 randa: atque etiam, si satiata quæstu, uel contenta po-
 tius, ut sepe ex alto in portū, ex ipso portu se in agros,
 possessionesq; contulerit, uidetur iure optimo posse lau-
 dari. omniū autem rerum, ex quibus aliquid exquiri-
 tur, nihil est agriculturā melius, nil uberius, nil dul-

eius, nil libero homine dignius. de qua quoniam in Ca-
tone Maiore satis multa diximus, illinc assumes, quæ ad
hunc locum pertinebunt. Sed ab ijs partibus, quæ sunt
honestatis, quemadmodum officia ducerentur, satis
expositum uidetur. Eorum autem ipsorum, quæ hone-
sta sunt, potest incidere sæpe contentio, & comparatio,
de duobus honestis utrum honestius: qui locus à Pa-
nætio est prætermisus. nam cum omnis honestas ma-
net à partibus quatuor, quarum una sit cognitionis, al-
tera communitatis, tertia magnanimitatis, quarta mo-
derationis, hæc in deligendo officio sæpe inter se compa-
rentur, necesse est. placet igitur aptiora esse naturæ ea
officia, quæ ex communitate, quàm ea, quæ ex cognitio-
ne ducantur: idq; hoc argumento confirmari potest,
quòd, si contigerit ea uita sapienti, ut omnium rerum
affluentibus copijs ditetur; quamuis ea, quæ cognitione
digna sunt, summo ocio secum ipse consideret, & con-
templetur, tamen, si solitudo tanta sit, ut hominem ui-
dere non possit, excedat è uita. princepsq; omnium uir-
tutum est illa sapientia, quam σοφία Græci uocant: pru-
dentiam enim, quam Græci φρόνησις dicunt, aliam quã-
dam intelligimus, quæ est rerum expetendarum, fugiẽ-
darumq; scientia: illa autem sapientia, quam principem
dixi, rerum est diuinarum, atque humanarum, scientia:
in qua continetur deorum, & hominum communitas,
& societas ipsorum inter ipsos. ea si maxima est, ut cer-
te; necesse est, quod à communitate ducatur officium,
id esse maximum: etenim cognitio, contemplatioq; na-
turæ manca quodam modo, atque inchoata sit, si nulla
actio rerum consequatur, ea uero actio in hominum

commodis tuendis maxime cernitur : pertinet igitur
 ad societatem generis humani : ergo hæc cognitioni
 anteposenda est : atque id optimus quisque re ipsa ostē-
 dit , & indicat : quis est enim tam cupidus perspicien-
 da, cognoscendaq; rerum natura, ut, si ei tractanti,
 contemplantiq; res cognitione dignissimas subito sit
 allatum periculum, discrimenq; patriæ, cui subuenire,
 opitulariq; possit, non illa omnia relinquat, atque abij-
 ciat, etiam si dinumerare se stellas, aut metiri mundi
 magnitudinem posse arbitretur; atque hoc idem in pa-
 rentis, in amici re, aut periculo fecerit? quibus rebus in-
 telligitur, studijs, officijsq; scientiæ præponēda esse offi-
 cia iustitiæ: quæ pertinet ad hominum utilitatem: quæ
 nihil homini debet esse antiquius. atque illi, quorum
 studia, uitaque omnis in rerum cognitione uersata est,
 tamen ab augendis hominum utilitatibus, & cōmodis
 non recesserunt: nā & erudierunt multos, quo melio-
 res ciues, utilioresq; rebus suis publicis essent; ut Theo-
 banum Epaminundam Lysis Pythagoreus, Syracu-
 sium Dionem Plato, multiq; multos : nosq; ipsi, quic-
 quid ad Remp. attulimus, (si modo aliquid attulimus)
 à doctōribus, atque doctōribus, atq; doctrina instru-
 eti ad eam & ornati accessimus. neque solum uiui, at-
 que præsentēs studiosos discendi erudiūt, atque docēt,
 sed hoc idem etiam post mortem monumentis literarū
 assequuntur: nec enim locus ullus prætermisus est ab
 ijs, qui ad leges, qui ad mores, qui ad disciplinā Reip. p-
 tineret, ut otium suum ad nostrum negotium cōtulisse
 uideantur. Ita illi ipsi doctrinæ studijs, et sapientiæ
 dediti, ad hominum utilitatem, suam, sapientiam, pru-
 dentiam,

dentiam, intelligentiamq; potissimum conferunt. ob eā etiam causam eloqui copiose, modo prudenter, melius est, quā uel acutissime sine eloquentia cogitare; quod cogitatio in se ipsa uertitur, eloquentia uero complectitur eos, quibuscum communitate iuncti sumus. atque, ut apum examina non fingendorum fauorum causa congregantur, sed, cum congregabilia natura sint, fingunt fauos: sic homines, ac multo etiam magis natura congregati, adhibent agendi, cogitandi q; solertiam. itaque nisi ea uirtus, quæ cōstat ex hominibus tuendis, idest ex societate generis humani, attingat rerum cognitionem, soliuaga cognitio, & ieiuna uideatur: itemq; magnitudo animi, remota cōmunitate, coniunctioneq; humana, feritas sit quædam, & immanitas. ita fit, ut uincat cognitionis studium consociatio hominum, atque communitas. nec uerum est, quod dicitur à quibusdam, propter necessitatē uitæ, quòd ea, quæ natura desideraret, consequi sine alijs, atque efficere non possemus, iccirco istam esse cum hominibus communitatem, & societatem; quòd, si omnia nobis, quæ ad uictum, cultumq; pertinent, quasi uirgula diuina (ut aiunt) suppediarentur, tum optimo quisq; ingenio, negotijs omnibus omis- sis, totum se in cognitione, & scientia collocaret, non est ita: nam & solitudinem fugeret, & socium studij quæreret; tum docere, tum discere uellet, tum audire, tum dicere. ergo, omne officium, quod ad coniunctionem hominum, & ad societatem tuendam ualet, anteponendum est illi officio, quod cognitione, & scientia continetur. illud forsitan quærendum sit, num hæc communitas, quæ maxime est apta naturæ, sit etiam moderatio=

ni, modestiaq; semper anteponenda. non placet: sunt enim quædam partim ita fœda, partim ita flagitiosa, ut ea ne conservande quidem patriæ causa sapiens saturus sit. ea Posidonius collegit permulta, sed ita tætra quædam, ita obscœna, ut dictu quoq; uideatur turpia. hæc igitur non suscipiet quisquam Reip. causa, nec Resp. quidem pro se suscipi uolet. sed hæc commodius se res habet, quòd non potest accidere tempus, ut intersit Reip. quidquam illorum facere sapientem. quare sapientem. quare hoc quidem effectum sit in officijs deligendis, hoc genus officiorum excellere, quod teneatur hominum societate: etenim cognitionem, prudentiamq; sequetur considerata actio: ita fit, ut, considerate agere, pluris sit, quàm cogitare prudenter. Atque hæc quidem hætenus: patefactus est enim iocus ipse, ut non sit difficile in exquirendo officio, quod cuique sit præponendum, uidere. in ipsa autem communitate sunt gradus officiorum, ex quibus, quod cuique præstet, intelligi possit; ut prima dijs immortalibus, secunda patriæ, tertia parentibus, deinceps gradatim reliqua reliquis debeantur. quibus ex rebus breuiter disputatis intelligi potest, non solum id homines solere dubitare, honestum ne, an turpe sit; sed etiam, duobus propositis honestis, utrum honestius. hic locus à Panætio est (ut supra dixi) prætermisus. sed ad reliqua pergamus.

MARCI TVLLII CICERONIS
OFFICIORVM AD MAR-
CVM FILIVM LIBER II.

Vemadmodum officiis ducerentur ab honestate, Marce fili, atq; ab omni genere virtutis, satis explicatū arbitror libro superiore. sequitur, ut hæc officiorū genera persequar, quæ pertinet ad uitæ cultum, & ad earū rerum, quibus utuntur homines, facultatem, ad opes, ad copias. in quo tum quæri dixi, quid utile, quid inutile; tum, ex utilibus quid utilius, aut quid maxime utile. de quibus dicere aggrediar, si pauca prius de instituto, ac de iudicio meo dixerō. Quanquam enim libri nostri complures non modo ad legendi, sed etiā ad scribendi studium excitauerint: tamen interdum uereor, ne quibusdam bonis uiris philosophiæ nomē sit inuisum, mirenturq; in ea tantū me operæ & temporis ponere. ego autem, quā diu Resp. per eos regebatur, quibus se ipsa cōmiserat, omnes meas curas, cogitationesq; in eam conferebam. cum autem dominatu unius omnia tenerentur, neque esset usquā cōsilio, aut auctoritati locus, socios deniq; tuendæ Reip. summos uiros amisisssem; nec me angoribus dedi, quibus essim confectus, nisi ijs restitisssem; nec rursus indignis homine docto uoluptatibus. atque utinam Resp. stetisset, quo cœperat, statu, nec in homines non tam cōmutandarum rerum, quā euertendarum cupidus incidisset: primum enim, ut stante Rep. facere solebamus, in agendo plus, quā in scribendo operæ poneremus; de-

inde ipsis scriptis non ea, quæ nunc, sed actiones nostras mandaremus, ut sæpe fecimus. cum autem Reip. in qua omnis mea cura, cogitatio, opera poni solebat, nulla esset omnino, illa scilicet literæ conticuerunt forenses, & senatoriæ. nihil autem agere cum animus non posset, in ijs studijs ab initio uersatus ætatis, existimaui honestissimi me molestias deponi posse, si me ad philosophiam reuoluissem. cui cum multum adolescens discendi causa temporis tribuissem, postea quàm honoribus inservire cœpi, meq; totum Reip. tradidi, tantum erat philosophiæ loci, quantum superfuerat amicorum, & Reip. temporibus. id autem omne consumebatur in legendo: scribendi otium non erat. maximis igitur in malis hoc tantum boni affectui uidemur, ut ea literis mandaremus, quæ nec satis erant nota nostris, & erant cognitione dignissima: quid est enim per deos oprabilius sapientia? quid præstantius? quid homini melius? quid homine dignius; hanc qui expetunt igitur, philosophi nominantur: nec quidquam aliud est philosophia, si interpretari uelis, quàm studium sapientiæ. sapientia autem est (ut à ueteribus philosophis definitum est) rerum diuinarum, & humanarum, causarumq; quibus hæ res continentur, scientia. cuius studium qui uituperat, haud sane intelligo, quidnam sit, quod laudandum putet. nam siue oblectatio queritur animi, requiesq; curarum, quæ conferri cum eorum studijs potest, qui semper aliquid acquirunt, quod spectet, & ualeat ad bene, beateq; uiuendum; siue ratio constat, uirtutisq; queritur. aut hæc ars est, aut nulla omnino, per quam eas assequamur. nullam dicere maximarum rerum artem esse,

cum minimarum sine arte nulla sit, hominum est parum considerate loquentium, atque in maximis rebus errantium. si autem est aliqua disciplina uirtutis; ubi ea quaeretur, cum ab hoc discendi genere discesseris? sed haec, cum ad philosophiam cohortamur, accuratius solent disputari: quod alio quidem libro fecimus. hoc autem tempore tantum nobis declarandum fuit, cur oratori Reip. muneribus ad hoc nos studium potissimum contulissimus. Occurritur autem nobis, & quidem a doctis, & eruditis, quaerentibus, satis ne constanter facere uideamur, qui, cum percipi nihil posse dicamus, tamen & alijs de rebus differere soleamus, & hoc ipso tempore praecipua officij persequamur. Quibus uellem satis cognita esset nostra sententia: non enim sumus ij, quorum uagetur animus errore, nec habeat unquam, quid sequatur: quae enim esset ista mens, uel quae uita potius, non solum disputandi, sed etiam uiuendi ratione sublatam? nos autem, ut ceteri, qui alia certa, alia incerta esse dicunt, sic ab his dissentientes alia probabilia, contra alia improbabilia esse dicimus. quid est ergo, quod me impediat ea, quae mihi probabilia uideantur, sequi; quae contra, improbare; atque affirmandi arrogantiam uitare, fugere temeritatem, quae a sapientia dissidet plurimum? contra autem omnia disputatur a nostris, quod hoc ipsum probabile elucere non posset, nisi ex utraque parte causarum esset facta contentio. sed haec explanata sunt in Academicis nostris satis, ut arbitror, diligenter. Tibi autem mi Cicero, quanquam in antiquissima, nobilissimaque; philosophia Cratippo auctore uersaris, ijs si millimo, qui ista praeciosa pepererunt; tamen haec nostra,

finitima uestris, ignota esse nolui. sed iam ad instituta pergamus. Quinque igitur rationibus propositis officij persequendi, quarum duæ ad decus, honestatēq; pertinent, duæ ad commoda uitæ, copias, opes, facultates, quinta ad eligendi iudiciū, si quando ea, quæ dixi pugnare inter se uiderentur; honestatis pars perfecta est, quam quidem tibi cupio esse notissimam. hoc autē, de quo nunc agimus, id ipsum est, quod utile appellatur. in quo uerbo lapsa cōsuetudo deflexit de uia, sensimq; eō deducta est, ut ab honesto utile secerneret, & constitueret honestum aliquod, quod utile nō esset; et utile, quod nō honestū: qua nulla perniciēs maior hominum uitæ potuit afferri. summa quidem auctoritate philosophi seuerē sanē atq; honeste hæc tria genera cōfusa, cogitatione distinguūt: quidquid enim iustum sit, id utile etiam esse censent; itemq; quod honestū idem esse iustū: ex quo efficitur, ut quidquid honestum sit, idem sit utile. quod qui parum prospiciunt, hi sæpe uersutos homines, & callidos admirantes, eorū malitiam, sapientiam iudicant. quorum error eripiens est; omnisq; opinio ad eam spem traducēda; ut honestis consilijs, iustisq; factis, nō fraude, et malitia se intelligant ea, quæ uelint, consequi posse. quæ ergo ad uitam hominum tuendam pertinent, partim sunt inanimata, ut aurum, argentum, ut ea, quæ gignūtur è terra, ut alia eiusdem generis; partim animalia, quæ habent suos impetus, & rerum appetitus. eorum autem alia rationis expertia sunt, alia ratione utentia. expertes rationis sunt equi, boues, reliquæ pecudes, apes, quarum opere efficitur aliquid ad hominum usum, atq;

uitam. ratione autem utentium duo genera ponuntur: unum deorum, alterum hominum. deos placatos pietas efficiet, & sanctitas. proxime autem, et secundum deos, homines hominibus maxime utiles esse possunt. earumque iterum rerum, quae noceant, & obsint, eadem diuisio est. sed quia deos nocere non putant, his exceptis homines hominibus plurimum obesse, uel prodesse arbitrantur: ea enim ipsa, quae inanimata diximus, pleraque sunt hominum, effecta operis: quae nec haberemus, nisi manus, et ars accessisset; nec his sine hominum administratione uteremur. neque enim uoletudinis curatio, neque nauigatio, neque agricultura, neque frugum, fructuumque reliquorum perceptio, & conseruatio sine opera hominum, nulla esse potuisset. iam uero & earum rerum, quibus abundaremus, exportatio, et earum, quibus egeremus, inuenticio certe nulla esset, nisi his muneribus homines fungerentur. eademque ratione nec lapides exciderentur a terra ad usum nostrum necessarii, nec ferrum, aurum, aes, argentum effoderetur penitus abditum, sine hominum labore, & manu. tecta uero, quibus & frigorum uis pelleretur, & calorum molestiae sedaretur, unde aut initio generi humano dari potuissent, aut postea subuenire, si aut uis tempestatis, aut terrae motu, aut uetustate cecidissent, nisi communis uita ab hominibus harum rerum auxilia petere didicisset? adde ductus aquarum, derivationes fluminum, agrorum irrigationes, moles oppositae fluctibus, portus manu factos: quae non sine hominum opere habere possemus. ex quibus omnibus, multisque alijs perspicuum est, qui fructus, quaque utilitates ex rebus istis, quae sunt inanimatae percipiuntur,

eas nos nullo modo sine hominū manu, atq; opera ca-
 pere potuisse. qui deniq; ex bestiis fructus, aut quæ cō-
 moditas, nisi homines adiuuarent, percipi posset? nam
 et qui principes inueniendi fuerunt, quē ex quaq; bel-
 lua usum habere possemus, homines certe fuerunt: nec
 hoc tempore sine hominū opera aut pascere equos, aut
 domare, aut tueri, aut tempestiuos fructus ex his cape-
 re possemus: ab eisdemq; et ea, quæ nocent, interficiū-
 tur, & quæ usui possunt esse, capiuntur. quid enume-
 rem artium multitudinem, sine quibus uita omnino nul-
 la esse potuisset? quis enim agris subueniret? quæ esset
 oblectatio ualētium, qui uictus, aut cultus, nisi tā mul-
 ta nobis artes ministrarent? quibus rebus exculta ho-
 minum uita tantū destitit à uictu, et cultu bestiarū.
 urbes uero sine hominū cœtu non potuissent nec ædifi-
 cari, nec frequentari: ex quo leges, moresq; cōstituti, tū
 iuris æqua descriptio, certa q; uiuēdi disciplina; per
 quas bene, beateq; uiuitur. quas res & māsuetudo ani-
 morū cōsecuta, et uerecūdia est: effectūq; est, ut esset ui-
 ta munitior, atq; ut dādo, et accipiendo, permutādisq;
 facultatibus, et cōmodis nulla re egeremus. longiores
 hoc loco sumus, quā nēcesse est: quis est enim, cui nō
 perspicua sint illa, quæ pluribus uerbis à Panætio com-
 memorantur, neminē neq; ducē in bello, nec principē
 domi magnas res, et salutare sine hominū studijs ge-
 rere potuisse? cōmemoratur ab eo Themistocles, Peri-
 cles, Cyrus, Agesilaus, Alexander: quos negat sine adiu-
 mentis hominum tantas res efficere potuisse. uititur in
 re non dubia testibus non necessarijs. atque ut magnas
 utilitates adipiscimur conspiratione hominū, atq; con-

sensu, sic nulla tā detestabilis pestis est, quā non homi-
 ni ab homine nascatur. est Dicæarchi liber de interitu
 hominum, peripatetici magni, & copiosi: qui collectis
 cæteris causis, eluuiōis, pestilentie, uastitatis, belluarū
 etiam repentinæ multitudinis, quarum impetu docet
 quædam hominum genera esse consumpta; deinde cō-
 parat, quanto plures deleti sint homines hominū impe-
 tu, id est bellis, aut seditionibus, quā omni reliqua ca-
 lamitate. cū igitur hic locus nihil habeat dubitationis,
 quin homines plurimū hominibus et prosint, et obsint;
 propriū hoc statuo esse uirtutis, conciliare sibi animos
 hominum, et ad usus suos adiungere. itaq; quæ in re-
 bus inanimis, quæq; in usu, et tractatione belluarum
 fiunt utiliter ad hominū uitam, artibus ea tribuuntur
 operosis: hominum autem studia ad amplificationem
 nostrarum rerum prompta, ac parata, uirorū præstan-
 tium sapientia, et uirtute excitantur: etenim uirtus fe-
 re omnis in tribus rebus uertitur. quarum una est in
 perspiciedo, quid in quaque re uerum, sincerumq; sit,
 quid consentaneū cuiq; quid consequēs, ex quo quæq;
 gignantur, quæ cuiusq; rei sit causa. alterum, cohibe-
 re motus animi turbatos, quos Græci πᾶν nominant;
 appetitiones, quas illi ὁρμᾶς, obediētes efficere ratioi:
 tertium, iis, quibuscū congregamur, uti moderate, &
 scienter, quorū studiis ea, quæ natura desiderat, exple-
 ta, cumulataq; habeamus: per eos denique, si quid im-
 portetur nobis incommodi, propulsemus: ulciscamurq;
 eos, qui nocere nobis conati sunt; tantaq; poena afflic-
 mus, quātam æquitas, humanitasq; patitur. quibus au-
 tem rationibus hanc facultatē assequi possimus, ut ho-

Et inquinatissima Et ijs, qui ea tenentur, Et illis, qui ad eam confugere conantur: male enim se res habet, cum, quod uirtute effici debet, id tentatur pecunia. sed quoniam nonnunquam subsidium hoc necessariū est, quemadmodum sit utendum eo, dicemus, si prius ijs de rebus, quæ uirtuti propiores sunt, dixerimus. atq; etiā subiiciunt se homines imperio alterius, et potestati pluribus de causis: ducuntur enim aut beneuolentia, aut beneficiorum magnitudine, aut dignitatis præstantia, aut spe, sibi id utile futurum; aut metu, ne ut parere cogantur; aut spe largitionis, promissionisq; capti; aut postremo, ut sæpe in nostra Rep. uidemus, mercede conducti. rerum autem omnium nec aptius est quidquā ad opes tuendas, quā diligere; nec alienius, quā timere. præclare Ennius:

Quem metuunt, oderunt:

Quem quisque odit, perijisse expetit.

multorum autem odijs nullas opes posse obsistere, si antea fuit ignotum, nuper est cognitum. nec uero huius tyrāni solum, quem armis oppressa pertulit ciuitas, interitus declarat, quātum odium hominū ualet ad pestem; sed reliquorum simile exitus tyrannorum; quorum haud ferē quisquam interitū similem effugit: malus enim custos diuturnitatis metus: contraq; beneuolentia fidelis est uel ad perpetuitatem. sed ijs, qui ui. oppressos imperio coercēt, sit sanē adhibenda sæuitia, ut heris in famulos, si aliter teneri non possunt. qui uero in libera ciuitate ita se instruunt, ut metuātur; his nihil potest esse dementius: quāuis enim demersæ sint leges alicuius opibus, quāuis tremefacta libertas, emer

gunt tamen hæc aliquādo aut iudicijs tactis, aut oculis de honore suffragijs: acriores autem morsus sunt in remissa libertatis, quā retēta. quod igitur latissime patet, neq; ad incolumitatem solum, sed etiā ad opes, et potentiam ualet plurimum, id amplectamur, ut merus absit, charitas retineatur: ita facillime, quæ uolumus, et priuatis in rebus, et in Rep. consequemur: etenim, qui se metui uolent, à quibus metuuntur, eosdem metuant ipsi, necesse est: quid enim censemus superiorem illum Dionisium, quo cruciatu timoris angis solitum, qui cultros metuens consorios candente carbone sibi adurebat capillum? quid Alexandrum Phœream, quo animo uixisse arbitramur? qui (ut scriptum legimus) cum uxorem Theben admodum diligere, tamen ad eam ex epulis in cubiculum ueniens, barbarum, & cum quidem (ut scriptum est) compunctum notis Threicijs, districto gladio iubeat antire, præmittebatq; de stipatoribus suis, qui perscrutarētur arculas muliebres, et, ne quod in uestimentis occultaretur telum, exquirerent. o miserum, qui fideliores & barbarum, & stigmatiam putaret, quā coniugem. nec eum fefellit opinio: ab ea est enim ipse propter pellicatus suspicionem interfectus. nec uero ulla uis imperij tanta est, quæ premente metu possit esse diuturna. testis est Phalaris: cuius est præter ceteros nobilitata crudelitas: qui non ex insidijs interiit, ut is, quem modo dixi, Alexander; non à paucis, ut hic noster; sed in quem uniuersa Agrigentinorum multitudo impetum fecit. quid Macedones? non ne Demetrium reliquerunt, uniuersiq; se ad Pyrrhum contulerunt? quid La

cedamontos iniuste imperantes? non ne repente omnes
ferè socij deseruerunt, spectatoresq; se ociosos præbue-
runt Leuctricæ calamitatis? externa libentius in tali
re, quàm domestica, recordor. ueruntamen quàm diu
imperium populi R. beneficijs tenebatur, non iniurijs,
bella aut pro socijs, aut de imperio gerebantur; exitus
erant bellorum aut mites, aut necessarij. Regum, popu-
lorum, nationum portus erat, & refugium senatus.
nostri autem magistratus, imperatoresq; ex una hac re
maximam laudem capere studebant, si prouincias, si so-
cios aequitate, & fide defendissent: itaque illud patroc-
nium orbis terræ uerius, quàm imperium poterat nomi-
nari. sensim hanc consuetudinem, & disciplinam iam
antea minuebamur, post uero Syllæ uictoriam penitus
amissimus: desitum est enim uideri quidquam in socios
iniquum, cum extitisset etiam in ciues tanta crudelitas,
ergo in illo secuta est honestam causam non honesta ui-
ctoria: est enim ausus dicere, hasta posita cum bona in
foro uenderet & bonorum uirorum, & locupletum,
& certe ciuium, prædam suam se uendere. secutus est,
qui in causa impia, uictoria etiam fœdiore non solum
singulorum ciuium bona publicaret, sed uniuersas quo-
que prouincias, regionesq; uno calamitatis iure compre-
henderet: itaque uexatis, & perditis exteris natiõibus,
ad exemplum amissi imperij portari in triumpho Mas-
siliam uidimus, & ex ea urbe triumphari, sine qua nū-
quam nostri imperatores ex transalpinis bellis triūpha-
runt. multa præterea commemorarem nefaria in so-
cios, si hoc uno sol quidquam uidisset indignius. iure igi-
tur plectimur: nisi enim multorum impunita scelera

tulissemus, nunquam ad unum tanta peruenisset licentia: à quo quidem rei familiaris ad paucos, cupiditatum ad multos improbos uenit hereditas. nec uero unquam bellorum ciuillium semē, & causa deerit, dum homines perditī hastam illam cruentam & meminerint, & sperabunt, quam P. Sylla cum uibrasset, Dictatore propinquo suo, idem sexto & tricesimo anno post à sceleratio re hasta eadem non recessit. alter autem, qui in illa Dictatura scribafuerat, in hac fuit Quæstor urbanus. ex quo debet intelligi, talibus præmijs propositis, nūquam defutura bella ciuilia. itaq; parietes urbis modo stant, & manent, ijq; ipsi iam extrema scelera metuentes: Rē uero publicam penitus amisimus. atq; in has clades incidimus (redeundum est enim ad propositum) dū metui, quā chari esse, & diligī, maluimus. quæ si populo R. iniuste imperanti accidere potuerunt, quid debent putare singuli? quod cum perspicuū sit, beneuolentiæ uim esse magnam, metus imbecillem: sequitur, ut differamus, quibus rebus possimus facillime eam, quam uolumus, adipisci cum honore, & fide charitatem. sed ea nō pariter omnes egemus: nam ad cuiusq; uitam instituentiam accommodandum est, à multis ne opus sit, an satis sit à paucis diligī. certum igitur hoc sit, & id, quod & primum, & maxime necessarium, familiaritates habere fidas amantium nos amicorum, & nostra mirantium: hac enim est una res prorsus, ut nō differat multum inter summos, & mediocres uiros: eaq; utrisq; pro modum comparanda. honore, & gloria, & beneuolentia ciuium fortasse nō æque omnes egent: sed tamen si cui hac suppetunt, adiunant aliquantū tum ad cete

ra, tum ad amicitias comparandas. sed de amicitia libro dictum est, qui inscribitur Lælius. nunc dicamus de gloria, quanquam ea quoq; de re duo sunt nostri libri. sed attingamus, quando quidem ea in rebus maioribus administrandis adiuuat plurimum. Summa igitur, & perfecta gloria constat ex tribus his: si diligit multitudo: si fidem habet: si cum admiratione quadam, honore nos dignos putat. hæc autem, si est simpliciter, breuiterq; dicendum, quibus rebus pariuntur à singulis, eisdem fere à multitudine. sed est alius quoq; quidam aditus ad multitudinem, ut in uniuersorum animos tamquam influere possimus. Ac primum de illis tribus, quæ ante dixi, beneuolentiæ præcepta uideamus: quæ quidem beneficijs capitur maxime: secundo autem loco benefica uoluntate beneuolentia mouetur, etiã si res forte nõ suppetit. uehementer autem amor multitudinis commouetur ipsa fama, et opinione liberalitatis, beneficentiæ, iustitiæ, fideli, omniumq; earum uirtutum, quæ pertinet ad mansuetudinem morum, ac facilitatē. etenim illud ipsum, quod decorum, honestumq; diximus, quia per se nobis placet, animosq; omnium natura, & specie sua commouet, maximeq; quasi perlucet ex ijs, quas commemorauimus, uirtutibus, ideo illos, in quibus eas uirtutes efferemur, à natura ipsa diligere cogimur. atque hæc quidem causæ sunt diligendi grauissimæ: possunt enim præterea non nullæ esse leuiiores. Fides autem ut habeatur, duabus rebus effici potest; si existimabimur adepti coniunctam cum iustitia prudentiam: nam & ijs fidem habemus, quos plus intelligere, quàm nos, arbitramur, quosq; & futura prospicere credimus, & cum res agat-

tur, in discrimenq; uentum sit, expedire rem, & consilium ex tempore capere posse: (hanc enim omnes existimant utilem, ueramq; prudentiam) iustus autem, & fideis hominibus, id est bonis, ita fides habetur, ut nulla sit in his fraudis, iniuriæq; suspicio: itaque his salutem nostram, his fortunas, his liberos rectissime committi arbitramur. harum igitur duarum ad fidem faciendam iustitia plus pollet, quippe cū ea sine prudentia satis habeat auctoritatis, prudentia sine iustitia nihil ualeat ad faciendam fidem: quo enim quis uersutior, & callidior est, hoc inuisior, & suspectior, detracta opinione probitatis. quamobrem intelligentiæ iustitia coniuncta, quantum uolet habebit ad faciendam fidem uirium: iustitia sine prudentia multum poterit: sine iustitia nihil ualebit prudentia. Sed ne quis sit admiratus, cur, cum inter omnes philosophos constet, à meq; ipso saepe disputatum sit, qui unam haberet, omnes habere uirtutes; nunc ita seiungā, quasi possit quisquam, qui nō idem prudens sit, iustus esse: alia est illa, cum ueritas ipsa limatur in disputatione, subtilitas; alia, cum ad opinionem cōmunem omnis accommodatur oratio, quamobrē, ut uulgus, ita nos hoc loco loquimur, ut alios fortes, alios bonos uiros, alios prudentes dicamus: popularibus enim uerbis est agendū, & usitatis, cum loquamur de opinione populari: idq; eodē modo fecit Panætius. sed ad propositum reuertamur. Erat igitur ex tribus, quæ ad gloriam pertinerent, hoc tertium, ut cum admiratione hominum honore ab his digni iudicaremur. admirantur igitur communiter illi quidem omnia, quæ magna, & præter opinionem suam animaduertunt; separatim autem in singulis,

singulis, si perspiciunt nec opinata quidem bonæ ita-
que eos uiros suspiciunt, maximisq; efferunt laudibus, in
quibus existimant se excellentes quasdam, & singulares
uirtutes perspicere; despiciunt autem eos, & contem-
nunt, in quibus nihil uirtutis, nihil animi, nihil neruorum
putant: non enim omnes eos contemnunt, de quibus ma-
le existimant: nam quos improbos, maledicos, fraudu-
lentos putant, & ad faciendam iniuriam instructos, eos
haud contemnunt quidem, sed de ijs male existimant.
quambrem (ut ante dixi) contemnuntur ij, qui nec sibi,
nec alteri profunt, ut dicitur; in quibus nullus labor,
nulla industria, nulla cura est: admiratione quadam ue-
ro afficiuntur ij, qui anteire ceteros uirtute putantur, et
cum omni carere dedecore, tum uero ijs uitijs, quibus
alij nõ facile possunt obsistere: nam & uoluptates blan-
dissimæ dominæ sæpe maiores partes animi à uirtute de-
torquent; & dolorum cum admoventur faces, præ-
ter modum plerique exterrantur: uita, mors, diuitiæ,
paupertas omnes homines uehementissime permouent.
quæ qui in utrâque partem excelso animo, magnoq; de-
spiciunt; cumq; aliqua his ampla, & honesta res obie-
cta est, totos ad se conuertit, et rapit: tum quis non ad-
miretur splendorem, pulchritudinemq; uirtutis? ergo et
hæc animi perspicientia admirabilitatem magnam facit
& maxime iustitia, ex qua una uirtute uiri boni appel-
lantur, mirifica quadam res multitudini uidetur: nec
iniuria: nemo enim iustus esse potest, qui mortem, qui
dolorem, qui exilium, qui egestatem timet, aut qui ea,
quæ his sunt contraria, æquitati anteposit. maximeq;
admirantur eum, qui pecunia non mouetur: quod in

quo uiro perspectum sit, hunc dignū spectatu arbitran-
 tur. itaq; illa tria, quæ proposita sunt ad gloriā, omnia
 iustitia cōfici; et beneuolētiā, quod prodesse uult plu-
 rimis; et ob eandem causam fidem, et admirationem,
 quid eas res spernit, et negligit, ad quas pleriq; inflam-
 mati auiditate rapiuntur. ac mea quidem sententia om-
 nīs ratio, et institutio uitæ adiumenta hominū desi-
 derat, in primisq; ut habeas, quibuscum possis familia-
 res conferre sermones: quod est difficile, nisi specie præ-
 te boni uiri feras. ergo etiam solitario homini, atq; in
 agro uiam agenti opinio iustitiæ necessaria est, eoq;
 etiā magis, quod si eam non habebunt, iniusti habebun-
 tur, nullis præsidij septi multis afficiētur iniurijs. Atq;
 his etiam, qui uendunt, emunt, conducunt, locant, cōtra-
 hendisq; negotijs implicantur, iustitia ad rem gerendā
 necessaria est. cuius tanta uis est, ut nec illi quidē, qui
 maleficio, et scelere pascuntur, possint sine ulla particu-
 la iustitiæ uiuere: nam qui eorum cuipiam, qui unā la-
 trocinantur, furatur aliquid, aut clam eripit, is sibi ne
 in latrocinio quidem relinquit locum: ille autem, qui
 archipirata dicitur, nisi æquabiliter prædam dissipat,
 aut occidetur à socijs, aut relinquetur. quin etiam le-
 ges latronum esse dicuntur, quibus pareant, quas obser-
 uent. itaque propter æquabilem prædæ portionem et
 Bargulus Illyricus latro, de quo est apud Theopompū,
 magnas opes habuit; et multo maiores Viriatus Lusi-
 tanus: cui quidem exercitus nostri, imperatoresq; cesse-
 runt: quem C. Lelius, is, qui sapiens usurpatur, Præ-
 tor fregit, et comminuit; ferocitatēq; eius ita repres-
 sit, ut facile bellum reliquis traderet. cum igitur tan-

ea uis iustitie sit, ut ea etiam latronū opes firmet, atq;
 augeat, quantam eius uim inter leges, & iudicia, & in
 stituta Reip. fore putamus? mihi quidem non apud
 Medos solum (ut ait Herodotus) sed apud etiam maiore
 res nostros fruendæ iustitiæ causa uidentur olim bene
 morati Reges constituti: nam, cum præmeretur initio
 multitudo ab ijs, qui maiores opes habebant, ad
 unum aliquem confugiebant uirtute præstantem; qui,
 cum prohiberet iniuria tenuiores æquitate constituen-
 da, summos cum infimis pari iure retinebat. eademq;
 constituendarum legum fuit causa, quæ Regum: ius
 enim semper quæsitum est æquabile: neque enim ali-
 ter esset ius. id si ab uno iusto, & bono uiro conseque-
 batur, eo erant contenti. cum id minus contingeret, eges
 sunt inuenta, quæ cū omnibus semper una, atq; eadem
 uoce loquerentur. ergo hoc quidē perspicuum est, e os ad
 imper. idū deligi solitos, quorū de iustitia magna esset
 opinio multitudinis. adiuncto uero hoc, ut ijdem etiam
 prudentes haberentur, nihil erat, quod homines his au-
 ctoribus non posse consequi se arbitrantur. omni igitur
 ratione colenda, & retinēda iustitia est, tū ipsa pro-
 pter sese (nam aliter iustitia non esset) tum propter am-
 plificationem honoris, & gloriæ. Sed ut pecuniæ quæ-
 rendæ non solum ratio est, sed etiam collocandæ, quæ
 perpetuos sumptus suppeditet, nec solū necessarios, sed
 etiam liberales: sic gloria quærenda, & collocanda ra-
 tione est. quanquā præclare Socrates hanc uiam ad glo-
 riam proximam, & quasi cōpendiariam dicebat esse, si
 quis id ageret, ut, qualis haberi uellet, talis esset. Quod
 si qui simulatione, et inani ostentatione, ficto nō modo

sermone, sed etiam uultu stabilem se gloriam consequi
posse rentur, uehementer errant. uera gloria radices
agit, atque etiam propagatur. ficta omnia celeriter, tã
quam flosculi, decidunt; nec simulatum potest quic-
quam esse diuurnum. testes sunt permulti in utrãque
partem, sed breuitatis causa familia erimus contenti
una; Tl. enim Gracchus P. filius tam diu laudabitur,
dum memoria rerum Romanarum manebit: at eius fi-
lij nec uiui probabantur à bonis, & mortui numerum
obtinent iure casorum. Qui igitur adipisci ueram ius-
sitiæ gloriam uolet, iustitia fungatur officijs: ea quæ
essent, dictum est in superiore libro. sed ut facillime,
quales simus, tales esse uideamur; etsi in eo ipso uis ma-
xima est, ut simus ij, qui haberi uelimus: tamen quæ-
dam præcepta danda sunt. nam si quis ab ineunte æta-
te habet causam celebritatis, & nominis, aut à patre
acceptam, quod tibi mi Cicero arbitror contigisse; aut
aliquo casu, atq; fortuna; in hunc oculi omnium conij-
ciuntur, atque in eo, quid agat, quemadmodum uiuat,
inquiritur, & tanquam in clarissima luce uersetur, ita
nullum obscurum potest nec dictum elus esse, nec fa-
ctum: quorum autem prima ætas propter humilita-
tē, & obscuritatem in hominum ignoratione uersatur,
hi, simul ac iuuenes esse coeperunt, magna spectare, &
ad ea rectis studijs debent contendere. quod eo firmiore
animo facient, quia non modo non inuidetur illi ætati,
uerū etiam fauetur. Prima igitur est adolescenti com-
médatio ad gloriam: si qua ex bellicis rebus comparari
potest, in qua multi apud maiores nostros extiterunt:
semper enim ferè bella gerebantur. tua autem ætas in-

cidit in id bellum, cuius altera pars sceleris n̄m̄ium habuit altera felicitatis parum. quo tamen in bello, cum te Pompeius alæ alteri præfecisset, magnam laudem et à summo uiro, et ab exercitu consequere, equitādo, iaculando, omnia militari labore tolerando. atque ea quidem tua laus pariter cum Rep. cecidit. mihi autem hæc oratio suscepta nō de te est, sed de genere toto. quā obrem ad ea, quæ restant, pergamus. Ut igitur in reliquis rebus multo maiora sunt opera animi, quàm corporis: sic et res, quas persequimur ingenio, ac ratione, gratiores sunt, quàm illæ, quas uiribus. prima igitur commendatio proficiscitur à modestia, tum pietate in parentes, tum in suo beneuolentia. facillime autem in optimam partem cognoscuntur adolescentes, qui se ad claros, & sapientes uiros, bene consulentes Reip. contulerunt. quibuscum si frequentes sunt, opinionem afferunt populo, eorum fore se similes, quos sibi ipsi delegerunt ad imitandum. P. Rutilij adolescentiam ad opinionem & innocentia, & iuris scientia P. Mutij commendauit domus: nam L. quidem Crassus, cum esset admodum adolescens, nō aliunde mutuatus est, sed sibi ipse peperit maximā laudem ex illa accusatione nobili, & gloriosa. & qua ætate qui exercetur, laude affici solent; ut de Demosthene accepimus: ea ætate L. Crassus ostendit, id se in foro optime iā præmeditatū facere, quod etiam tum poterat domi cum laude meditari. sed cum duplex sit ratio orationis, quarum in altera sit sermo, in altera contentio: non est id dubium, quin contentio orationis plurimum possit, & maiorem uim habeat ad gloriam; ea est enim, quam eloquentiā

dicimus: sed tamen difficile dictu est, quanto opere cōciliet animos hominū comitas, affabilitasq; sermonis. exstant epistolæ et philippi ad Alexandrum, et Antipatri ad Cassandrū, et Antigoni ad Philippum, triū prudentissimorum, (sic enim accepimus) quibus præcipiunt, ut oratione benigna multitudinis animos ad beneuolentiā alliciant, militesq; blando appellādo sermone deliniāt. quæ autē in multitudine cū contentione habetur oratio, ea sæpe uniuersam excitat gloriā: magna est enim admiratio copiose, sapienterq; dicētis: quē qui audiūt, intelligere etiam, et sapere plus, quā ceteros arbitrat̃tur. si uero inest in oratione mixta modestiæ grauitas, nil admirabilius fieri pōtest, eoq; magis, si ea sunt in adolescente. sed cum sint plurima causarū genera, quæ eloquentiam desiderant; multiq; in nostra Rep. adolescentes et apud iudices, et apud senatum dicendo laudem affecuti sint: maxima admiratio est in iudijs. quorum ratio duplex est: nam ex accusatione, et defensione constat: quarum et si laudabilior est defensio, tamen etiā accusatio probata persæpe est. dixi paulo ante de Crasso: idem fecit adolescēs M. Antonius: etiā P. Sulpitij eloquentiam accusatio illustrauit, cum seditio sum, et inutilem ciuem C. Norbanum in iudicium uocauit. sed hoc quidem non est sæpe faciendum; nec unquam, nisi aut Reip. causa, ut duo Luculli; aut patrocinii, ut nos pro Siculis, pro Sardis; pro M. Albutio Iulius Cæsar. in accusando etiam M. Aquilio L. Fusi cognita industria est. semel igitur, nō sæpe certe. sin erit, cui faciendum sit sapius; Reip. tribuat hoc muneris; cuius inimicos ulcisci sæpe, nō est reprehendendū: modus

tamē ad sit. duri enim hominis, uel potius uix hominis uidetur, periculum capitis inferre multis: id enim tum periculosum ipsi est, tū etiam sordidum ad famā, committere, ut accusator nominetur: quod contigit M. Bruto summo genere nato, illius filio, qui turis ciuilis in primis peritus fuit. atq; etiam hoc præceptum officij diligenter tenendum est, ne quē unquam innocentem in iudicium capitis arcessas: id enim sine scelere fieri nullo pacto potest: nam quid est tam inhumanum, quā eloquentiam, à natura ad salutem hominum, et ad cōseruationem datam, ad bonorum pestem, perniciemq; conuertere? nec tamen, ut hoc fugiendum est, ita habendum est religioni contrarium, nocentem aliquādo, & nefarium, impiumq; defendere. uult hoc multitudo, patitur consuetudo, fert etiam humanitas. iudicis, est, semper in causis uerum sequi; patroni, nonnunquam uerisimile, etiam si minus sit uerum, defendere: quod scribere, præsertim cum de philosophia scriberē, non auderem, nisi idem placeret grauissimo Stoicorū Panætio. maxime autem & gloria paritur, & gratia defensionibus, eoq; maior, si quādo accidit, ut ei subueniatur qui potentis alicuius opibus circūueniri, uergeriq; uideatur; ut nos & sepe aliā, & adolescentes contra L. Syllā dominantis opes pro Sex. Roscio Amerino fecimus: quā, ut scis, extat oratio. Sed expositis adolescentium officijs, quæ ualeant ad gloriam adipsiscendam, deinde de beneficētia, ac liberalitate dicēdū est. cuius est ratio duplex: nam aut opera benigne sit indigentibus aut pecunia. facilior est hæc posterior, lo=

cupletii præsertim; sed illa lautior, ac splendidior, et ui=

ro forti,claroq; dignior:quanquam enim in utroque
 inest gratificandi liberalis uoluntas; tamen altera ex
 arca,altera ex uirtute depromitur;largitioq; , quæ sit
 ex re familiari,fontem ipsum benignitatis exhaurit:
 ita benignitate benignitas tollitur: qua quo in plures
 usus sis,eo minus in multos uti possis.at,qui opera, id
 est uirtute,et industria benefici,et liberales erunt,præ-
 mium,quo pluribus profuerint,eo plures ad benigne fa-
 ciendū adiutores habebunt:deinde cōsuetudine beneficē-
 tiæ paratiores erūt, & tanquā exercitatiores ad bene-
 de multis promerendū.præclare in epistola quadā Ale-
 xandrum filiū Philippus accusat,quòd largitione be-
 neuolentiam Macedonum consecetur.quid te(malū)
 inquit, rationis in istā spem induxit,ut costibi fideles
 putares fore,quos pecunia corrupisses?an tu id agis,ut
 Macedones non te Regem suum, sed ministrum & præ-
 bitorē putent? quo quid sordidius Regi? melius etiam
 quòd largitionem corruptelam dixit esse:sit enim dete-
 rior qui accipit, atque ad idem semper expectandum
 paratior.hoc ille filio:sed præceptum putemus omni-
 bus.quamobrem id quidem non est dubium,quin illa
 benignitas,quæ constat ex opera,& industria,et hone-
 stior sit,& latius pateat,& possit prodesse pluribus.
 nonnunquam tamen est largiendum:nec hoc benigni-
 tatis genus omnino repudiandum est:& sæpe idoneis
 hominibus indigentibus de re familiari impertiendū,
 sed diligenter,atq; moderate:multi enim patrimonia
 effuderunt inconsulte largiendo:quid autem est stul-
 tius,quàm,quod libèter factas,curare, ut id diutius fa-
 cere non possis:atq; etiam sequuntur largitionem ra-

pinæ: cum enim dando egere cœperunt, alienis bonis
 manus afferre coguntur: ita, cum beneuolentiæ cōpa
 randæ causa benefici esse uelint, non tanta studia asse
 quuntur eorum, quibus dederunt: quanta odia eorū,
 quibus ademerunt. quamobrem nec ita claudenda est
 res familiaris, ut eam benignitas aperire nō possit; nec
 ita referanda, ut pateat omnibus: modus adhibeatur,
 isq; referatur ad facultates. omnino meminisse debe
 mus id, quod à nostris hominibus sapissime usurpatū,
 itaq; in prouerbiū consuetudinē uenit, largitionē fundū
 non habere: etenim quis potest esse modus, cū & ijs
 dem q ui consueuerunt, & illud idem alij desiderent?
 omnino duo sunt genera largorum, quorum alteri pro
 digi, alteri liberales: prodigi, qui epulis, et uiscerationi
 bus, et gladiatorum muneribus, ludorum, uenationūq;
 apparatu pecunias profundunt in eas res, quarum me
 moriam aut breuem, aut nullā sint reliēturi omnino.
 liberales, autem, qui suis facultatibus aut captos à præ
 donibus redimunt, aut æs alienum susciunt amicorū
 causa, aut in filiarum collocatione adiuuant, aut opitu
 lantur uel in re quærenda, uel augenda. itaq; miror,
 quid in mentem uenerit Theophrasto in eo libro, quē
 de diuitijs scripsit; in quo multa præclare, illud absur
 de: est enim multus in laudanda magnificentia, & ap
 paratione popularium munerum: taliumq; sumptuū
 facultatē, fructum diuitiarum putat. mihi autem ille
 fructus liberalitatis, cuius exempla pauca posui, multo
 & maior uidetur, & certior. quanto Aristoteles gra
 uius, et uerius nos reprehendit, qui has effusiones pecu
 niarū non admiremur, quæ fiunt ad multitudinē deli

niendam, atque, qui ab hostibus obsidentur, si emere
 aquæ sextarium mina cogeretur, hoc primo auditu in-
 credibile nobis uideri, omnesque mirari; sed cum attēde-
 rimus, ueniam necessitati dare; in his immanibus iactu-
 ris, infinitisque sumptibus nihil nos magnopere mirari;
 cum præsertim neque necessitati subueniatur, nec digni-
 tas augeatur; ipsaque illa delinitio multitudinis ad bre-
 ue tempus, exiguumque duratura sit, eaque à leuissimo
 quoque animo; in quo tamen ipso una cum satietate me-
 moria quoque moriatur uoluptatis. bene etiam colligi-
 tur, hæc pueris, et multerculis, et seruis, et seruorum
 simillimis liberis esse grata; graui uero homini, et ea,
 quæ fiunt, iudicio certo ponderanti, probari posse nullo
 modo. quanquam intelligo, in nostra ciuitate inuete-
 rasse iam bonis temporibus, ut splendor Aedilitatum
 ab optimis uiris postuletur. itaque P. Crassus cum co-
 gnomine Diues, tum copiis functus est. Aedilitio maxi-
 mo munere. et paulo post L. Crassus cum omnium
 hominum moderatissimo Q. Mutio magnificētissima
 Aedilitate functus est: deinde C. Claudius App. filius:
 multi post, Lucullus, Hortensius, Silanus. omnes autem
 P. Lentulus me Consule uicit superiores: hunc est Scau-
 rus imitatus. magnificentissima uero nostri Pompeij,
 munera secundo Consulatu. in quibus omnibus, quid
 mihi placeat, uides. uitanda tamen est suspicio auaritiæ:
 nam Mamercus homini ditissimo prætermisso Aedilita-
 tis, Consulatus repulsam attulit. quare et, si postula-
 tur à populo, bonis uiris si non desiderantibus, attamen
 approbantibus, factendum est, modo pro facultatibus;
 nos ipsi ut fecimus: et, si quando aliqua res maior, aut

utilior populari largitione acquiritur; ut Orestis nuper
 prandia in semitis decimæ nomine magno honori fue-
 runt. ne M. quidem Seio uitio datum est, quod in cari-
 tate annonæ asse modium populo dedit: magna enim
 se, et inueterata inuidia, nec turpi iactura, quādo erat
 Aedilis, nec maxima liberauit. sed honori summo nu-
 per nostro Miloni fuit, quod gladiatoribus emptis Reipu-
 causa, quæ salute nostra cōtinebatur, omnes P. Clodij
 conatus, furoresque compressit. causa igitur largitionis
 est, si aut necesse est, aut utile. in his autem ipsis medio-
 critatis regula optima est. L. quidem Philippus Q. fi-
 lius, magno uir ingenio, in primisque clarus, gloriari sole-
 bat se sine ullo munere adeptum esse omnia, quæ habe-
 rentur amplissima. dicebat idem Cotta, Curio. nobis
 quoque; licet in hoc quodam modo gloriari: nam pro
 amplitudine honorum, quos cunctis suffragiis adeptus
 sumus nostro quidē anno, quod contigit eorum nemini,
 quos modo nominavi, sanè exiguus sumptus Aedilita-
 tis fuit. atque etiam illæ impensæ meliores sunt, muri,
 naualia, portus, aquarum ductus, omni atque, quæ ad usum
 Reip. pertinent. quanquam, quod præsens tanquam in
 manu datur, iucundius est: tamen hæc in posterum gra-
 tiora, theatra, porticus, noua templa. uerecundius reo-
 prehendo propter Pompeium: sed doctissimi non pro-
 bant; ut et hic ipse Panætius, quem multum in his libris
 secutus sum, non interpretatur; et Phalereus Demetrius,
 qui Periclem principem Græciæ uituperabat, quod tam
 tantam pecuniam in præclara illa Propylea coniecit. sed de
 hoc genere toto in istis libris, quos de Rep. scripsi, diligē-
 ter est disputatum. tota igitur ratio talium largitionum gene-

re vitiosa est temporibus necessaria, et tū ipsa & ad
 facultates accommodanda, & mediocritate moderāda
 est. In illo autem altero genere largiendi, quod à libe-
 ralitate proficiscitur, non uno modo in disparibus cau-
 sis affecti esse debemus. alia causa est eius, qui calamit-
 tate premitur; et eius, qui res meliores quærit nullis
 suis rebus aduersis. propēsius benignitas esse debet in
 calamitosos: nisi forte erunt digni calamitate. in ijs ta-
 men, qui se adiuuari uolent, non ut ne affligantur, sed
 ut ad altiore gradum ascēdant, restricti omnino nul-
 lo modo esse debemus, sed in diligēdis idoneis iudiciū,
 & diligentiam adhibere; nam præclare Ennius.
 Benefacta male locata, malefacta arbitror.
 quod autem tributum est bono uiro, et grato, in eo cū
 ex ipso fructus est, tum etiam ex cæteris: temeritate e-
 nim remota, gratissima est liberalitas: eoque eam studio
 suis plerique laudāt, quod summi cuiusque bonitas cō-
 mune per fugium est omnium. danda igitur opera est,
 ut hos beneficijs quamplurimis afficiamus, quorū libe-
 ris, posterisq; prodatur memoria, ut his ingratiss esse nō
 liceat. omnes enim immemorē beneficij oderunt; eāq;
 inturiam in deterrēda liberalitate sibi etiā fieri, eūq;
 qui faciat, communem hostem tenuiorum putant. at-
 que hæc benignitas etiam Reip. utilis est, redimi è ser-
 uitate captos, locupletari tenuiores: quod quidem uul-
 go solitū fieri ab ordine nostro, in oratione Crassi scri-
 ptum copiose uidemus. hanc ergo consuetudinē benig-
 nitatis largitioni munerum antepono: hæc est grauiū
 hominum, atque magnorum, illa quasi assentatorū po-
 puli, multitudinis leuitatē uoluptate quasi titillantū

conuenit autem tum in dando munificum esse, tum in exigendo non acerbum; in omniq; re contrahenda, uedendo, emendo, conducendo, locando, in uicinitatibus, et consinijs æquum, & facilem, multa multis de iure suo cõcedentem; à litibus uero, quãtum liceat, & nescio an paulo plus etiam quàm liceat, abhorrent: est enim non modo liberale, paulum nõnunquam de suo iure decedere, sed interdum etiam fructuosum. habenda autem est ratio rei familiaris; quã quidem dilabi sinere flagitiosum est; sed ita, ut illiberalitatis, auaritiæq; absit suspicio: posse enim liberalitate uti, nõ spoliante se patrimonio, nimirum est pecuniæ fructus maximus. Recte etiam à Theophrasto est laudata hospitalitas: est enim (ut mihi uidetur) ualde decorum, patere domos hominũ illustrium illustribus hospitibus. idq; etiã Reip. est ornamento, homines externos hoc liberalitatis genere in urbe nostra non egere: est etiam uehementer utile ijs, qui honeste posse multa uolũt, per hospites apud externos populos ualere opibus, & gratia. Theophrastus quidem scribit Cimonẽ Athenis etiam in suos curiales Laciadas hospitalem fuisse: ita enim instituisse, & uillicis imperasse, ut omnia præberentur, quicunque Laciades in uillam suam diuertisset. Quæ autem opera, nõ largitione beneficia dantur, hæc tum in uniuersam Remp. tum in singulos ciues conferuntur: nam in iure cauere, consilio iuuare, atque hoc scientiæ genere prodesse quamplurimis, uehementer & ad opes augendas pertinent, & ad gratiam. itaque cum multa præclara maiorum, tum quamoptime constituti iuris ciuilis summo semper in honore fuit cognitio, atq; interpretatio: quam

quidem ante hanc confusionem temporum in possessione sua principes retinuerunt: nunc, ut honores, ut omnis dignitatis gradus, sic huius scientiæ splendor deletus est; idque eo indignius, quod eo tempore hoc contigit, cum is esset, qui omnes superiores, quibus honore par esset, scientia facile uicisset. hæc igitur opera grata multis, et ad beneficijs astringendos homines accommodata. Atque huic arti finitima est dicendi grauior facultas, et gratior, et ornatio: quid enim eloquentia laudabilius, et prestabilius, uel admiratione audientium, uel spe indigentium, uel eorum, qui defensi sunt, gratia? huic quoque ergo à maioribus nostris est in tota dignitate principatus datus. disertum igitur hominis, et facile laborantis, quodque in patrijs est moribus, multorum causas et non grauate, et gratuito defendentis, beneficia, et patrocinia late patent. admonerat me res, ut hoc quoque loco intermissionem eloquentiæ, ne dicam interitum, deplorarem, nisi uererer, ne de me ipso aliquid uiderer queri. sed tamen uidemus, quibus extinctis oratoribus, quam in paucis spes, quam in paucioribus facultas, quam in multis sit audacia. cum autem omnes non possint, ne multi quidem, aut iuris periti esse, aut disertum; licet tamen opera prodesse multis, beneficia petentem, commendantem iudicibus, et magistratibus, uigilantem pro re alterius, eos ipsos, qui aut consulunt, aut defendunt, rogantem: quod qui faciunt, plurimum gratiæ consequuntur, latissimeque eorum manat industria. iam illud non sunt admonendi (est enim in proptu) ut animaduertant, cum alios iuuare uelint, ne quos offendant: sepe enim aut eos ledunt, quos non debent; aut

eos quos non expedit: si imprudentes, negligentia est; si
scientes, temeritatis. utendum etiā est excusatione ad-
uersus eos, quos inuitus offendas, quacūq; possis, quare
id, quod feceris, necesse fuerit, nec aliter facere potue-
ris. certiq; operis, & officijs erit, quod uiolatū est, com-
pensandū. sed cum in hominibus iuuādis aut mores spe-
ctari, aut fortuna soleat, dictū quidē est procliue, itaq;
uulgo loquuntur, sese in beneficijs collocandis mores
hominum, non fortunam sequi: honesta oratio est: sed
quis est tandem, qui inopis, & optimi uiri causae nō an-
teponat in opera danda gratiam fortunati, & potētis?
à quo enim expeditior, & celerior remuneratio fore uī-
detur, in eum ferē est uoluntas nostra propensior. sed
animaduertendū est diligentius, quae natura rerum sit:
nimirum enim inops ille, si bonus est uir, etiam si refer-
re gratiam nō potest, habere certe potest. commode au-
tem, quicūque dixit: pecuniam qui habeat, non reddi
disse; & qui reddiderit, non habere: gratiam autem
& qui reddiderit, habere; & qui habeat, retulisse. at
qui se locupletes, honoratos, & beatos putant, hi ne obli-
gari quidem beneficio uolunt: quin etiam beneficium
se dedisse arbitrantur, cum ipsi, quamuis aliquod ma-
gnū acceperint, aequē etiam à se aut postulari, aut ex-
pectari aliquid suspicantur: patrociniū uero se ufos,
aut clientes appellari, mortis instar putant. at uero
ille tenuis, cum quid factū sit, sese spectatum, non
fortunam putans, non modo illi, qui est meritis, sed
etiam illis, à quibus expectat (eget enim multis) gra-
tū se uideri studet: neque enim uerbis auget suū
munus, si quo forte fungitur; sed etiam extenuat.

uidendumq; illud idem, quòd, si opulētum, fortunatūq;
 defenderis, in illo uno, aut forte in liberis eius mneat
 gratia; sin autē inopem, probum tamen, & modestum,
 omnes nō improbi humiles, quæ magna in populo mul-
 tudo est, præsidium sibi paratum uident. quamobrem
 melius apud bonos, quàm apud fortunatos beneficium
 collocari puto. danda ominò opera est, ut omni ge-
 neri satisfacere possimus: sed si res in cōtentionem ue-
 niat, nimirum Themistocles est auctōr adhibendus: qui,
 cum consuleretur, utrum bono uiro pauperi, aut minus
 probato diuiti filiam collocaret; ego, inquit, malo ui-
 rum, qui pecunia egeat; quàm pecuniam, quæ uiro.
 sed corrupti mores, deprauatīq; sunt admiratione di-
 uitiarum. quarum magnitudo quid ad unumquen-
 que nostrum pertinet? illum fortasse adiuuat, qui ha-
 bet: ne id quidem semper: sed fac iuuare: potentior
 sanè sit, honestior uero quo modo? quòd si etiam bonus
 erit uir; ne impediant diuitiæ, quo minus iuuetur; modo
 ne adiuent; siq; omne iudicium, non quàm locuples,
 sed qualis quisque sit. Extremum autem præceptum
 in beneficijs; operaq; danda est, ne quid contra æquitatē
 contendas, ne quid per iniuriam: fundamentum enim
 perpetuæ commendationis, & famæ est iustitia: sine
 qua nihil potest esse laudabile. Sed quontiam de eo ge-
 nere beneficiorū dictum est, quæ ad singulos spectant:
 deinceps de ijs, quæ ad uniuersos, quæq; ad Remp. perti-
 nent, disputandum est. Eorū autem ipsorū partim eiuſ-
 modi sunt, ut ad uniuersos ciues pertineant; partim, sin-
 gulos ut attingāt; quæ sunt etiam gratiora. danda est
 opera omnino, si possit, utrisq; nec minus ut etiam sin-
 gulis

gulis consulatur; sed ita, ut ea res aut profit, aut certe ne obsit Reip. C. Gracchi frumentaria magna largitio fuit; exhauriebat igitur aerarium: modica M. Octavij, & Reip. tolerabilis, & plebi necessaria; ergo & ciuibus, & Reip. salutaris. in primis autem videndum erit ei, qui Remp. administrabit, ut suum quisq; teneat, neq; de bonis priuatorum publice diminutio fiat: perniciose enim Philippus in Tribunatu, cum legem agrariam ferret; quam tamen antiquari facile passus est, & in eo vehementer se moderatum præbuit: sed cum in agendo multa populariter, tum illud male; non esse in ciuitate duo millia hominum, qui rem haberent. capitalis omnino oratio est ad æquationem bonorum pertinens: qua peste quæ potest esse maior? hanc enim ob causam maxime, ut sua tenerentur, Resp. ciuitatesq; constitutæ sunt: nam etsi duce natura congregabantur homines, tamē, spe custodiæ rerum suarum, urbiū præsidia quærebant. danda etiam opera est, ne, quod apud maiores nostros sepe fiebat, propter aerarij tenuitatem; assiduitatemq; bellorum tributum sit conferendum; idq; ne eueniat, multo ante erit prouidendum. sin qua necessitas huius muneris alicui Reip. obuenerit (malo enim aiteri, quàm nostræ, ominari: neque tamen de nostra, sed de omni Rep. disputo) danda erit opera, ut omnes intelligant, si salui esse uelint, necessitati esse parendum. atq; etiam omnes, qui Remp. gubernabunt, consulere debent, ut earum rerum copia sit, quæ sunt necessariae. quarum qualis comparatio fieri soleat, et debeat, nō est necesse disputare: est enim in promptu. tamen locus attingendus fuit. caput autem est in omni procuratione

negotij, & muneris publici, ut auaritiæ pellatur etiam minima suspitio. utinam, inquit C. Pontius Samnis, ad illa tempora fortuna me seruasset, & tunc essem natus, quando Romani dona accipere coepissent: nõ essem passus diutius eos imperare. na illi quidem multa secula expectanda fuerunt: modo enim hoc malum in hanc Remp. inuasit: itaq; facile patior: tunc potius Põrium fuisse, si quidem in illo tantum fuit roboris. non dum centum, & decem anni sunt, cum de pecunijs repetundis a L. Pisone lata est lex, nulla antea cum fuisset. at uero postea tot leges, & proximæ quæque duriores; tot rei, tot damnati; tantum Italicum bellum propter iudiciorum metum excitatum; tanta sublatis legibus, & iudicijs expilatio, direptioq; sociorum; ut imbecillitate aliorum, non nostra uirtute ualeamus. laudat Africanum Panætius, quod fuerit abstinens. quidni laudetur? sed in illo alia maiora: laus enim abstinentiæ non hominis est solum, sed etiam temporum illorum. omni Macedonum gaza, quæ fuit maxima, potitus est Paulus, tãtum in ærarium pecuniæ inuexit; ut unius imperatoris præda finem attulerit tributorum: at hic nihil in domum suam intulit præter memoriã nominis sempiternam. imitatus patrem Africanus nihilo locupletior Carthagine euerfa. quid, qui eius collega in Censura fuit, L. Mummius? nunquid copiosior? cum copiosissimam urbem funditus sustulisset, Italiam ornare, quàm domum suam, maluit: quanquam, Italia ornata, domus ipsa uidetur mihi ornator. Nullum igitur uitium est tetrius (ut eò, unde egressa est, referat se oratio) quàm auaritia, præsertim in principibus, & Remp. gubernantibus.

habere enim quæstui Remp. non modo turpe est, sed sceleratum etiam, & nefarium. itaque, quod Apollo Pythius oraculo edidit Spartam nulla re alia, nisi auaritia esse periturâ, is uidetur non solû Lacedæmonijs, sed & omnibus opulētis populis prædixisse. nulla autem re conciliare facilius beneuolentiam multitudinis possunt ijs, qui Reip. præsunt, quàm abstinentia, & cōtinētia: qui uero esse populares uolunt, ob eamq; causam aut agrariam rem tentant, ut possessores suis sedibus pellantur, aut pecunias creditas debitoribus condonandas putant, labefaciunt fundamenta Reip. concordiam primum tollunt, quæ esse non potest, cum alijs adimuntur, alijs condonantur pecuniæ; deinde æquitatem, quæ tollitur omnis, si habere suum cuique non licet: id enim est proprium, ut supra dixi, ciuitatis, atque urbis, ut sit libera, & non sollicita suæ rei cuiusq; custodia. atque in hac perniciē Reip. ne illam quidem consequuntur, quâ putant, gratiam: nam, cui res erepta est, inimicus; cui data est, etiam dissimulat se accipere uoluisse; & maxime in pecunijs creditis occultat suum gaudium, ne uideatur non fuisse soluendo. at uero ille, qui accipit iniuriam, & meminit, & præ se fert dolorem suum. nec, si plures sunt ijs, quibus improbe datum est, quàm illi, quibus iniuste ademptum est, ideo plus etiam ualēt non enim numero hæc iudicantur, sed pondere. quam autem habet æquitatem, ut agrum multis annis, aut etiam seculis ante possessum, qui nullū habuit, habeat; qui autem habuit, amittat? at propter hoc iniuria genus Lacedæmonij Lysandrum Ephorum expulerunt. Agin Regem, quod nūquam antea apud eos acciderat,

necauerunt. ex quo eo tempore tanta discordie secutae
 sunt, ut tyranni existerent, & optimates exterminaren-
 tur, & praeclarissime constituta Resp. dilaberetur. nec
 uero solum ipsa cecidit, sed etiam reliquam Graecam
 euerit contagionibus malorum, quae à Lacedaemonijs
 profectae manarunt latius. quid nostros Gracchos, Ti.
 Gracchi summi uiri filios, Africani nepotes? non ne a-
 gratiae contentiones perdiderunt? at uero Aratus Si-
 cyonius iure laudatur, qui, cum eius ciuitas quinquagin-
 ta annos à tyrannis teneretur, profectus Agris Sicyo-
 nem, clandestino introitu urbe est potitus; cumq; tyrā-
 num Nicoclem improviso oppressisset, sexcentos exules,
 qui fuerant eius ciuitatis locupletissimi, restituit, Rēq;
 pub. aduentu suo liberauit. sed, cum magnam animad-
 uerteret in bonis, & possessionibus difficultatem, quod
 & eos, quos & ipse restituerat, quorum bona alij posse-
 derant, egere iniquissimum arbitrabatur, & quinqu-
 ginta annorum possessiones mouere, non nimis equum
 putabat; propterea quod tam longo spatio multa hae-
 ditatibus, multa emptionibus, multa dotibus detineba-
 tur: sine iniuria, iudicauit, neq; illis adimi, neq; his nō
 satisfieri, quorum illa fuerant, oportere. cum igitur sta-
 tuisset opus esse ad eam rem constituendam pecunia,
 Alexandriam se proficisci uelle dixit, remq; integram
 ad reditum suum iussit esse: isq; celeriter ad Ptolemæū
 suum hospitem uenit, qui tum regnabat aller post Ale-
 xandriam conditam: qui cum exposuisset, patriam se
 liberare uelle, causamq; docuisset, à Rege opulento uir
 summus facile impetrauit, ut grandi pecunia adiuuare-
 tur: quam cum in Sicyonem attulisset, adhibuit sibi in

consillium quindecim principes, cum quibus causas cognouit & eorum, qui aliena detinebant; et eorum, qui sua amiserant; præsecitq; æstimandis possessionibus, et ut persuaderent alijs, ut pecuniam accipere mallent, et possessionibus cederent; alijs, ut commodius putarent numerari sibi quod tanti esset, quàm suū recuperare: ita perfectum est, ut omnes cōstituta cōcordia sine que rela discederent. ò uirum magnum, dignumq;, qui in nostra Rep. natus esset. sic par est agere cum ciuibus, non, ut bis iam uidimus, hastam in foro ponere, et bona ciuitum uoci subijcere præconis. at ille Græcus, id quod fuit sapientis, & præstantis uiri, omnibus consulendū putauit, eaq; est summa ratio, & sapientia summi ciuis, commoda ciuitum defendere, non diuellere, atq; omnes æquitate eadem continere. habitent gratis in alieno. quid ita? ut, cum ego emerim, ædificauerim, tuear, impēdam, tu me inulto fruare meo? quid est aliud, nisi alijs sua eripere, alijs dare aliena? tabula uero noue quid habent argumenti, nisi ut emas mea pecunia fundum, & cum tu habeas, ego non habeam pecuniam? quamobrem, ne sit æs alienū, quod Reip. noceat prouidendum est: quod multis rationibus caueri potest, si hoc non fuerit, ut locupletes suum perdant, debitores lucrētur alienum: nec enim ulla res uehementius Remp continet, quàm fides; quæ esse nulla potest, nisi erit necessaria solutio rerum creditarum: nunquam enim uehemētius actum est, quàm me Consule, ne solueretur; armis, et castris tentata res est ab omni genere hominū, & ordine. quibus sic restiti, ut hoc tantum malum de Rep. tolleretur. nunquam nec maius æs alienū fuit;

nec melius, nec facilius dissolutum est: fraudādi enim spe sublata, soluendi necessitas cōsecuta est. at uero hic noster uictor, nūc quidem uictus, quæ cogitabat, ea per fecit, cum eius iam nihil interesset. tanta in eo peccādi libido fuit, ut hoc ipsum eum delectaret, peccare, etiā si causa non esset. ab hoc igitur genere largitionis, ut alijs detur, alijs auferatur, aberunt ij, qui Remp. tuebūtur; in primisq; operam dabunt, ut iuris, et iudiciorū æquitate suum quisq; teneat et neq; tenuiores propter imbecillitatem circumueniantur, neq; locupletibus ad sua uel tenenda, uel recuperanda obsit inuidia: præterea quibuscunque rebus uel belli, uel domi poterunt, Remp. augeant imperio, agris, uectigalibus. hæc magnorum hominum sunt: hæc apud maiores nostros factitata: hæc genera officiorum qui persequuntur, cum summa utilitate Reipub. magnam ipsi adipiscuntur et gratiam, et gloriam. In his autem utilitatum præceptis Antipater Tyrius, Stoicus, qui Athenis nuper est mortuus, duo præcepta censet esse a Panætio prætermissa, ualitudinis curationem, et pecuniæ. quas res à summo philosopho præteritas arbitror, quod essent faciles: sunt certe utiles. Sed ualitudo sustentatur notitia sui corporis, et obseruatione earū rerum, quæ res aut prodesse soleant, aut obesse; et continentia in uictu omni atq; cultu, corporis tuēdi causa, et prætermittendis uoluptatibus; postremo arte eorum, quorum ad scientiā hæc pertinent. Res autem familiaris quæri debet ijs rebus, à quibus abest turpitudine; conseruari autem diligentia, et parsimonia; iisdem etiam rebus augeri. has res commodissime Xenophon Socraticus persecutus est

in eo libro, qui *Oeconomicus* inscribitur. quē nos, ista
ferē atate cum essemus, qua est tu nunc, ē Græco in lati
num conuertimus. Sed utilitatum comparatio (quo
niam hic locus erat quartus à Panatio prætermisus) sæ
pe est necessaria: nam & corporis commoda cum ex
ternis, & externa cum corporis, & ipsa inter se corpo
ris, et externa cum externis comparari solent. cum ex
ternis, corporis hoc modo comparantur; ualere ut ma
lis quā diues esse: cum corporis externa, hoc modo;
diues esse potius, quā maximis corporis uiribus: ipsa
inter se corporis comparantur sic; bona ualētudo uolu
ptati anteponatur, uires celeritati; externorum autē,
ut gloria diuitijs, uectigalia urbana rusticis. ex quo ge
nere comparationis illud est Catonis senis: à quo cum
quæreretur, quid maxime in re familiari expediret,
respondit, bene pascere; quid secundum, satis bene pasce
re; quid tertium, bene uestire; quid quartum, arare:
et, cum ille, qui quæsierat, dixisset; quid fœnerari? tum
Cato, quid hominem, inquit occidere? ex quo, et multis
alijs intelligi debet, utilitatum comparatiōes solere fie
ri, recte q; hoc adiunctum esse quartum exquirendo
rum officiorum genus. sed toto hoc de genere, de quæ
renda, de collocanda pecunia, etiam de utenda, com mo
dius à quibusdam optimis uiris ad medium tanum se
dēribus, quā ab ullis philosophis ulla in schola, dispu
tatur. sunt tamen ea cognoscenda: pertinent enim ad
utilitatem, de qua hoc libro disputandum est. reliqua
deinceps persequemur.

MARCI TVLLII CICERONIS
OFFICIORVM AD MAR-
CVM FILIVM LIBER III.



Scipionem Marce fili, eum, qui pri-
mus Africanus appellatus est, dicere
solitū scripsit Cato, qui fuit ferè eius
æqualis, nunquam se minus ociosum
esse, quàm cum ociosus; nec minus so-
lum, quàm cum solus esset. magnifica uero uox, &
magno ulro, & sapiente digna; quæ declarat illum &
in ocio de negocijs cogitare, & in solitudine secū loqui
solitum; ut neque cessaret unquam, & interdum collo-
quio alterius non egeret. itaque duæ res, quæ languo-
rem afferunt cæteris, illum acuebant, ocium, & soli-
tudo: uellem et nobis hoc idem uere dicere liceret: sed
si minus imitatione tantam ingenij præstantiam conse-
qui possumus, uoluntate certe proxime accedimus: nā
& à Reip. forensibusq; negocijs armis impijs, uiq; pro-
hibiti ocium persequimur; & ob eam causam urbe re-
lictā, rura peragrantes, sæpe soli sumus. sed nec oci-
um hoc cum Africani ocio, nec solitudo cum illa com-
paranda est: ille enim requiescens à Reip. pulcherrimis
muneribus, ocium sibi sumebat aliquando, & à cœtu
hominum, frequentiaq; interdum tanquam in portū
se in solitudinem recipiebat: nostrum autem ocium ne-
gocij inopia, nec requiescendi studio constitutum est: ex-
tincto enim senatu, deleterisq; iudicijs, quid est, quod di-
gnum nobis aut in curia, aut in foro agere possimus?
itaq; in maxima celebritate, atq; in oculis ciuium quō

dam uiximus, nūc fugiētes conspectum sceleratorum,
 quibus omnia redundant, abdimus nos, quantū licet,
 & saepe soli sumus. sed quia sic ab hominibus doctis ac
 cepimus, non solum ex malis eligere minima oportere,
 sed etiam excerpere ex ipsis, si quid inesset boni; pro
 pterea & ocio fruor, non illo quidē, quo debeat is, qui
 quōdam peperisset ocium ciuitati; nec eam solitudinē
 languere patior, quam mihi affert necessitas, nō uolun
 tas, quanquam Africanus maiorem laudem uel meo iu
 dicto assequebatur: nulla tamen eius ingenij monimē
 ta mandata literis, nullū opus ocij, nullum solitudinis
 munus extat. ex quo intelligi debet, illum mētis agita
tlone, inuestigationeq; earum rerū, quas cogitando cō
 sequebatur, nec octosum, nec solum unquam fuisse. nos
 autem, qui nō tantum roboris habemus, ut cogitatioe
 tacita à solitudine abstrahamur, ad hanc scribēdi ope
 ram omne studium, curamq; conuertimus. itaq; plura
 breui tempore euerſa, quā multis annis stante Rep.
 scripsimus. sed cum tota philosophia mi Cicero frugi
 fera, et fructuosa, nec ulla pars eius inculta, ac deserta
 sit; tamen nullus feractor in ea locus est, nec uberior,
 quā de officijs; à quibus constanter, honesteq; uiuen
 di praecepta ducuntur. quare, quanquam à Cratippo
 nostro, principe huius memoriae philosophorum, hoc te
 assidue audire, atq; accipere confido: tamen conducere
 arbitror, talibus aures tuas uocibus undiq; circumsōna
 re, nec eas, si fieri possit, quidquam aliud audire. quod
 cum omnibus est faciendum, qui uitam honestā ingre
 di cogitant: tamen haud scio, an nemini potius, quā
 tibi: suslines enim non paruam expectationem imitā

uel, etia

mim, et r
pauis

uile ee

de industria nostra, magnam honorum, non nullā for-
 tasse nominis suscepisti onus præterea graue & Athe-
 narum, & Cratippi: ad quos cum tanquā ad merca-
 turam bonarum artium sis profectus, inanem redire tur-
 pissimum est, dedecorantem & urbis auctoritatem, et
 magistri. quare, quantum conniti animo potes, quātū
 labore contendere; (si discendi labor est potius, quā
 uoluptas) tantum fac ut efficias; ne ue committas, ut,
 cum omnia suppeditata sint à nobis, tute tibi defuisse
 uideare. sed hæc hætenus: multa enim saepe ad te co-
 hortandi gratia scripsimus. nunc ad reliquam partem
 propositæ diuisionis reuertamur. Panætius igitur, qui
 sine controuersia de officijs accuratissime disputauit,
 quemq; nos correctione quadam adhibita potissimū
 secuti sumus; tribus generibus propositis, in quibus de
 liberare homines, & consultare de officio solerēt; uno,
 cum dubitarent, honestū ne id esset, de quo ageretur,
 an turpe; altero, utile ne esset, an inutile; tertio, si id,
 quod specimē haberet honesti, pugnaret cum eo, quod
 utile uideretur, quomodo ea discerni oporteret: de duo-
 bus generibus primis tribus libris explicauit: de tertio
 autem genere deinceps se scripsit dicturum; nec exol-
 uit, quod promiserat. quod eo magis miror, quia scrip-
 tū à discipulo eius Posidonio est, triginta annos uixisse
 Panætium post quā illos libros edidisset. quem lo-
 cum miror à Posidonio breuiter esse tractatum in qui-
 busdam commentarijs, præsertim cum scribat nullum
 esse locum in tota philosophia tam necessarium, mini-
 me uero assentior ijs, qui negant eū locum à Panætio
 prætermisum, sed consulto relictum, nec omnino scri-

admiror

119
~

bendum fuisse, quia nunquam posset utilitas cū honestate pugnare. de quo alterum potest habere dubitationem, adhibendum ne fuerit hoc genus, quod in diuisione Panætij tertium est, an planè omittendum: alterum dubitari non potest, quin à Panætio susceptum sit, sed derelictum: nam, qui è diuisione tripartita duas partes absoluerit, huic necesse est restare tertiam. præterea in extremo libro tertio de hac parte pollicetur se deinceps esse dicturum. accedit eodem testis locuples Posidonius; qui etiam scribit in quadam epistola, P. Rutilium Rufum dicere solere, qui Panætium audiuerat; ut nemo pictor esset inuentus, qui Veneris eam partem, quæ Apelles inchoatâ reliquisset, absolueret, (oris enim pulchritudo reliqui corporis imitandi spem auferebat) sic ea, quæ Panætius prætermisisset, et nō perfecisset, propter eorum, quæ fecisset, præstantiam neminè esse persecutum. quamobrem de iudicio Panætij dubitari nō potest. recte ne autem hanc tertiam partem ad exquirendum officium adiūxerit, an secus, de eo fortasse dubitari potest. nam siue honestum solum bonum est, ut Stoicis placet; siue, quod honestum est, id ita summum bonum est; quemadmodū Peripateticis nostris uiderur, ut omnia ex altera parte collocata, uix minimi momenti instar habeant: dubitandum non est, quin nunquā possit utilitas cū honestate contēdere. itaq; accepimus; Socratem solitū execrari eos, qui primum hac natura coherentia opinione distraxissent, cui quidem ita sunt Stoici assensi, ut etiam quidquid honestū esset, id utile esse censerent; nec utile quidquā, quod nō honestum. quod si is esset Panætius, qui uirtutem propterea colē

dam diceret, quòd ea efficiens utilitatis esset; ut ij, qui res expetendas uel uoluptate, uel indolentia meriuntur, liceret ei dicere, honestatem aliquàdo cum utilitate pugnare, sed, cum sit is, qui id solum bonū iudicet, quod honestum sit; quæ autem huic repugnent specie quadā utilitatis, eorum neq; accessione meliorem uitam fieri, nec discessione peiorem: nō uidetur huiusmodi debuisse deliberationem introducere; in qua, quod utile uideretur, cum eo, quod honestum est, comparatur. etenim, quod summum bonū à Stoicis dicitur, cōuenienter natura uluere, id habet hāc, ut opinor, sententiam, cum uirtute congruere semper; cetera autem, quæ secundū naturam essent, ita legere si ea uirtuti non repugnarent. quod cum ita sit, putant quidam hanc comparationem recte nō esse introductā, nec omnino de eo genere quidquam præcipiendum fuisse. atq; illud quidē honestum, quod proprie, uereq; dicitur, id in sapiētibus est solis, neq; à uirtute diuelli unquam potest: in ijs autem, in quibus sapiētia perfectā nō est, ipsum illud quidem perfectum honestum nullo modo esse potest, similitudines honesti esse possunt. hæc igitur omnia officia, de quibus his libris disputamus, media Stoici appellāt; & ea cōmunia sunt, & late patent: quæ et ingenij bonitate multi assequuntur, et progressionē discendi. illud autem, quod rectū ijdē appellant, perfectum, atq; absolutum est, & ut ijdē dicunt, omnes numeros habet, nec, præter sapientem, cadere in quenquam potest. cum autem aliquid actum est, in quo media officia cōparantur, id cumulate uidetur esse perfectum; propterea quòd uulgus, quid absit à perfectō, ferè nō ex toto

greci xatā
xor

intelligi; quatenus autem intelligit, nihil putat prætere-
missum, quod autem in poematibus, & in picturis su-
euenit, in alijsq; compluribus, ut delectentur imperiti,
laudentq; ea, quæ laudanda nō sint; ob eam credo cau-
sam, quod insit in his aliquid probi, quod capiat igna-
ros, qui quidem, quid in unaquaq; re uitij sit, nequeant
iudicare. itaq; cum sint docti à peritis, desistunt facile
à sententia. hæc igitur officia, de quibus his libris disse-
rimus, quasi secunda quædam honesta dicunt esse, non
sapientum modo propriæ, sed cum omni hominum ge-
nere cōmunia: itaq; ij omnes, in quibus est uirtutis in-
doles, commouentur. nec uero, cum duo Decij, aut duo
Scipiones fortes uiri commemorantur, aut cum Fabris-
tius, aut Aristides iustus nominatur, aut ab illis fortitu-
dinis, aut ab his iustitiæ, tãquam à sapiente, petitur exē-
plum: nemo enim horum sic sapiens, ut sapientem in-
telligi hic uolumus: nec ij: qui sapientes habiti sunt, &
nominati, M. Cato & C. Lælius, sapientes fuerunt; nec
illi quidem septem; sed ex mediōrum officiorū frequen-
tia similitudinem quandam gerebant, speciemq; sapien-
tium. quocirca nec id, quod uere honestum est, fas est
cum utilis repugnantia comparari: nec id, quod cōmu-
niter appellamus honestum, quodq; colitur ab ijs, qui
bonos se uiros haberi uolunt, cum emolumentis unquā
est comparandum: tamq; id honestum, quod in nostram
intelligentiam cadit, tuendum, conseruandumq; est no-
bis, quā id, quod proprie dicitur, uereq; est honestum,
sapientibus: aliter enim teneri non potest, si qua ad uir-
tutem est facta progressio. sed hæc quidem de ijs, qui cō-
seruatione officiorum existimantur boni. Qui autem

ijs, quæ uidetur utilia, tamen splendidius hæc ab eis dis-
seruntur, quibus, quidquid, honestum est, idem utile ui-
detur, nec uile quidquam, quod non honestum, quam
ab ijs, quibus est honestum, aliquod non utile, aut utile
non honestum. nobis autem nostra Academia magnam
licentiam dat, ut, quodcunq; maxime probabile occur-
rat, id nostro iure liceat defendere. sed redeo ad formu-
lam. Detrahere igitur aliquid alteri, & hominem ho-
minis incommodo suum augere commodum, magis est
contra naturam, quàm mors, quàm paupertas, quàm do-
lor, quàm cætera, quæ possunt aut corpori accidere, aut
rebus externis: nam principio tollit conuictum huma-
num, & societate, si enim sic erimus affecti, ut propter
suum quisq; emolumentum spoliet, aut uiolet alterum,
disrumpi necesse est eam, quæ maxime est secundû na-
turam, humani generis societatem, ut, si unumquodq;
membrum sensum hûc haberet, ut posse putaret se ual-
lere, si proximi membri ualeitudinem ad se traduxisset,
debilitari, & interire totum corpus necesse esset: sic, si
unusquisq; nostrum rapiat ad se commoda aliorum, de-
trahatq; quod cuiq; possit, emolumentum sui gratia, socie-
tas hominum, & communitas euertatur necesse est.
nam, sibi ut quisq; malit, quod ad usum uitæ pertineat,
quàm alteri acquirere, concessum est nõ repugnante na-
tura. illud quidem natura non paritur, ut aliorum spo-
lijs nostras facultates, copias, opes augeamus. neque uero
hoc solum natura, id est iure gentium, sed & legibus
populorum, quibus in singulis ciuitatibus Resp. continē-
tur, eodem modo constitutum est, ut non liceret sui cõ-
modi causa nocere alteri: hoc enim spectant leges, hoc

lib. I. de officiis
 uolunt, incolumem esse ciuium coniunctionē: quā qui
 dirimunt, eos morte, exilio, uinculis, damno coercēt. at-
 que hoc multo magis exigit ipsa naturae ratio, quae est
 lex diuina, et humana: cui parere qui uelit (omnes au-
 tem parebunt, qui secundum naturam uolent uiuere)
 nūquam cōmittet, ut alienum appetat, et id, quod alte-
 ri detraxerit, sibi assumat. etenim multo magis est se-
 cundum naturam celsitas, et animi magnitudo, itemq;
 cōmunitas, iustitia, liberalitas, quā uoluptas, quā ui-
 ta, quā diuitiae. quae quidem cōtemnere, et pro nihilo
 ducere, comparantem cum utilitate cōmuni, magni ani-
 mi, et excelsi est. detrahere autem alteri sui commodi
 causa, magis est contra naturam, quā mors, quā do-
 lor, quā cetera generis eiusdem: itemq; magis est se-
 cundum naturam, pro omnibus gentibus, si fieri possit,
 conseruandis, aut iuuandis maximos labores, molestiasq;
 suscipere, imitantes Herculem illum, quē hominum fa-
 ma beneficiorum memor in concilio cōlestium colloca-
 uit, quā uiuere in solitudine nō modo sine ullis mole-
 stiis, sed etiam in maximis uoluptatibus, abūdamtem om-
 nibus copiis, ut excellas etiam pulchritudine, et uiribus.
 quocirca optimo quisq;, splendidissimoq; ingenio longe
 illam uitam huic anteposit. ex quo efficitur, hominem
 naturae obedientem, homini nocere non posse. deinde,
 qui alterum uiolat, ut ipse aliquid commodi consequa-
 tur, aut nihil se existimat contra naturam facere; aut
 magis fugiendam censet mortem, paupertatem, dolorē
 amissionem etiam liberorum, propinquorum, amicorū
 quā facere cuiquam iniuriam. si nihil existimat con-
 tra naturam fieri hominibus uiolandis: quid cū eo dis-
 seras,

seras, qui omnino hominem ex homine tollat? sin fugiē-
dum id quidē censet, sed multo illa peiora, mortem, pau-
pertatem, dolorem: errat in eo, quōd ullum aut corpora-
ris, aut fortunæ uitium, animi uitijis grauius existimat.
ergo unum debet esse omnibus prop situm, ut eadem sit
utilitas uniuscuiusque, & uniuersorum; quam si ad se
quisq; rapiat, dissoluetur omnis humana cōsociatio. atq;
si etiā hoc natura præscribit, ut homo homini, quicumq;
sit, ob eam ipsam causam tamen, q̄ is homo sit, consultū
uelit, necesse est secūdum eandem naturam omniū uti-
litem esse cōmunem. quod si ita est, una continemur
omnes, & eadem lege naturæ. idq; ipsum si ita est, cer-
te uiolare alterum lege naturæ prohibemur. uerum au-
tem primum: uerum igitur & extremum. nam illud
quidem absurdum est, quod quidam dicunt, parenti se,
aut fratri nihil detracturos cōmodi sui causa: aliam ra-
tionem esse ciuium reliquorū. hi sibi nihil iuris, & nul-
lam societatem communis utilitatis causa statuunt esse
cum ciuibus: quæ sententia omnem societatem distra-
hit ciuitatis. qui autem ciuium rationem dicunt esse
habendam, externorum negant; hi dirimunt commu-
nem humani generis societatem: qua sublata, beneficen-
tia, liberalitas, bonitas, iustitia funditur tollitur: quæ qui
tollunt, etiam aduersus deos immortales impij iudicādi
sunt: ab ijs enim constitutam inter homines societatem
evertūt: cuius societatis arētissimum uinculum est, ma-
gis arbitrari esse contra naturam, hominem homini de-
trahere sui cōmodi causa, quā omnia incommoda sus-
bire uel externa, uel corporis, uel etiā ipsius animi, quæ
uacent iustitia: hæc enim uirtus omnium est domina;

& regina uirtutum. Forsitan quispiam dixerit: non
 ne igitur sapiens, si fame ipse conficiatur, abstulerit ci-
 bum alteri homini ad nullam rem utili? minime uero:
 nō enim mihi est uita mea utilior, quā animi talis af-
 fectio, neminem ut uiolem cōmodi mei gratia. Quid?
 si Phalarim crudelem tyrannum, & immanem uir bo-
 nus, ne ipse frigore conficiatur, uestitu spoliare possit,
 non ne faciat? Hæc ad iudicandum sunt facillima: nam
 si quid ab homine ad nullam partē utili utilitatis tuæ
 causa detraxeris, inhumane feceris, contraq; naturæ le-
 gem: sin autem is tu sis, qui multam utilitatem Reip.
 atq; hominum societati, si in uita remaneas, afferre pos-
 sis; si quid ob eam causam alteri detraxeris, non sit re-
 prehendum: sin autem id non sit eiusmodi, suum
 cuiq; incommodum ferendum est potius, quā de alte-
 rius commodis subtrahendum. non igitur magis est cō-
 tra naturam morbus, aut egestas, aut quid eiusmodi,
 quā detractio, atq; appetitio alieni. sed communis uti-
 litatis dereliectio contra naturam est: est enim iniusta:
 itaq; lex ipsa naturæ, quæ utilitatem hominum conser-
 uat, & continet, decernit profecto, ut ab homine inerti,
 atq; inutiles ad sapientem, bonum, fortemq; uirum trās-
 ferantur res ad uiuendum necessariae; qui si occiderit,
 multum de cōmuni utilitate detraxerit: modo hoc ita
 faciat, ut ne ipse de se bene existimans, seseq; diligens,
 hanc causam habeat ad inturiā. itaq; semper officio
 fungatur, utilitati consulens hominum, & ei, quam sæ-
 pe cōmemoro, humanæ societati. Nam, quod ad Phala-
 rim attinet, per facile iudicium est: nulla est enim socie-
 tas nobiscum tyrannis, sed potius summa distractio:

neq; est contra naturā spoliare eum, si possis, quem honestum est necare. atq; hoc omne genus pestiferum, atque impium ex hominum cōmunitate exterminandū est: etenim, ut membra quædam amputantur, ipsa sanguine, & tanquam spiritu carere cœperunt, & nocent reliquis partibus corporis, sic ista in figura hominis feritas, & immanitas belluæ à cōmuni tanquam humanitate corporis segregāda est. huius generis quæstiones sunt omnes eæ, in quibus ex tempore officiū exquiritur. eiusmodi igitur credo res Panætium persecutum fuisse, nisi aliquis casus, aut occupatio consilium eius præuenisset: ad quas ipsas consultationes ex superioribus libris satis multa præcepta sunt, quibus perspicui possit, quid sit propter turpitudinē fugiendum; quid sit id, quod idcirco fugiendum non sit, quia omnino turpe non est. Sed quoniam operi inchoato, propè tamen absoluto tanquam fastigium imponimus, ut geometræ solent non omnia docere, sed postulare, ut quædam sibi concedantur, quo facilius, quæ uelint, explicent: sic ego à te postulo mi Cicero, ut mihi concedas, si potes, nihil præter id, quod honestū sit, esse propter se expetendum. sin hoc non licet propter Cratippum: at illud certe dabis, quod honestum sit, id esse maxime propter se expetendum. mihi utrūuis satis est; & cum hoc tum illud probabilius uidetur, nec præterea quidquam probabile. Ac primum Panætius in hoc loco defendendus est, q̄ nō utilia cum honestis pugnare dixerit aliquādo posse, (neq; enim ei fas erat) sed ea, quæ uiderentur utilia. nihil uero utile, quod nō idem honestum; nec honestum, quod non idem utile sit, sepe testatur; negatq; ullam pestem

maiolem in uitam hominum inuasiffe, quàm eorū opī-
 nionem, qui ista diftraxerint. itaq; non, ut aliquando an-
 teponeremus utilia honeftis, fed ea fine errore dīdica-
 remus, fi quando incidiffent, induxit eam, quæ uideret-
 ur eſſe, nō quæ eſſet, repugnantiam. hanc igitur partē
in eadem relictam explebimus, nullis adminiculis, fed, ut dicitur,
 Marte noſtro: neque enim quidquam de hac parte poſt
 Panætium explicatum eſt, quod mihi probaretur de ijs,
 quæ in manus meas uenerūt. cum igitur aliqua ſpecies
 utilitatis obiecta eſt, nos commoueri neceſſe eſt. ſed ſi,
 cum animū attenderis, turpitudinem uideas adiunctā
 ei rei, quæ ſpeciem utilitatis attulerit, tunc utilitas non
 requirenda eſt; ſed intelligendum, ubi turpitudō ſit, ibi
 utilitatem eſſe non poſſe. quod ſi nihil eſt tam contra
 naturam, quàm turpitudō, (recta enim, et cōuenientia,
 et conſtantia natura deſiderat, aſpernaturq; contraria)
 nihilq; tam ſecundum naturam, quàm utilitas: certe in
 eadem re utili turpitudō eſſe non poteſt. itemq; ſi ad
 honeſtatem nati ſumus, eaque aut ſola expetenda eſt,
 (ut Zenoni eſt uīſum) aut certe omni pondere grauior
 eſt habenda, quàm reliqua omnia, quod Ariſtotelei pla-
 tet: neceſſe eſt, quod honeſtum ſit, id eſſe aut ſolum, aut
 ſummum bonum; quod autem bonum, id certe utile;
 itaq; quidquid honeſtum, id utile. quare error hominū
 non proborum cum aliquid, quod utile uīſum eſt, arri-
 puit, id continuo ſecernit ab honeſto. hinc ſicæ, hinc ue-
 nena, hinc falſa teſtamenta naſcuntur, hinc furta, hinc
 peculatus, expilationes, direptionesq; ſociorū, & ciuium,
 hinc opum nimiarum potentia non ferenda: poſtremo
 etiam in liberis ciuitatibus exiſtunt regnandi cupiditas

tes: quibus nihil, nec tertius, nec scd ius excogitari potest: emolumenta enim rerum fallacibus iudicijs uident, poenam, non dico legum, quas saepe perumpunt, sed ipsius turpitudinis, quae acerbissima est, non uident. quam obrem hoc quidem deliberantium genus pellatur è medio, (est enim torum sceleratum, & impium) qui deliberant, utrum id sequantur, quod honestum esse uideant, an se scientes scelere contaminent: in ipsa enim dubitatione facinus inest, etiam si ad id non peruenerint: ergo ea deliberanda omnino non sunt, in quibus est turpis ipsa deliberatio. atque etiam in omni deliberatione, coelardi, et occultandi spes, opinioque remouenda est: satis enim nobis (si modo in philosophia aliquid profectimus) persuasum esse debet, si omnes deos, hominesque coelare possumus, nihil tamen auare, nihil iniuste, nihil libidinosè, nihil incontinentè esse faciendum. hinc ille Gyges inducitur à Platone: qui, cum terra discessisset magnis quibusdam imbribus, in illum hiatum descendit, aeneumque equum (ut ferunt fabulae) animaduertit, cuius in lateribus fores essent: quibus apertis, hominis mortui uidit corpus magnitudine inusitata, annulumque aureum in digito; quem ut detraxit, ipse induit. erat autem regius pastor. tum in concilium pastorum se recepit. ibi cum palam eius annuli ad palmam conuerterat, à nullo uidebatur, ipse autem omnia uidebat: idem rursus uidebatur, cum in lucem annulum inuerterat. itaque hac opportunitate annuli usus, Reginae superum intulit; eosque adiutrice Regem dominum interemit, sustulitque; quos ob stare arbitrabatur: nec in his quisquam eum facinoribus potuit uidere. sic repente annuli beneficio Rex ortus est

Lydia. Hunc igitur ipsum annulum si habeat sapiens,
 nihil plus sibi licere putet peccare, quàm si nō haberet
 honesta enim bonis uiris, non occulta quærentur. atq;
 hoc loco philosophi quidā, minime mali illi quidē, sed
 non satis acuti, fictā, & cōmentitiā fabulam dicunt
 prolata a Platone. quasi uero ille aut factū id esse;
 aut fieri potuisse defendat. hæc est uis huius annuli, et
 huius exempli; si nemo sciturus, nemo ne suspicaturus
 quidem sit, cum aliquid diuitiarum, potentiae, domina-
 tionis, libidinis causa feceris, si id dijs, hominibusq; futu-
 rum sit semper ignotum, sis ne facturus. negāt id fieri
 posse. quanquam nō potest id quidem: sed quæro,
 quod negant posse, id si posset, quidnā facerent? urgente
 rustice sanē: negant enim posse, & in eo perstant: hoc
 uerbum quid ualeat, nō uident: cum enim querimus,
 si possint coelare, quid facturi sint; non querimus, pos-
 sint, ne coelare; sed tanquam tormenta quædā adhibe-
 mus, ut, si responderint se impunitate proposita factu-
 ros, quod expediat, facinorosos se esse fateantur; negēt,
 omnia turpia per se ipsa fugienda esse concedant. sed
 iam ad propositum reuertamur. incidunt, sæpi multæ
 causæ, quæ conturbant animos utilitatis specie, nō, cū
 hoc deliberetur, relinquenda ne sit honestas propter uti-
 litatis magnitudinem (nam id quidem improbū est)
 sed illud, possit ne id, quod utile uideatur, fieri nō tur-
 piter. cum Collatino Tarquinio collega Brutus impe-
 riū abrogabat, poterat uideri facere id iniuste: fuerat
 enim in Regibus expellendis socius Bruti, consiliorum
 etiam adiutor. cum autem consilium hoc principes ce-
 pissent, cognationem Superbi, nomēq; Tarquiniorū, et

memoriam regni esse tollendam, & erat utile patriæ
 consulere; id erat ita honestum, ut etiam ipsi Collatino
 placere deberet. itaque utilitas ualuit propter honesta-
 tem: sine qua nec utilitas quidem esse potuisset. at in
 eo Rege, qui urbem condidit, non ita: species enim uti-
 litatis animum pepulit eius: cui cum uisum esset utili-
 us, solum se quam cū altero regnare, fratrem inter-
 emit. omisit hic & pietatem, & humanitatem, ut id,
 quod utile uidebatur, neq; erat, assequi posset. et tamē
 muri causam opposuit specimen honestatis, nec proba-
 bilem, nec satis idoneā. peccauit igitur, pace uel Quiri-
 ni, uel Romuli dixerim. nec tamen nostræ nobis utilita-
 tes omittēdæ sunt, alijsq; tradēdæ, cū his ipsi egeamus:
 sed suæ cuiq; utilitati, quod sine alterius iniuria fiat,
 seruiendū est. scite Chrysippus, ut multa; qui stadium,
 inquit, currit, eniti, et contēdere debet, quam maxime
 possit, ut uincat; supplantare eum, quicum certet, aut
 manu depellere nullo modo debet. sic in uita sibi quēq;
 petere, quod pertineat ad usum, non iniquum est; alte-
 ri surripere, ius non est. maxime autem perturbantur
 officia in amicitijs: quibus & non tribuere, quod recte
 possis; & tribuere, quod non sit æquū, contra officium
 est. sed huius generis totius breue, et non difficile præ-
 ceptum est: quæ enim uidentur utilia, honores, diuitiæ,
 uoluptates, et cetera generis eiusdem, hæc amicitie nū-
 quam anteponēda sunt. at neq; contra Remp. neq; cō-
 tra iusiurandum, ac fidē: amici sui causa uir bonus fa-
 ciet; nec si iudex quidē erit de ipso amico: ponit enim
 personam amici, cum induit iudicis. tantum dabit amī-
 citiæ, ut ueram amici causam esse malit; ut perorandæ

elephantus

day

litis tempus, quoad per leges liceat, accommodet. cum
 uero iurato dicenda sententia sit, meminerit deū se ad
 hibere testē, id est (ut ego arbitror) mentem suam, qua
 nihil homini dedit ipse deus diuinius. itaq; præclarum
 à maioribus accepimus morem rogandi iudicis, si eum
 teneremus: QVAE salua fide facere possit. hæc roga-
 rio ad ea pertinet, quæ paulo ante dixi honeste amico
 à iudice posse concedi: nā si omnia facienda sint, quæ
 amici uelint, non amicitiae tales, sed coniurationes pu-
 tādæ sunt. loquor autē de cōmunibus amicitijs: nā in
 sapiētibus uirtis atq; perfectis nihil potest esse tale. Da-
 monem, & Pythiam Pythagoreos ferunt hoc animo in-
 ter se fuisse, ut, cum eorum alteri Dionysius tyrannus
 diem necis destinauisset, et is, qui morti addictus esset,
 paucos sibi dies cōmendātorum suorum causa postula-
 uisset, uas factus sit alter eius sistendi; ut, si ille non re-
 uertisset ad diem, moriendū esset sibi ipsi. qui cum ad
 diem se recepisset, admiratus eorum fidē tyrānus, peti-
 uit, ut se in amicitiam tertium ascriberent. cum igitur
 id, quod utile uidetur in amicitia, cū eo, quod honestū
 est, cōparatur, iaceat utilitatis species, ualeat honestas.
 cū autem in amicitia, quæ honesta non sunt postulabū-
 tur, religio, & fides anteponantur amicitiae: & sic ha-
 bebitur is, quē exquirimus, delectus officiij. sed utilitatis
 specie in Rep. sæpissime peccatur, ut in Corinthi distur-
 batione nostri, durius etiam Athenienses, qui sciuerunt,
 ut Aeginetis, qui classe ualebant, pollices præciderētur.
 hoc uisum est utile: nimis enim imminebat propter pro-
 pinquitatē Aegina Piræo sed nihil, quod crudele, utile:
 est enim hominū naturæ, quā sequi debemus, maxime

inimica crudelitas. male etiam, qui peregrinos urbibus
 uti prohibent, eosq; exterminant, ut Petronius apud pa-
 tres nostros, Papius nuper. nam esse pro ciue, qui ciuis
 non sit, rectum est non licere; quam tulerunt legem sa-
 pientissimi consules Crassus, et Scauola: usu uero ur-
 bis prohibere peregrinos, sanè inhumanum est. illa præ-
 clara, in quibus publicæ utilitatis species præ honestate
 contemnitur. plena exemplorum est nostra Resp. cum
 sæpe aliàs, tum maxime bello Punico secundo; quæ Cā-
 nesi calamitate accepta maiores animos habuit, quàm
 unquam rebus secundis. nulla fuit timoris significatio,
 nulla mentio pacis. tanta uis est. honesti, ut speciè uti-
 litatis obscureretur. Athenienses cum Persarum impetum
 nullo modo possent sustinere, statuerentq; ut urbe reli-
 cta, coniugibus, et libris Troæzene depositis, naues con-
 scenderent, libertatēq; Græciæ classe defenderent, Cyr-
 silium quendam suadentem, ut in urbe manerēt, Xer-
 xesq; reciperent, lapidibus obruerunt. atq; ille sequi
 utilitatem uidebatur: sed ea nulla erat repugnāte ho-
 nestate. Themistocles post uictoriam eius belli, quod
 cum Persis fuit, dixit in concione se habere consilium.
 Reip. salutare, sed id sciri opus non esse: postulauit, ut
 aliquem populus daret, quicum communicaret. datus
 est Aristides. huic ille classem Lacedæmoniorum, quæ
 subiecta esset ad Gythium, clam incendi posse; quo fa-
 cto frangi Lacedæmoniorum opes necesse esset. quod
 Aristides cum audiisset, in concionem magna expecta-
 tione uenit, dixitq; perutile esse consiliū, quod Them-
 istocles afferret, sed minime honestum. itaq; Athenienses,
 quod honestum non esset, id ne utile quidem puta-

peruigil

collat

runt, totamq; eam rem, quam ne audiuissent quidē,
 auctore Aristide repudiauerunt: melius hi, quam nos,
 qui piratas immunes, socios uectigales habemus. ma-
 neat ergo, quod turpe sit, id nunquam esse utile, ne tū
 quidem, cum id, quod esse utile putes, adipiscare: hoc
 enim ipsum utile putare, quod turpe sit, calamitosum
 est. sed incidunt (ut supra dixi) sæpe causæ, cum repu-
 gnare utilitas honestati uideatur, ut animaduertendū
 sit, repugnet ne planē, an possit cū honestate coniungi.
 eius generis hæ sunt quæstiones: si, exempli gratia, uir
 bonus ab Alexandria profectus Rhodum magnū fru-
 menti numerum aduexerit in Rhodiorum inopia, et fa-
 me, summaq; annonæ caritate, si idem sciat cōplures
 mercatores ab Alexandria soluisse, nauesq; in cursu fru-
 mento onustas petētes Rhodum uiderit, dicturus ne sit
 id Rhodijs, an silentio suū quamplurimo uenditurus.
 sapientem, et bonum uirum fingimus; de eius delibera-
 tione, et consultatione quærimus, qui cœlaturus Rho-
 dios non sit, si id turpe iudicet; sed dubitet, an turpe nō
 sit. in huiusmodi causis aliud Diogeni Babilonio uide-
 ri solet, magno, et graui Stoico; aliud Antipatro disci-
 pulo eius, hominī acutissimo: Antipatro, omnia patefa-
 cienda, ut ne quid omnino, quod uēditor norit, emptor
 ignoret; Diogeni, uenditorem, quatenus iure civili con-
 stitutū sit, dicere uirtia oportere, cætera sine insidijs age-
 re, et, quoniā uendat, uelle quamoptime uendere. ad-
 uexi, exposui; uendo meum non pluris, quā ceteri;
 fortasse etiam minoris, cum maior est copia: cui sit in-
 iuria exoritur Antipatri ratio ex altera parte. quid
 agis? tute, cum hominibus consulere debeas, et seruire

humanae societati; eaq; lege natus sis, ut ea habeas principia naturae, quibus parere, et quae semper sequi debeas, ut utilitas tua, communis utilitas sit, uicissim et aequae communis utilitas, tua sit: coelabis homines, quid ijs ad sit & commoditatis, & copiae? respondebit Diogenes fortasse sic: aliud coelare, aliud est tacere: neque ego nunc te coelo, si tibi non dico, quae natura deorum sit, quis sit finis bonorum: quae tibi plus prodesse cognita, quam tritici uilitas: sed non, quidquid tibi audire utile est, id mihi dicere necesse est. immo uero, inquit ille, necesse est: si quidem inter homines natura memini nisi coniunctam societatem. memini, inquit ille: sed num ista societas talis est, ut nihil suum cuiusque sit? quod si ita est, nec uendendum quidem quidquam est, sed donandum. uides in hac tota disceptatione non illud dici: quamuis hoc turpe sit, tamen, quoniam expediat, faciam; sed ita expedire, ut turpe non sit: ex altera autem parte, ea re, quia turpe sit, non esse faciendum. uendat aedes uir bonus propter aliqua uitia, quae ipse norit, caeteri ignoret: pestilentes sint, et habeantur salubres: ignoretur in omnibus cubilibus apparere serpentes: male materiatae, ruinosae: sed hoc praeter dominum nemo sciat: quero, si hoc emptoribus uenditor non dixerit, aedesq; uendiderit pluris multo quam se uediturum putarit, num id iuste, aut improbe fecerit? ille uero, inquit Antipater, improbe facit: quid enim est aliud erranti uiam non monstrare, quod Athenis execrationibus publicis sancitum est, si hoc non est, emptorem pati ruere, & per errorem in maximam fraudem incurre re? plus etiam est, quam uiam non monstrare: nam

est, scientem in errorem alterum inducere. Diogenes contra: num te emere coegit, qui ne hortatus quidem est: ille, quod non placebat, proscripsit: tu, quod placebat, emisisti. quod si, qui proscribunt uillam bonam (ut ipsi asserunt) beneque aedificatam, non existimantur sefellisse, etiam si illa ne bona est, nec aedificata ratione: multo minus, qui domum non laudarunt: ubi enim iudicium emptoris est, ibi fraus uenditoris quae potest esse? sin autem dictum non omne praestandum est: quod dictum non est, id praestandum putas? quid uero est stultius, quam uenditorem eius rei, quam uendat, uitia narrare? quid autem tam absurdum, quam si domini iussu ita praeco praedicet, domum pestilentem uendo? sic ergo in quibusdam causis dubijs, ex altera parte defenditur honestas; ex altera ita de utilitate dicitur, ut id, quod uile uideatur, non modo honestum facere sit, sed etiam, non facere turpe. haec est illa, quae uidetur utilium fieri cum honestis saepe, dissensio: quae diiudicanda sunt: non enim, ut quae reremus, exposuimus, sed ut explicaremus. non igitur uidetur nec frumentarius ille Rhodius, nec hic aedium uenditor coelare emptores debuisse: neque enim id est coelare, quidquid reticeas: sed cum, quod tu scias, id ignorare emolumentum tui causa uelis eos, quorum inter sit id scire. hoc autem coelandi genus quale sit, et cuius hominibus, quis non uidet? certe non aperti, non simplicis est, non ingenui, non iusti, non uiri boni; uersuti potius, obscuri, astuti, fallacis, malitiosi, callidi, ueteratoris, uasfri. haec tot, et alia plura non ne inutile est uitiorum subire nomina? quod si uituperandi sunt, qui reticuerunt: quid de ijs existimandum est, qui orationis uanitatem

adhibuerunt? C. Canius eques R. homo nec infacetus,
& satis literatus, cum se Syracusas otiaudi causa, non
negotiaudi (ut ipse dicere solebat) contulisset, diētitabāt
se hortulos aliquos uelle emere, quò inuitare amicos, &
ubi se oblectare sine interpellatoribus posset, quod cum
percrebuisset, Pythius ei quidam, qui argentariam face
ret Syracusis, dixit, uenales quidem se hortos non habe
re, sed licere uti Canio, si uellet, ut suis: & simul ad coe
nam inuitauit in posterum diem. cum ille promississet,
tum Pythius, ut argentarius, qui esset apud omnes ordi
nes gratosus, piscatores ad se conuocauit, & ab ijs peti
uit, ut ante suos hortulos postera die piscarentur; di
xitq; , quid eos facere uellet. ad coenam tempore uenit
Canius. opipare paratum erat conuiuium. cymbarum
ante oculos multitudo. pro se quisq; , quod ceperat, affe
rebat. ante pedes Pythij pisces abiciebantur. tum Ca
nius, quæso, inquit, quid est ò Pythi, tantum ne piscium?
tantum ne cymbarum? & ille, quid mirum? inquit:
hoc loco est, Syracusis quidquid est piscium: hic aqua
rio: hac uilla isti carere non possunt. incensus Canius
cupiditate, contendit à Pythio, ut uenderet. grauare ille
primo. quid multa? impetrat: emit homo cupidus, &
locuples tanti, quanti Pythius uoluit, et emit instructos
nomina facit: negotium conficit. inuitat Canius poste
ra die familiares suos: uenit ipse mature: scalmum nul
lum uidet: quærit ex proximo uicino, num ferie quæ
dam piscatorum essent, quòd eos nullos uideret: nullæ,
quod sciam, inquit ille: sed hic piscari nulli solent: itaq;
heri mirabar, quid accidisset. stomachari Canius: sed
quid faceret? non dum enim Aquilius collega, & fami

liaris meus protulerat de dolo malo formulas. in quibus ipsis, cum ex eo quærerem, quid esset dolus malus; respondebat, cum esset aliud simulatum, aliud actum. hoc quidem sanè luculenter, ut ab homine perito definiendi. ergo & Pythius, & omnes aliud agentes, aliud simulantes, perfidi, improbi, malitiosi sunt. nullum igitur factum eorum potest utile esse, cum sit tot uitijs inquinatum. quòd si Aquiliana definitio uera est, ex omni uita simulatio, dissimulatioq; tollenda est. ita nec, ut emat melius, nec, ut uendat, quisquā simulabit, aut dissimulabit uir bonus. atque iste dolus malus etiam legibus erat uindicatus: ut tutela Duodecim tabulis, & circumscriptio adolescentium lege Pleatoria, & sine lege, iudicijs, in quibus, EX FIDE BONA, additur. reliquorum autem iudiciorum hæc uerba maxime excellent, in arbitrio rei uxoria, MELIUS, AEQUIUS: in fiducia, UT INTER BONOS BENE AGIER: quid ergo? aut in eo, quod melius, æquius est, potest ulla pars inesse fraudis? aut, cum dicitur, inter bonos bene agier, quidquam agi dolose, aut malitiose potest? dolus autem malus simulatione, & dissimulatione (ut ait Aquilius) continetur. tollendum est igitur in rebus contrahendis omne mendacium. non licitatore uenditor, nec, qui contra se liceatur, emptor opponet: uterq; si ad loquendum uenerit, non plus, quàm semel, loquetur. Quintus quidem Scæuola P. filius, cum postulat, ut sibi fundus, cuius emptor erat, semel indicaretur, idq; uenditor ita fecisset, dixit se pluris æstimare, ad didit centum millia. nemo est, qui hoc uiri boni fuisse neget: sapientis negant: ut si minoris, quàm potuisset,

uendidisset. hæc igitur est illa pernicies, quod alios bonos, alios sapientes existimant. ex quo Ennius: Nequidquam sapere sapientem, qui sibi ipsi prodesse nequiret. uere id quidem, si, quid esset prodesse, mihi cum Ennio conueniret. Hecatonem quidem Rhodium, discipulum Panætij, uideo in ijs libris, quos de officijs scripsit. Quod Tu beroni, dicere, sapientis esse, nihil contra mores, leges, instituta facientem, habere rationem rei familiaris: neque enim solū nobis diuites esse uolumus, sed liberis, propinquis, amicis, maximeque Reip. singulorum enim facultates, et copie, diuitiæ sunt ciuitatis. huic Scauolæ factum, de quo paulo ante dixi, placere nullo modo potest: etenim omnino se negat facturū compendij sui causa, quod nō liceat. huic nec laus magna tribuenda est, nec gratia. sed siue et simulatio, et dissimulatio dolus malus est, per pauca res sunt, in quibus dolus iste malus nō uersetur: siue uir bonus est is, qui prodest, quibus potest, nocet nemini, recte iustum uirum, bonum non facile reperiemus. nunquam igitur est utile peccare, quia semper est turpe: et quia semper est honestum uirum bonum esse, semper est utile. ac de iure quidem prædiorū sancitum est apud nos iure ciuili, ut in his uendendis uictoria etiam dicerentur, quæ nota essent uenditori. nam, cum ex Duodecim tabulis satis esset cautum, ea præstari, quæ essent lingua nūcupata, quæ qui inficiatus esset, duplicem pœnam subiret: à iurisconsultis etiam reticentiæ pœna est constituta: quidquid enim inest prædio uitij, id, statuerunt, si uenditor sciret, nisi nominatim dictum esset, præstari oportere. ut, cum in arce augurium Augures acturi essent, iussissentque T. Claudium

Laila

Centimalum, qui ædes in Cælio monte habebat, demoli-
 ri eas, quarum altitudo officeret auspicijs: Claudius
 proscripsit, insulam uendidit: emit P. Calphurnius Lan-
 rius. huic ab Auguribus illud idem denunciatum est.
 itaque Calphurnius, cum demolitus esset, cognouissetq;
 claudium ædes postea proscripsisse, quàm esset ab Aus-
 guribus demoliri iussus, arbitrum illum adegit: QUID
 QUID sibi de ea re facere oporteret ex fide bona. M.
 Cato sententiam dixit, huius nostri Catonis pater: ut
 enim ceteri ex patribus, sic hic, qui illud lumen proge-
 nuit, ex filio est nominandus. is igitur iudex ita pronun-
 ciauit: cum in uenundando rem eam scisset, et nō pro-
 nunciauisset, emptori damnum præstari oportere. igitur
 ad fidem bonam statuit pertinere, notū esse empto-
 ri uitium, quod nosset uenditor. quod si recte iudica-
 uit, non recte frumentarius ille, non recte ædium pesti-
 lentium uenditor tacuit. sed huiusmodi reticentiæ iure
 ciuili omnes comprehendere non possunt; quæ autem pos-
 sunt, diligenter tenentur. M. Marius Gratidianus propin-
 quus noster C. Sergio Orata uendiderat ædes eas, quas
 ab eodem ipse paucis ante annis emerat. hæc Sergio ser-
 uiebant: sed hoc in mancipio Marius non dixerat. ad-
 ducta res in iudicium est. Oratam Crassus, Gratidia-
 num defendebat Antonius. ius Crassus urgebat; quod
 uitium uenditor non dixisset sciens, id oportere præsta-
 ri: aequitatem Antonius; quoniam id uitium ignotum
 Sergio non fuisset, qui illas ædes uendidisset, nihil fuisse
 necesse dici; nec eum esse deceptum, qui id, quod eme-
 rat, quo iure esset, teneret. quorsum hæc? ut illud in-
 telligas, non placuisse maioribus nostris astus. sed aliter
 leges,

leges, aliter philosophi tollūt astutias : leges, quatenus manu tenere res possunt: philosophi, quatenus ratiōe, & intelligentia. ratio igitur hoc postulat, ne quid insidiosè, ne quid simulate, ne quid fallaciter. sunt ne igitur insidiæ, tēdere plagas, etiā si excitaturus nō sis, nec agitaturus? ipsa enim feræ nullo insequente saepe incedūt, sic, tu cum ædes proscribas, tabulam tanquam plagam ponas, domum propter vitia uēdas, in eā aliquis incurrat imprudens. hoc quanquam uideo propter deprauationem cōsuetudinis neque more turpe haberi; neq; aut lege sanciri, aut iure ciuili: naturæ tamē lege sancitum est: societas enim est (quod etsi saepe dictum est, dicendum tamē est sæpius) latissime quidem quæ pateat, hominum inter homines; interior eorum, qui eiusdem gentis sunt; propior eorum, qui eiusdē ciuitatis. itaq; maiores aliud ius gētium, aliud ius ciuile esse uoluerūt: quod enim ciuile, nō idem continuo gentiū, quod autem gētium, idem ciuile esse debet. sed nos ueri iuris, germaneq; iustitiæ solidam, & expressam effigiem nullā tenemus: umbra, & imaginibus utimur: easq; ipsas utinā sequeremur: feruntur enim ex optimis naturæ principijs, & ueritatis exemplis: nā quāti uerba illa? VTI NE PROPTER TĒ, FIDEM'VE TVAM CAPTVS, FRAVDA TVS'VE SIM. quā illa aurea? VT, INTER BONOS BENE AGIER OPORTET, ET SINE FRAVDATIONE. sed, qui sint boni, & quid sit bene agi, magna quaestio ē. Quintus quidē Scæuola Pōtifex Maximus summam. uim esse dicebat in omnibus ijs arbitrijs, in qbus adderetur ex fide bona:

fideiq; bonæ nomē existimabat manare latissime, idq;
 uersari in tutelis, societatibus, fiducijs, mandatis, rebus
 emptis, uēditis, cōductis, locatis: quibus uitæ societas cō
 tinetur: in his magni esse iudicis statuere, præsertim
 cū in plerisq; essent iudicia cōtraria, quid quēq; cuiq;
 præstare oporteret. quocirca astutiæ tollēda sunt, eaq;
 malitia, quæ uult quidē uideri se esse prudentiā, sed
 abest ab ea, distatq; plurimū: prudentia est enim loca
 ta in delectu bonorū, & malorum; malitia, si omnia,
 quæ turpia sunt, mala sunt, mala bonis anteponit. nec
 uero in prædijs solū ius ciuile ductum à natura mali
 tiam, fraudemq; uindicat; sed & in mancipiorū uen
 ditione uenditorū fraus omnis excluditur: qui enim
 scire debuit de sanitate, de fuga, de furtis, præstat edi
 cto Aediliū. heredū alia causa est, ex quo intelligitur,
 quoniam iuris natura fons sit, hoc secundum naturā
 esse, neminē id agere, ut ex alterius prædetur inscitia:
 nec ulla perniciēs uitæ maior inueniri potest, quā in
 malitia simulatio intelligentiæ. ex quo illa innumera
 bilia nascūtur: ut utilia cū honestis pugnare uidean
 tur: quotus enim quisq; reperietur, qui, impunitate, et
 ignoratione omniū proposita, abstinere possit iniuria?
 periclitemur, si placet, in ijs quidē exemplis, in quibus,
 peccare uulgus hominū fortasse nō putat: neq; enim
 de sicarijs, ueneficis, testamētarijs, furibus, peculatori
 bus hoc loco differendū est; qui non uerbis sunt, & di
 sputatione philosophorum, sed uinculis, & carcere ta
 stigādi, sed hæc consideremus, quæ faciunt ijs, qui habē
 tur boni. L. Minutiū Basilij, locupletis hominis, falsum
 testamentum quidem è Græcia, Romam attulerunt.

quod quo facilius obtinerent, scripserunt heredes se-
cū M. Crassum, & Q. Hortensiū, homines eiusdē ciui-
tatis potentissimos: qui, cum illud falsum esse suspi-
cantur, sibi autem nullius essent conscij culpæ, alieni
facinoris munusculū nō repudiauerunt. quid ergo?
satin hoc est, ut nō deliquisse uideantur? mihi quidē
non uidetur. quanquam alterum amari uiuum, alte-
rum non odi mortuum. sed cum Basilus M. Satirium
sororis filium nomen suū ferre uoluisset, eumq; fecis-
set heredem, hunc dico patronum agri Piceni, & Sa-
bini: (o turpem notam temporum illorum) non erat
æquum principes ciuitatis rem habere, ad Satiriū ni-
hil præter nomen peruenire. etenim si is, qui nō defen-
dit iniuriam, neq; propulsat à suis, cum potest, iniuste
facit, ut in primo libro disserui: qualis habendus est is,
qui non modo repellit, sed etiam adiuvat iniuriā? mi-
hi quidem etiam ueræ hereditates non honestæ uidē-
tur, si sint malitiosis blanditijs officiorū, non ueritate,
sed simulatione quæsita. atqui in talibus rebus aliud
utile interdum, aliud honestum uideri solet: falso:
nam eadem utilitatis, quæ honestatis, est regula. qui
hoc non præuiderit, ab hoc nulla fraus aberit, nullum
facinus: sic enim cogitans, est istud quidem honestum,
uerum hoc expedit; res à natura copulatas audebit er-
rore diuellere: qui fons est fraudū, maleficiorum, scele-
rum omnium. itaq; si uir bonus habeat hanc uim, ut, si
digitis concrepuerit, possit in locupletium testamenta
nomen eius irrepere, hac uī nō utatur, ne si explora-
tum quidem habeat id omnino neminē unquā suspi-
caturū. at si dares hanc uim M. Crasso, ut diotiorum

percussione heres posset scriptus esse, qui re uera nō es-
 set heres; in foro, mihi crede, saltaret. homo autem iu-
 stus, et is, quem sentimus uirum bonū, nihil cuiquā,
 quod in se transferat, detrahet. hoc qui admiratur, is
 se, quis sit uir bonus, nescire faterur. at uero, si quis uo-
 luerit animi sui complicatā notionē euoluere, iam se
 ipse doceat, eum uirū bonū esse, qui profit, quibus pos-
 sit; noceat nemini, nī si lace ssurus iniuria. quid ergo?
 hic nō noceat, qui quodam quasi ueneno perficiat, ut
 ueros heredes moueat, in eorum locum ipse succedat? +
 nō ergo faciat, dixerit quis, quod utile sit, quodq; expe-
 diat. immo intelligat, nihil nec expedire, nec utile esse,
 quod sit iniustum. hoc qui non didicerit, bonus esse
 non poterit. Fimbriam consularem, audiebam de patre
 nostro puer, iudicē M. Lutatius Pythiæ fuisse, equiti R.
 sane honesto, cum is sponsionem fecisset, N I bonus uir
 esset: itaque ei dixisse Fimbriam, se illam rem nun-
 quam iudicaturū, ne aut spoliaret fama probatum
 hominem, si contra iudicasset; aut statuisset uideretur
 uirum bonū aliquem esse, cum ea res innumerabili-
 bus officijs, et laudibus cōtineretur. huic igitur uiro
 bono, quē Fimbria etiam, nō modo Socrates, nouerat,
 nullo modo uideri potest quidquam esse utile, quod
 nō honestū sit. itaque talis uir nō modo facere, sed ne
 cogitare quidem quidquam audebit, quod nō audeat
 prædicare. hæc, nō ne est turpe, dubitare philosophos,
 quæ ne rustici quidē dubitēt? à quibus natum est id,
 quod iam tritum est uetustate prouerbiū: cū enim
 fidem alicuius, bonitatemq; laudāt, dignū esse dicūt,
 quicum in tenebris mices. hoc quā habet uim, nisi il

lam, nihil expedire, quod non deceat, etiam si id possis
 nullo resellente obtinere. uides ne igitur hoc prouer-
 bio, neq; Gygi illi posse ueniam dari, neq; huic, quem
 paulo ante fingebam digitorū percussione hereditates
 omnium posse ad sese conuertere? ut enim, quod turpe
 est, id quamuis occultetur, tamen honestum fieri nulla
 modo potest: sic, quod honestum non est, id utile ut sit,
 effici non potest, aduersante etiā, et repugnante natu-
 ra, at enim, cum permagna præmia sunt, est causa pec-
 candi. C. Marius, cum a spe Consulatus longe abisset,
 et septimum annum post Præturam iaceret, neq; peti-
 turus unquam Consulatum uideretur, Q. Metellum,
 cuius Legatus erat, summum uirum, et cicerem, cū ab
 eo Imperatore suo Romam missus esset, apud populū
 R. criminatus est, bellum illum producere, si se Consu-
 lem fecissent, breui tempore aut uiuum, aut mortuum
 Iugurtham se in potestatem populū R. redacturū. ita-
 que factus est ille quidem Cōsul, sed a fide iustitiāq; dis-
 cessit, qui optimum, et grauissimum ciuē, cuius Lega-
 tus, et a quo missus esset, in inuidiā falso crimine ad-
 duxerit. nec nos ter quidem Gracidianus officio boni ut
 ri functus est tum, cum Prætor esset, collegiumq; præto-
 rium Tribuni pl. adhibuissent, ut res numaria de com-
 muni sententia constitueretur: laetabatur enim tēpo-
 ribus illis numus, sic, ut nemo posset scire quid haberet.
 conscripserunt communiter edictum cum poena, atq;
 iudicio, constitueruntq; ut omnes simul in Rostra post
 meridiem descenderent. et ceteri quidem alius alio:
 Marius a subsellij in Rostra rectā: idq; quod commu-
 niter compositum fuerat, solus edixit: et ea res si quæ

ris) ei magno honori fuit: omnibus uicis statuæ factæ
 sunt: ad eas thus, & cerei. quid multa? nemo un-
 quam multitudini fuit charior. hæc sunt, quæ contur-
 bant homines in deliberatione nonnunquam, cū id, in
 quo uiolatur æquitas, non habetur ita magnum; illud
 autem, quod ex eo paritur, permagnū uidetur: ut Ma-
 rio præripere collegis, et Tribunis pl. popularem gra-
 tiam, non ita turpe; Consulem ob eam rem fieri, quod
 sibi tunc proposuerat, ualde utile uidebatur. sed om-
 nium una regula est, quam cupio tibi esse notissimā:
 aut illud, quod utile uidetur, turpe ne sit: aut si turpe
 est, ne uideatur esse utile. quid igitur? possumus ne
 aut illum Marium uirum bonum iudicare, aut hunc?
 explica, atq; excute intelligentiā tuam, ut uideas, quæ
 sit in ea species, forma, & notio uiri boni. cadit ergo in
 uirum bonum mentiri emolumentum sui causa, crimina-
 ri, præripere, fallere? nihil profecto minus. est ergo ul-
 la res tanti, aut commodum ullum tā expetendum, ut
 uiri boni et splendorem, & nomen amittas? quid est,
 quod afferre tantū utilitas ista, quæ dicitur, possit, quā-
 tum auferre, si boni uiri nomē eripuerit, fidem, iusti-
 tiāq; detraxerit? quid enim interest, utrum ex homi-
 ne se conuertat quis in belluam, an in hominis figura
 immanitatem gerat belluæ? quid, qui omnia recta, &
 honesta negligunt, dummodo potentiam cōsequantur;
 non ne id faciunt, quod is, qui etiam socerū habere uo-
 luit eum, cuius ipse audacia potens esset? utile enim ui-
 debatur plurimum posse alterius inuidia: id quā in-
 iustum in patriam, quā inutile, quā turpe esset, nō
 uidebat. ipse autem socer in ore semper Græcos uersus

Euripidis de Phœnissis habebat: quos dicam, ut potero; incondite fortasse, sed tamen ut res possit intelligi:

Nam si uiolandum est ius, regnandi gratia.

Violandum est: alijs rebus pietatem colas.

capitalis Eteocles, uel potius Euripides, qui id unum solum, quod omnium sceleratissimum fuerat, exceperit:

quid igitur minuta colligimus, hæreditates, mercatu-

ras, uenditiones fraudulentas? ecce tibi, qui Rex populi

R. dominusq; omnium gentium esse concupierit, idq; perfecit. hanc cupiditatem si quis honestam esse dicit, a-

mens est: probat enim legum, et libertatis interitum, earumq; oppressionem tetram, & detestabilem, glorio-

sam putat. qui autem fateatur honestum non esse in ea ciuitate, quæ libera fuit, quæq; esse debeat, regnare, sed

ei, qui id facere possit, esse utile; quæ hunc obiurgatio-

ne, aut quo potius conuitio à tanto errore conuertere potest enim, dii immortales, cuiquam esse utile fac-

diffimum, & teterrimum parricidium patriæ, quamuis, eo qui se obstrinxerit, ab oppressis ciuibus parens nomi-

netur? honestate igitur dirigenda utilitas est, & quidem sic, ut hæc duo uerba inter se discrepare, sed tamē

unum sonare uideantur. nunc ab eo ad uulgi opinionem, quæ maior utilitas, quàm regnandi esse possit? ni-

hil contra inutilis, ei qui id iniuste consecutus sit, inuenio, cum ad ueritatem cœpi reuocare rationē: possunt enim cuique esse utiles angores, sollicitudines, diurni et

nocturni metus, uita insidiarum periculorumq; plenissima? Multi iniqui, atq; infideles regno, pauci boni sunt, inquit Accius: at cui regno? quod à Tantalō, et Pelope

proditum iure obtinebatur. nam quāto plures ei Regi

*filiorum regno
utile*

putas, qui cum exercitu populi R. populum ipsum Ro-
 manum oppressisset, civitatemq; nō modo liberam, sed
 etiam genibus imperantem servire sibi coegisset? hūc
 tu quas cōscientiæ labe in animo censes habuisse? quæ
 vulnera cuius autem uita ipsi potest utilis esse, cum
 eius uita ea conditio sit, ut, qui illā eripuerit, in ma-
 xima gratia futurus sit, et gloria? quod si hæc utilia
 non sunt, quæ maxime uidentur, quia plena sunt de-
 decoris, ac turpitudinis? satis persuasum esse debet, ni-
 hil esse utile, quod non honestū sit: quanquam id qui-
 dem cum saepe aliās, tum Pyrrhi bello à C. Fabritio Cō-
 sule iterum, et à senatu nostro iudicatum est. cū es-
 nim rex Pyrrhus populo R. bellū ultro intulisset, cūq;
 de imperio certamen esset cum Rege generoso, ac potē-
 te, perfuga ab eo uenit in castra Fabritij, eiq; est polli-
 citus, si præmium ei propōsuisset, se, ut clam uenisset,
 sic clam in Pyrrhi castra rediturum, et eū ueneno ne-
 caturum. hunc Fabritius reducendum curauit ad Pyr-
 rhum: idq; eius factum à senatu laudatum est. atqui,
 si speciem utilitatis, opinionemq; querimus, magnum
 illud bellum, perfuga unus, et grauem aduersarium
 imperij sustulisset: sed magnum dedecus, et flagitiū,
 quicum laudis certamē fuisset, eum nō uirtute, sed sce-
 lere superatum. utrum igitur utilius uel Fabritio, qui
 talis in hac urbe, qualis Aristides Athenis, fuit; uel se-
 natui nostro, qui nunquā utilitatem à dignitate seiū-
 xit, armis cum hoste certare, an uenientis? si gloriæ cau-
 sa imperium expetendum est, scelus absit, in quo non
 potest esse gloria: sin ipsæ opes expetuntur quoquo mo-
 do, non poterunt esse utiles cū infamia. non igitur uti

morsu di-
 uina

lis illa L. Philippi Q. filij sententia : quas ciuitates L. Sylla pecunia accepta ex S. C. liberauisset, ut eæ rursus uectigales essent, neq; ijs pecuniâ, quam pro libertate dederât, redderemus. est ei senatus assensus. turpe imperio: piratarum enim melior fides, quàm senatus. at aucta uectigalia: utile igitur. quousq; audebunt dicere, quidquam utile, quod non honestum? potest autem ulli imperio, quod gloria debet fultum esse, & beneuolentia sociorû, utile esse odium, et infamia? ego etiam cû Catone meo saepe dissensi: nimis enim mihi uidebatur præfracte ærarium, uectigaliaq; defendere; omnia publicanis negare, multa socijs; cû in hos benefici esse deberemus, cum illis sic agere, ut cum colonis nostris solemus; eoq; magis, quòd illa ordinum coniunctio ad salutem Reip. pertinebat. male etiam Curio, cum causam Transpadanorû æquam esse dicebat; semper autem addebat, Vincat utilitas. potius diceret, nò esse æquam, quia non esset utilis Reip. quàm, cû æquam esse diceret, non esse utilem fateretur: plenus est sextus liber de officijs. Hecatonis talium quæstionû: sit ne boni uiri, in maxima caritate annonæ familiâ nò alere. In utranq; partem disputat: sed tamen ad extremum utilitate putat officium dirigi magis, quàm humanitate. quærit si in mari iactura faciêda sit, equi ne pretiosi potius iacturâ faciat, an seruuli uilis. hic aliò res familiaris, aliò ducit humanitas. si tabulâ de naufragio stultus arripuerit, extorquebit ne eâ sapiens, si potuerit? negat, quia sit iniurium. quid dominus nauis eripiet ne suû? minime, non plus, quàm si nauigantem in altû eicere de naui uelit, quia sua nò sit: quoad enim peruertû sit

ed, quò sumpta nauis est, nō domini est nauis, sed nauigantium. quid, si in una tabula sint duo naufragi. hiq; sint sapientes, sibi uterq; rapiat, an alter cedat alteri? cedat uero, sed ei, cuius magis intersit uel sua, uel Reip. causa uiuere, quid, si hæc paria in utroq;? nullū erit certamē; sed quasi in sorte, aut in micādo uictus, alteri cedet alter. quid, si pater fana expilet, cuniculos agat ad ærarium, indicet ne id magistratibus filius? nefas id quidē est: quin etiā defendat patrem, si arguatur. nō igitur patria præstat omnibus officijs? immo uero: sed ipsi patriæ cōducit, pios habere ciues in parentes. quid, si tyrannidem occupare, si patriam prode conabitur pater, filebit ne filius? immo uero obsecrabit patrem, ne id faciat: si nihil proficiet, accusabit, minabitur etiā: ad extre. nū, si ad perniciē patriæ res pectabit, patriæ salutē anteponet saluti patris. querit etiam, si sapiens adulterinos numos accipiet imprudēs pro bonis, cū id rescierit, soluturus ne sit eos, si cui debeat, pro bonis. Diogenes ait, Antipater negat: cui potius assentior. qui uinū fugiens uēdat sciens, debeat ne dicere? nō necesse putat Diogenes, Antipater uiri boni existimat. hæc sunt quasi controuersie in iure Stoicorū. in mancipio uendendo, dicenda ne uitia? non ea, quæ nisi dixeris, redhibeatur mancipium iure ciuili; sed hæc, mendacē esse, aleatorem, furacem, ebriosum, alteri dicenda uidetur, alteri non dicenda. si quis aurum uendēs, aurichalcum se putat uendere, indicet ne ei ulr bonus aurum illud esse, an emat denario quod sit millenarium? perspicuū lā est, & quid mihi uideatur, et quæ sit inter eos philosophos, quos nominaui, cōtrouersia. pacta, et promissa

semper ne seruanda sint, quæ nec ui, nec dolo malo (ut Prætores solent dicere) facta sint? si quis medicamentum cuiquam dederit ad aquam intercutem, pepigeritque, ne illo medicamento unquam postea uteretur, si eo medicamento sanus factus fuerit, et annis aliquot post incederit in eundem morbum, nec ab eo, quicum pepigerat, impetret, ut item eo liceat uti, quid faciendum sit, cum sit is inhumarus, qui non concedat, uti, nec ei quidquam fiat iniuria? uita, et salutis consulendum est. quid, si quis sapiens rogatus sit ab eo, qui eum heredem faciat, cum ei testamento sestertium milles relinquatur, ut ante quam hereditatem adeat, luce palam in foro saltet, idque, se facturum promiserit, quod aliter eum heredem scripturus ille non esset: faciat, quod promiserat ille, nec ne? promississe nollem, et id arbitror fuisset grauitatis: sed, quoniam promissit, si saltare in foro turpe ducet, honestus mentietur, si ex hereditate nihil cepit: nisi forte eam pecuniam in Reip. magnum aliquod tempus contulerit, ut uel saltare eum, cum patriæ consulturus sit, turpe non sit. ac ne illa quidem promissa seruanda sunt, quæ non sunt ipsi ipsis utilia, quibus illa promiseris. Sol Phæthonti filio (ut redeamus ad fabulas) facturum se esse dixit, quidquid optasset: optauit, ut in currum patris tolleretur: sublatu est insanus: ante quam constitit, ictu fulminis deflagrauit. quanto melius fuerat in hoc promissum patris non esse seruatum? quid, quod Theæseus exegit promissum à neptuno? cui cum tres optationes Neptunus dedisset, optauit interitum Hippolyti filij sui, cum is patri suspectus esset de nouerca; quo optato impetrato, Theæseus in maximis fuit luctibus, quid Aga

memnon? cū deuouisset Dianæ, quod in suo regno pulcherrimum natū esset illo anno, immolauit Iphigeniā, qua nihil erat eo quidem anno natum pulchrius. promissum potius non faciendum, quā tam tetrum facinus admittendum fuit. ergo & promissa nō facienda nonnunquam. Neq; semper deposita reddenda sunt. si gladiū quis apud te sanæ mentis deposuerit, repetat insaniens; reddere peccatum sit, non reddere officium. quid, si is, qui apud te pecuniam deposuerit, bellū inferat patriæ, reddes ne depositum? non, credo: facies enim cōtra Remp. quæ debet esse charissima sic multa, quæ natura honesta uidentur esse, temporibus fūt non honesta. facere promissa, stare cōuentis, reddere deposita, cōmutata utilitate sunt non honesta. ac de iis quidem, quæ uidentur esse utilitatis contra iustitiam simulatione prudentiæ, satis, arbitror, dictum. sed quoniam a quatuor fontibus honestatis primo libro officia duximus, in eisdem uersabimur, cū docebimus, ea, quæ uidentur esse utilia, neque sunt, quā sint uirtutis inimica; ac de prudentia quidem, quam uult imitari malitia; itemq; de iustitia, quæ semper est utilis, disputatum est. Reliquæ sunt duæ partes honestatis: quarum altera in animi excellentis magnitudine, et præstātia cernitur; altera in conformatione, et moderatione continentia, & tēperantiæ. utile uidebatur Vlyssi (ut quidam poetæ tragici prodiderunt: nam apud Homerum optimū auctorem talis de Vlysse nulla suspicio est) sed insimulant eum tragœdiæ simulatione insanix militiam subterfugere uoluisse. non honestū consilium: at utile (ut aliquis fortasse dixerit) regnare; et Ithacæ uiuere otiose

tum parentibus, cum uxore, cum filio. ullū tu decus
in quotidianis periculis, & laboribus cū irāquillitate
hac conferendum putas? ego uero istā contēnendam,
& abiiciendam; quoniā, quæ honesta nō sit, ne utilem
quidē esse arbitror: quid enim auditurū putas fuisse
Vlyssē, si in illa simulatiōe perseuerasset? qui, cū ma-
ximas res gesserit in bello, tamē hēc audiuit ab Aiāce:
Cuius ipse princeps iurisiurandi fuit,
Quod omnes scitis, solus neglexit fidem:
Furere assimulauit. ne cōtret, institit.
Quod ni Palamedis perspicax prudentia
istū percepset malitiosam audaciam,
Fides sacratæ ius perpetuū falleret.
illi uero non modo cum hostibus, uerū etiā cum flu-
tibus, id quod fecit, dimicare melius fuit, quā desere-
re consentientem Graciam ad bellum barbaris inferē-
dum. sed dimittamus & fabūlas, & externa: ad rem
factāq; ueniamus. M. Attilius Regulus, cum Cōsul ite-
rū in Africa ex insidijs captus esset, duce Xantippo
Lacedæmonio, imperatore autē patre Anniballis Amil-
care, iuratus missus est ad senatū, ut, nisi redditi essent
Pœnis captiui nobiles quidā, rediret ipse Carthaginē.
Is, cum Rōmam uenisset, utilitatis speciem uidebat: sed
eam, ut res declarat, falsam iudicauit: quæ erat talis,
manere in patria, esse domi suæ cum uxore, cū liberis;
quam calamitatem acceperat in bello, cōmunē fortū-
næ bellicæ iudiciū, tenere cōsularis dignitatis grā-
dū. quis hęc neget esse utilia? quid censes? magnitudo
animi, & fortitudo negat. an locupletiores quæris di-
ctores? harū enim est uirtutum propriū nil extime-

scere omnia humana despiciere, nihil, quod hominī ac
 cidere possit, intolerandum putare: itaq; quid fecit? in
 senatum uenit: mandata exposuit: sententiam ne dice
 ret, recusauit: quā diu iureiurando hostium tenere
 eum, nō esse se senatorem. atq; illud etiam: (ō stultum
 hominem, dixerit quispiā, & repugnātē utilitati suā)
 reddi captiuos, negauit eē utile: illos enim adolēscētes,
 & bonos duces, se iam confectum senectute. cuius cū
 ual uisset auctoritas, captiui retēti sunt, ipse Carthagi
 nem rediit, neq; cum charitas patrie retinuit, nec suoz
 rum. neq; uero tamen ignorabat se ad crudelissimum
 hostem, & ad exquisita supplicia proficisci: sed iusiurā
 dum conseruandum putabat. itaq; tum, cum uigilādo
 necabatur, erat in meliore causa, quā si domi senex ca
 ptiuus, periurus, & cōsularis remansisset. at stulte, qui
 non modo non censuerit captiuos remittendos, uerum
 etiam dissuasit. quo modo stulte? etiam ne, si Reip.
 cōducebat? potest autē, quod inutile Reip. sit, id cuiquā
 ciui utile esse? peruertūt homines ea, quæ sunt funda
 menta naturæ, cum utilitatē ab honestate seiungunt:
 omnes enim expetimus utilitatē, ad eamq; rapimur;
 nec facere aliter ullo modo possumus: nā quis est, qui
 utilia fugiat? aut quis potius, qui ea non studiosissime
 persequatur? sed quia nusquā possumus, nisi in laude,
 decore, honestate, utilia reperire, propterea illa prima,
 & summa habemus, utilitatis nomen nō tā splēdidū,
 quā necessarium ducimus. quid est igitur, dixerit
 quis, In iureiurando? num iratum timemus Iouē? at
 hoc quidem cōmune est omnium philosophorum, non
 eorū modo, qui deū nihil habere ipsum negotij dicūt

et nihil exhibere alteri; sed eorū etiam, qui deū semper agere aliquid, et moliri uolunt, nunquā nec irasci deum, nec nocere. quid autē iratus Iupiter plus nocere potuisset, quā nocuit sibi ipse Regulus? nulla igitur uis fuit religionis, quæ tantā utilitatem peruerteret. an, ne turpiter faceret? primum minima de malis. num igitur tantum mali turpitudine ista habebit, quā tum ille cruciatus? deinde illud etiam apud Accium, Fregisti ne fidem? neq; dedi, neq; do infideli cuiquam. quanquam ab impio rege dicitur, luculente tamē dicimur. addunt etiam: quēadmodum nos dicamus, uideri quædā utilia, quæ nō sint; sic se dicere, uideri quædam honesta, quæ nō sint: ut hoc ipsum uidetur honestum conseruādi iurisiurandi causa ad cruciatū reuertisse, sed fit nō honestum, quia, quod per uim hostium esset actū, ratū esse nō debuit. addunt etiā; quidquid ualde utile sit, id fieri honestū, etiam si antea non uidetur. hæc ferē contra Regulū. sed prima uideamus. Nō fuit Iupiter metuendus, ne iratus noceret, quia neque irasci solet, neq; nocere. hæc quidem ratio nō magis contra Regulū, quā contra omne iusiurandum ualeat. sed in iureiurando, nō qui metu, sed quæ uis sit, debet intelligi: est enim iusiurādū affirmatio religiosa. quod autē affirmatiue, quasi deo teste, promiseris, id tenendū est: iam enim nō ad tram deorum, quæ nulla est, sed ad iustitiā, et ad fidē pertinet: nā præclare Ennius, O fides alma, apta pennis, et iusiurandum Iouis. qui igitur iusiurādū uiolat, is fidem uiolat. quam in Capitolio uicinā Iouis Optimi Maximi, ut in Catonis oratione est, maiores nostri esse uoluerunt. at enim ne

iratus quidē Iupiter plus Regulo nocuisset, quā sibi
 nocuit ipse Regulus: certe, si nihil malū esset, nisi dolo-
 re. id autem nō modo non summū malum, sed nec ma-
 lum: quidē esse, maxima auctoritate philosophi affir-
 mant. quorum quidē testem nō mediocre, sed haud
 scio an grauissimum, Regulū nolite, quaeso, uituperare:
 quem enim locuplettorem quaerimus, quā princi-
 pem Reip. qui retinēdi officij causa cruciatum subierit
 uolūtarium? nam, quod aiunt minima de malis, id est
 ut turpiter potius, quā calamitose: an est ullum ma-
 ius malū turpitudine? quā si in deformitate corporis
 habeat aliquid offēsiōis, quāta illa deprauatio, et fo-
 ditas turpificati animi debet uideri? itaq; neruosius
 qui ista differunt, solum audēt malum dicere id, quod
 turpe sit: qui autem remissius, hi tamē non dubitant
 summum malum dicere. nam illud quidem,
 Neque dedi, neque do fidem infideli cuiquam,
 idcirco recte à poeta dicitur, quia, cū tractaretur A-
 treus, personae seruiendū fuit. sed si hinc sibi sumunt,
 nullam esse fidē, quā infideli data sit: uideant, ne quā-
 ratur latebra periurio. est autem etiam ius bellicum,
 fidesq; iurisiuradi saepe hosti seruanda: quod enim ita
 iuratum est, ut mens deferētis conciperet fieri oportere,
 id obseruandū est; quod aliter, id si non fecerit, nul-
 lum periurium est: ut, si praedōibus pactum pro capite
 pretium nō attuleris, nulla fraus est, ne si iuratus qui-
 dem id non feceris: nam pirata nō est ex perduellium
 numero definitus, sed cōmunis hostis omnium. cum hoc
 nō fides esse debet, nec iusiurandū cōmune: nō enim,
 falsum iurare, petere est; sed, quod ex animi tui sen-
 tentia

tentia iuraueris, sicut uerbis concipitur, more nostro, id non facere, periurium est: scite enim Euripides; Iuravi lingua, mentem iniuratum gero. Regulus uero nō debuit conditiones, pactionesq; bellicas, & hostiles perturbare periurio: cum iusto enim, et legitimo hoste res gerebatur: aduersus quē & totum ius foeciale, & multa sunt iura cōmunia. quod ni ita esset, nūquā claros uiros senatus uinctos hostibus deditisset. at uero T. Veturius, & Sp. Posthumius, cum iterum Cōsules essent, quia, cum male pugnatū apud Caudium esset, legionibus nostris sub iugū missis pacē cum Samnitibus fecerant, dediti sunt his: iniussu enim populi, senatusq; fecerant. eodemq; tempore T. Numitius, Q. Aemilius, qui tum Tribuni pl. erant, quōd eorum auctoritate pax erat facta, dediti sunt, ut pax Samnitum repudiaretur. atque huius deditionis ipse Posthumius, qui dedebatur, suator, et auctor fuit. quod itē multis annis post C. Mancinus: qui, ut Numātinis, quibuscum sine senatus auctoritate foedus fecerat, dederetur, rogationem suasit eam, quam L. Furius, & Sex. Atilius ex S. C. ferebant: qua accepta, est hostibus deditus. honestius hic, quā Q. Pōpeius: quo, cum in eadem causa esset, deprecante, accepta lex nō est. hic ea, quæ uidebatur utilitas, plus ualuit, quā honestas: apud superiores utilitatis species falsa, ab honestatis auctoritate superata est. at non debuit ratum esse, quod erat actum per uim. quasi uero forti uiro uis possit adhiberi. cur igitur ad senatum proficisceretur, cū præsertim de captiuis dissuasurus esset: quod maximum in eo est, id reprehenditis: non enim suo iu

dicio stetit; sed suscepit causam, ut esset iudicium senatus: cui nisi ipse auctor fuisset, captiui profecto Patris redditi essent. ita incolumis in patria Regulus restitisset. quod quia patriae non utile putauit, ideoque non se sentire illa, et pati credidit. nam quod aiunt, quod ualde utile sit, id fieri honestum: immo uero, esse, non fieri: est enim nihil utile, quod idem non honestum: nec, quia utile, honestum est; sed, quia honestum, utile. quare ex multis mirabilibus exemplis haud facile quis dixerit hoc exemplo aut laudabilius, aut praestantius. sed ex tota hac laude Reguli, unum illud est admiratione dignum, quod captiuos retinendos censuerit. nam quod rediit, nobis non mirabile uidetur: et illis quidem temporibus aliter facere non potuit: itaque ista laus non est hominis, sed temporum: nullum enim uinculum adstringendam fidem iureiurando maiores arctius esse uoluerunt. id indicant leges in Duodecim tabulis, indicant sacra, indicant foedera, quibus etiam cum hoste deuitur fides; indicant notationes, animadversionesque Censorum, qui nulla de re diligentius, quam de iureiurando iudicabant. L. Manlio A. filio, cum Dictator fuisset, M. Pomponius Tribunus pl. diem dixit, quod is paucos sibi dies ad Dictaturam gerendam addidisset. criminabatur etiam, quod Titum filium, qui Torquatus postea est appellatus, ab hominibus relegasset, et ruri habitare iussisset. quod cum audiuisset adolescens filius, negotium exhiberi patri, accurrisse Romam, et prima luce Pomponij domum uenisse dicitur. cui cum esset nuntiatum; quod illum iratum allaturum ad se aliquid contra patrem arbitraretur, surrexit ex lectulo, remotisque;

arbitris ad se adolescentē iussit uenire. at ille, ut ingres-
sus est; confestim gladium distrinxit, iurauitq; se illum
statim interfectorum, nisi iusiurādum sibi dedisset, se
parrem missum esse facturum. iurauit hoc terrore co-
actus Pomponius: rem ad populū detulit: docuit, cur
sibi à causa desistere necesse esset: Manliū missum se-
cit: tantum temporibus illis iusiurādum ualebat, atq; †
hic T. Manlius is est, qui ad Anienem Gallo, quem ab
eo prouocatus occiderat, torque detracto, cognomē in-
uenit: cuius tertio Consulatu Latini ad Vesperim fusi,
& fugati: magnus uir in primis: & qui nuper indul-
gens in patrem, idem acerbus, & seuerus in filiū. sed
ut laudandus Regulus in conseruando iureiurādo, sic
decem illi, quos post Cānensem pugnam iuratos ad se
natum misit Annibal, in castra redituros ea, quorum
erant potiti Pœni, nisi de redimēdis captiuis impetra-
uissent, si nō redierunt, uituperādi. de quibus nō om-
nes uno modo: nam Polybius, bonus auctor in primis,
scribit, ex decē nobilissimis, qui tunc erāt missi, nouē
reuertisse à senatu re nō impetrata; unū ex decē, qui
paulo post, quā egressus erat è castris, redisset, quasi ali-
quid esset oblitus, Romæ remansisse: reditu enim in
castra, liberatum se esse iureiurando interpretabatur:
nō recte: fraus enim dstringit, non dissoluit periuriū.
fuit igitur stulta calliditas, peruerse imitata prudētia.
itaq; decreuit senatus, ut ille ueterator, et callidus uin-
ctus ad Annibalē duceretur. sed illud maximū: octo
hominū millia tenebat Annibal, nō quos in acie cepis-
set, aut qui piculo mortis diffugissent, sed qui relictī in
castris fuissent à Paulo, et Varrone Cōsulibus: eos sena-

tus nō censuit redimendos, cum id parua pecunia fieri potuisset; ut esset insitū militibus nostris aut uincere, aut emori. qua quidē re audita fractū animū Annibalis scribit idē, quōd senatus, populusq; R. rebus afflētis tam excelso animo fuisset. sic honestatis cōparatione ea, quæ uidentur utilia, uincuntur. Acllius autē, ille, qui græce scripsit historiā, plures ait fuisse, qui in castra reuertissent, eadē fraude, ut iureiurādo liberarentur; eosq; à Censoribus omnibus ignominijs notatos, sit iam huius loci finis: perspicuum est enim, quæ timido animo, humili, demisso, fractoq; fiant, quale fuisset Reguli factū, si aut de captiuis, quod ipsi opus esse uideret, non quod Reipublicæ, censuisset, aut domi remanere uoluisset; nō esse utilia, quia sunt flagitiosa, fœda, & turpia. Restat quarta pars, quæ decore, moderatione, modestia, continētia, tēperantia continetur. potest igitur quidquā esse utile, quod sit huiusmodi uirtutum choro contrarium? atqui ab Aristippo Cyrenaeici, atq; Annicerij philosophi nominati, omne bonū in uoluptate posuerunt; uirtutemq; censuerunt ob eam rem esse laudādā, quōd efficiens esset uoluptatis. quibus obsoletis flores Epicurus, eiusdē ferē adiutor, auctorq; sententiæ. cum his, uelis equisq; (ut dicitur) si honestatem tueri, ac retinere sententiā est, decertandum est: nā si nō modo utilitas, sed ulta omnis beata, corporis firma constitutione, eiusq; cōstitutionis spe explorata (ut à Metrodoro scriptū est) continetur; certe hæc utilitas, & quidem summa (sic enim cēsent) cū honestate pugnabit. nā ubi primum prudentiæ locus dabitur? an, ut conquirat undiq; suauitates? quā mi-

ser uirtutis famularus seruientis uoluptati? quod autē munus prudentiæ? an legere intelligenter uoluptates? fac nihil isto esse iucundius: quid excogitari potest turpius? iam, qui dolorem summum malum dicat, apud eum quem habet locum fortitudo, quæ est dolorū, laborumq; contemptio? quamuis enim multis in locis dicat Epicurus, sicut hic dicit, satis fortiter de dolore; tamen non id spectandum est, quid dicat, sed quid cōsentaneū sit et dicere, qui bona uoluptate terminauerit, mala dolore; ut si illum audiam de continentia, et temperantia. dicit ille quidem multa multis locis: sed aqua hæret, ut aiunt; nam quo modo potest temperantiam laudare is, qui ponat summum bonū in uoluptate? est enim temperantia libidinum inimica, libidines autē cōsectatrices uoluptatis. atq; in his tamen tribus generibus, quoquo modo possunt, non incallide tergiversantur. prudentiam introducunt scientiam suppeditantē uoluptates, depellentem dolores. fortitudinem quoque aliquo modo expediunt, cum tradunt rationem negligendæ mortis, peperiendiq; doloris. etiam temperantiam inducunt, nō facillime illi quidem, sed tamē quoquo modo possunt: dicunt enim, uoluptatis magnitudinem doloris detractione fieri. iustitia uacillat, uel iacet potius, omnesq; hæc uirtutes, quæ in cōmunitate cernuntur, & in societate generis humani: neque enim bonitas, nec liberalitas, nec comitas esse potest, non plus quàm amicitia, si hæc nō per se expectatur, sed ad uoluptatē, utilitatē ue referantur. cōferamus igitur in pauca: nā ut utilitatē nullā esse docuimus, quæ honestati esset cōtraria; sic omnem uoluptatem dicimus honest-

stat esse contrariam. quo magis reprehendendos Calli-
phonem, & Dinomachum iudico: qui se dirempturos
controuersiam putauerunt, si cum honestate uolupta-
tem, tãquam cum homine pecudem, copulauissent. nō
recipit istā coniunctionē honestas, aspernatur, repellit.
nec uero finis bonorum, & malorū, qui simplex esse
debet, ex dissimilibus rebus misceri, & tēperari potest.
sed de hoc hactenus: magna enim res, alio loco pluribus
uerbis disputata. nunc ad propositum. quemadmo-
dum igitur, si quando ea, quæ uideretur utilitas, hone-
stat repugnat, diiudicanda res sit, satis est supra dispu-
tatum. sin autem speciem utilitatis etiam uoluptas ha-
bere dicatur, nulla potest esse ei cum honestate cōiun-
ctio: nam ut tribuamus aliquid uoluptati, condimenti
fortasse nonnihil, utilitatis certe nihil habebit.

Habes à patre munus Marce fili, mea quidem senten-
tia, magnum: sed perinde erit, ut acceperis. quanquam
tibi hī tres libri inter Cratippi commentarios, tanquā
hospites, erunt recipiendi. sed ut, si ipse uenissem Athe-
nas, quod quidē esset factum, nisi me de medio cursu
clara uoce patria reuocasset, aliquādo me quoque au-
dires: sic, quoniam his uoluminibus ad te profecta uox
mea est, tribues his temporis, quantum poteris; poteris
autem, quantum uoles. cum uero intellexero, te hoc sci-
entiae genere gaudere, tum & præsens tecū propediem
(ut spero) &, dum aberis, absens loquar. Vale igitur
mi Cicero; tibiq; persuade, te mihi quidem esse cha-
rissimum, sed multo fore chariorem, si talibus moni-
mentis, præceptisq; lætabere.